





A 29 - 16/4

2/250

429-10/11/94



Presented to the B. R. Institute  
by Balaram Anghore

# নীতি-প্রবন্ধ-মালা

৩১০

শ্রীপূর্ণচন্দ্র দে, এম্ এ, বি এল্,

প্রণীত।

কলিকাতা,

১৫ নং বণিকপুকুরিণী হইতে

শ্রীহেমচন্দ্র দে দ্বারা প্রকাশিত।

১৮১১ শক।

[ All rights reserved. ]

PRINTED BY M. N. DAY, AT THE HINDU PRESS,  
61 AHERITOLLA STREET.  
CALCUTTA.

বাক্য: 620  
জক. 220.6.6  
পরিগ্রহণের তারিখ 2/5/03

## ভূমিকা । ৭/১২০



নীতি-প্রবন্ধ-মালা প্রকাশিত হইল। ইহাতে নিত্য জীবনের ধর্ম, সমাজ ও বিষয় সম্বন্ধীয় কয়েকটা কথা প্রবন্ধকারে সন্নিবেশিত হইয়াছে। ভাষার লালিত্য বা অলঙ্কারের চাকচিক্য প্রদর্শন এই পুস্তকের উদ্দেশ্য নহে। আমার প্রিয় স্মরণ্য শ্রীযুক্ত বাবু রজনীকান্ত মুখোপাধ্যায়, বি এল, নিত্য জীবনের কতকগুলি নিয়মাবলী পুস্তকাকারে নিবন্ধ করিবার জন্য আমাকে এক সময়ে অনুরোধ করেন। তাঁহাতেই সেই সাধু ইচ্ছার বশবর্তী হইয়া আমি এই ক্ষুদ্র পুস্তকখানি প্রণয়নে প্রবৃত্ত হই। ইহাতে কতদূর কৃতকার্য হইয়াছি বলিতে পারি না। বিষয়টি অতি গুরুতর। সমস্ত জীবন-নীতি এই ক্ষুদ্র পুস্তকের মধ্যে বিনিবেশিত হইবে কোনমতেই আশা করা যাইতে পারে না। কতকগুলি বিষয়মাত্র ইহাতে প্রকটিত হইল। স্বকীয় জীবনের উন্নতির পথ প্রত্যেককে নিজেই প্রস্তুত করিতে হইবে। সেই পথের কয়েকটা রেখামাত্র এই পুস্তকে অঙ্কিত হইল। অবশিষ্ট সমস্ত, চিন্তাশীল পাঠক কর্তৃকই সমাহিত হইবে। এই ক্ষুদ্র পুস্তকদ্বারা পাঠকের হৃদয়ে যদি অগুনাত্রও ধর্ম এবং নীতি-বিষয়ক ভাব উদ্দীপিত হয়, তাহা হইলেই ইহার উদ্দেশ্য সিদ্ধ হইবে।

কলিকাতা, বণিকপুস্করিণী } ক্রীপূর্ণচন্দ্র দে ।  
২৯ শে আশ্বিন ১৮১১ শক ।





## সূচিপত্র ।

বিষয়	পৃষ্ঠা ।
১। সৌন্দর্য	১
২। সদৃষ্টান্ত	৩
৩। বৈরিতা	৫
৪। পরোপকার	৮
৫। যথার্থ স্মৃতি কে ?	১১
৬। স্ত্রী	১৩
৭। স্বার্থপরতা	১৫
৮। বন্ধুতা	১৬
৯। পরিশ্রম	১৮
১০। প্রতিজ্ঞা	২১
১১। ক্রোধ	২৪
১২। বস্ত্রহরণ	২৬
১৩। একাগ্রতা	২৮
১৪। ধৈর্য	৩০
১৫। সহায়ভূতি	৩২
১৬। দানশীলতা	৩৪
১৭। প্রশংসাপত্র	৩৬
১৮। ছঃখ	৩৯
১৯। স্বর্ণধনি	৪১
২০। প্রীতি	৪৪

বিষয়	পৃষ্ঠা ।
২১। রচনা	৪৭
২২। প্রায়শ্চিত্ত	৪৯
২৩। কথোপকথন	৫২
২৪। লক্ষ্যবস্তু	৫৪
২৫। কুসংস্কার	৫৬
২৬। মতামত	৫৮
২৭। ভূত্যের প্রতি ব্যবহার	৬১
২৮। বিবাদ	৬৩
২৯। ধূর্ততা	৬৫
৩০। পণরক্ষা ও জেদ	৬৮
৩১। মহত্ত্ব	৭০
৩২। আশা	৭২
৩৩। কল্পনা	৭৫
৩৪। যৌবন ও বার্দ্ধক্য	৭৭
৩৫। মৃত্যু	৮০
৩৬। আত্মগরিমা	৮২
৩৭। পরিমিতব্যয়িতা	৮৪
৩৮। কুদৃষ্টি	৮৭
৩৯। বৈষয়িক অধীনতা	৯০
৪০। মায়া	৯২
৪১। শুদ্ধাচার ও পবিত্রতা	৯৪
৪২। বৈষয়িক বুদ্ধি	৯৭
৪৩। সামাজিক ভীতি ও সম্মাননা	১০০

১৭  
১৮

সূচিপত্র।

১/০

বিষয়	পৃষ্ঠা।
৪৪। নিয়ম বা কার্য্য-শৃঙ্খলা ...	১০২
৪৫। ঋণ ...	১০৪
৪৬। বিবাহ ...	১০৭
৪৭। ধনের অপব্যবহার ...	১১০
৪৮। ঈশ্বরের অস্তিত্ব ...	১১২
৪৯। ধনসঞ্চয় ...	১১৪
৫০। পিতামাতা এবং সন্তান-সন্ততি ...	১১৭
৫১। সত্য ...	১২০
৫২। অনুরোধ ...	১২৫
৫৩। ক্ষমতা ...	১২৮
৫৪। সততা বা সরলতা ...	১৩০
৫৫। আত্মহত্যা ...	১৩২
৫৬। ক্রোধ এবং ভালবাসার নিত্যযোগ ...	১৩৫
৫৭। সন্দেহ ...	১৩৮
৫৮। গৃহীর পাপ ...	১৪১
৫৯। পরপ্রশংসা ...	১৪৩
৬০। কার্য্যতৎপরতা ...	১৪৬
৬১। ক্রুদ্ধদৃষ্টি ...	১৪৯
৬২। বিনয় ...	১৫২
৬৩। কৃতজ্ঞতা ...	১৫৪

---



# নীতি-প্রবন্ধ-মালা।

৭  
৩১০

## ১। সৌন্দর্য্য।

প্রকৃত সৌন্দর্য্য কোথায়? সকলেই বাহ্যিক অঙ্গসৌষ্ঠবের শোভা পরিবর্দ্ধনে যত্নশীল। যুবক নিজ কর্তব্য-সম্পাদনের সময় হইতেও সময় কর্তন করিয়া কেশ-বিন্যাস বা বেশ-বিন্যাসে তৎপর। প্রগল্ভা তরুণীগণের কথা ত স্বতন্ত্র। কিন্তু হৃদয়-সৌন্দর্য্য-বিরহিত নর বা নারী গভীরানুককারাচ্ছন্ন-গিরি-গহ্বর, অথবা জ্যোৎস্না-বিরহিত-পূর্ণিমা-নিশা সদৃশ। কেহ বলিয়াছেন, চত্বারিংশৎ বৎসর বয়ঃক্রমকালে মনুষ্যমাত্রেই সুন্দর কিম্বা কুৎসিত হইয়া থাকে। বাস্তবিক সুন্দর হইবার অধিকার সকলেরই সমান। ঈশ্বর-প্রদত্ত এই অধিকার যে অবহেলা করে, সে চিরকুৎসিত রহিয়া যায়।

বাহ্যিক সৌন্দর্য্য নদীর বান। বর্ষাপগমে নদীর যে স্থির-ভাব, তাহাই উহার সুন্দরতা। দর্শনেই যদি তোমার প্রতি স্নেহ বা ভক্তির সঞ্চার না হইল, তবে তোমার সুন্দরতা কোথায়? যে আশ্র-সন্দর্শনে হৃদয় পুলকিত হয়, তাহাই সুন্দর। ইন্দ্রচাপ সদৃশ জয়ুগল অথবা আকর্ণ-বিক্ষা-রিত নেত্র আপাততঃ নয়ন-রঞ্জক বটে; কিন্তু যদি হৃদয়ের

কোমলতা সেই নয়ন-যুগলে বিক্ষুব্ধিত না হয়, যাহা নয়ন-রঞ্জক ছিল, তাহা অবিলম্বেই বিপরীত ভাব ধারণ করে।

লজ্জাবতীলতার অবনতি ও সঙ্কোচ-ভাবই সুন্দরতা। ললনার সৌন্দর্য্য মাধুর্য্যে, পুরুষের সৌন্দর্য্য মধুরতাময় মুহূ-স্বভাবে। সাধ্বী সন্তুষ্টচিত্তা অঙ্গনার মধুরতা আর চাক্চিক্য-শালিনী-প্রগল্ভা তরুণীর ধৃষ্টতা, এই দুইয়ের পার্থক্য দৃষ্টি-মাত্রেই অমুছূত হয়। একের প্রতি হৃদয়ের স্নেহ-ভক্তি এবং অপরের প্রতি ঘৃণা-ক্রোধ স্বভাবতই উপজাত হয়। রমণীগণের দোষ ত ক্ষমণীয়, কিন্তু পুরুষের ধৃষ্টতা ভয়ানক ও ঘৃণার্থ।

পরিজন-পরিচর্যাভূরতা পতিব্রতা কামিনীর প্রফুল্লানন অতীব সুন্দর। অনন্ত-শয্যা-শায়ি-নারায়ণ-পদ-সেবা-নিযুক্তা কমলার সুন্দর মূর্ত্তি আরও কমণীয়।

প্রাণীদিগের শৈশবই সুন্দর। শিশুর সৌন্দর্য্য নির্দোষিতা। এই জন্ত বাইবেলে পুনঃপুনঃ কথিত হইয়াছে, শিশু-গণেরই স্বর্গরাজ্য; মনুষ্য শিশু সদৃশ না হইলে সেই স্বর্গ-রাজ্যে তাহার প্রবেশাধিকার নাই। যিনি নির্দোষিতা হৃদয়ে ধারণ করিয়া সকলকেই আশ্বীয়বৎ দর্শন করিতে সক্ষম হইয়াছেন, সেই ব্যক্তিই ধন্ত।

ফলভারাবনত পাদপরাজী স্বভাবতই সুন্দর। তরুণ জ্ঞানাবনত মানবাত্মার গভীরমূর্ত্তি অতীব মনোহারিণী। সত্যোৎসাহে উৎসাহিত মানবাত্মার নির্ভীকতা, তাঁহার পর-সেবায় আত্মসমর্পণ, তাঁহার পরহৃৎখে কাতরতা প্রভৃতি হৃদয়-কুসুম অবলোকনে কাহার না হৃদয় প্রফুল্ল হয়? যে ব্যক্তি

ঐ সকল সদৃষ্টান্তকে নিয়ত হৃদয়ে পোষণ করেন, তিনিই ধন্ত, এবং যাহারা তাঁহাকে দেখিয়া তাঁহার হৃদয়-ভাব গ্রহণ করিতে সমর্থ, তাহারাও ধন্ত।

## ২। সদৃষ্টান্ত।

প্রত্যেক মনুষ্য-জীবন এক একটা প্রক্ষুটিত প্রস্থান স্বরূপ। চতুর সৃজন ঐ কুম্ভ হইতে কেবল মধু আহরণ করিয়া নিত্য চরিতার্থতা লাভ করে। কিন্তু সাধারণ মানব-প্রকৃতি পুরীবাসক গোবরিয়া পোকার প্রকৃতি সদৃশ। তাহার ভ্রমরতুল্য চতুরতা থাকিলে সে নিয়ত পুষ্পেরই সংস্পর্শে আসিত, এবং উহারই অমৃত গ্রহণ করিত।

লোকে কুদৃষ্টান্তের ভয়ে ভীত। বাল্য-প্রকৃতির পক্ষে ইহা ভয়ের কারণ বটে, কিন্তু অশ্বে কেন উহাতে আতঙ্কিত হইবে? প্রসিদ্ধ আছে যে, নৃত্যানভিজ্ঞ ব্যক্তিই প্রাক্কনের দোষারোপ করিয়া থাকে। বাস্তবিক মনুষ্য আপনার দোষেই নষ্ট হয়। প্রত্যেক দৃষ্টান্তই মানবের শিক্ষার ঞ্জ। যে ব্যক্তি কুদৃষ্টান্ত দর্শনে আপনি সতর্ক হয়, এবং তদ্বারা জ্ঞান লাভ করিয়া অপরকেও শিক্ষা প্রদান করে, সেই প্রকৃত চতুর। পাতিত ফাঁদ দর্শনে জ্ঞানহীন পশু-জাতিও তথা হইতে পলায়ন করে। মনুষ্য যদি প্রত্যেক জীবন-দর্শনে অভিজ্ঞতা লাভ করিতেই অসমর্থ হয়, তবে তাহার দূরদর্শিতাভিমান বৃথা এবং মূলহীন।

মানব! তুমি অল্পকরণ-প্রিয়। পরের পরিচ্ছদটা ভাল



## নীতি-প্রবন্ধ-মালা।

দেখিলে তদ্রূপ মিজের করিতে ইচ্ছা কর। হৃদয়ের সুন্দর পরিচ্ছদ-গুলি কেনই বা গ্রহণে তৎপর না হইবে? বিপণিতে দ্রব্য খরিদ করিতে হইলে ভাল ভাল সামগ্রীগুলি নির্বাচন করিয়া লও। হৃদয়-বাজারের উত্তম সামগ্রী-নিচয় কেনই বা না বাছিয়া আপনার করিবে। অল্পকরণের উৎকর্ষই মানব-জীবনের শ্রেষ্ঠতা সমুৎপন্ন হয়। যাহার জীবন-ভাণ্ডারে যাহা উৎকৃষ্ট দেখিবে, যদি তাহা গ্রহণ করিতে না পারিলে, ফলে তুমি কেবল আপনাকেই বঞ্চিত করিলে।

কথিত আছে, হংস নীর পরিত্যাগ করিয়া কেবল ক্ষীরই গ্রহণ করিয়া থাকে। সুশিক্ষিত মানসই সেই হংস। স্বীয় মনকে যদি ঐ ক্ষীরগ্রাহী হংস স্বরূপ করিতে না পার, সভ্য জীবনের প্লাবাই বৃথা। অজ্ঞান বহু জাতিরাই ত উৎকৃষ্টাপকৃষ্ট নির্বাচনে অপারগ। যদি তুমি তাহাদিগের হইতে পার্থক্য দেখাইতে না পারিলে, তবে তোমার জ্ঞানের গরিমা কোথায়? তোমার জীবনের উৎকর্ষই ভাবী সম্মান-সম্মতির আদর্শ। যদি প্রত্যেক জীবনের উৎকর্ষ আপনার জীবনের অংশীভূত করিতে না পারিলে, কেবল আপনিই যে মনুষ্য লাভে বঞ্চিত হইলে এমন নহে, ভবিষ্যতের চক্ষেও তুমি কলঙ্কিত হইলে।

উচ্চজীবন কি?—সকল উৎকর্ষের সমষ্টি। এই উচ্চ-জীবন লাভের ক্ষমতা প্রত্যেক মানবের হস্তে অর্পিত হই-  
রাছে। সেই ক্ষমতার সচ্যবহারই ঈশ্বর-প্রণোদিত কার্য; আর অপব্যবহারই আপন বিনাশের কারণ। যিনি আধ্যা-  
ত্মিকরূপে মহাপুরুষ-শোণিত-পান এবং মহাজন-মাংস ভোজন

দ্বারা আপন আত্মার পুষ্টিসাধনে ভগবদমুগ্ধ হ লাভ করিয়াছেন, তিনিই ধন্য।

### ৩। বৈরিতা।

অগ্নির দাহকতা এবং মনুষ্যের বৈরিতা উভয়ই সমান। পাবক অসাবধান ব্যক্তিকেই নষ্ট করে, অথবা তাহা তাহার গৃহাদি ভস্মীভূত করে। কিন্তু অগ্নিই মনুষ্যের জীবন; তদ্বারা জীবনের প্রধান কার্যই নিত্য সংসাধিত হয়। বৈরিতা দ্বারাও জীবনের উৎকর্ষ সমুৎপাদিত হইয়া থাকে।

ছায়াতে আঘাত করিলে দেহী যক্রপ আহত হয় না, তক্রপ বৈরিতার আঘাতে সদাশ্রম কখনও অনিষ্ট সংঘটিত হয় না। পাবকের সংস্পর্শে মূলধাতু উজ্জ্বলতাই ধারণ করে, এবং বিমিশ্র ধাতু কালিমা প্রাপ্ত হয়। বৈরিতার মধ্যে পতিত হইলে সদাশ্রম ও অসদাশ্রম ঠিক সেইরূপ অবস্থা।

সংসারে চিরশান্তির কখন সম্ভাবনা নাই। বৈরিতাচক্রে কখন না কখন তুমি অবশ্য নিপতিত হইবে। কুস্তকার নিজ চক্রে সাহায্যে সামান্য মৃৎপিণ্ডকে স্নদর্শন সামগ্রীতে পরিণত করে। তোমারও নিপুণতা থাকিলে বৈরিতাচক্রে তুমিও আপনাকে একটা স্নদর মূর্তিতে পরিবর্তিত করিতে পারিবে।

বৈরিতা জীবনের উৎকর্ষ সাধনের একটা প্রধান উপায়। যে ব্যক্তি বৈরাগ্নির মধ্যে হা হতোহস্মি বলিয়া চীৎকার না করিয়া তাহা হইতে আপন জীবন-সংস্কার সংসাধিত

করিয়া লয়, সেই ব্যক্তিই ধন্য। বৈরি যেই, এক পক্ষে প্রকৃত বন্ধু সেই। নিজের মুখের বিকৃতি তুমি দেখিবে না। তোমার সাধারণ বন্ধুও তোমাকে তাহা জানাইবে না। কিন্তু বৈরি দ্বারাই তুমি তাহা অবগত হইবে। বৈরিই তোমার গুরু-স্বরূপ হইয়া তোমার উদ্যমকে বর্ধনশীল রাখিবে, এবং তৎকর্তৃকই তোমার প্রকৃত উন্নতি সংসাধিত হইবে।

হয় ত “শঠে শাঠ্যং সমাচরেৎ” তোমার মানসিক প্রবৃত্তি হইবে। কিন্তু এ ভাব কদাচ হৃদয়-মধ্যে পোষণ করিবে না; কারণ, ঐ ভাব পোষণে তোমার আপন ইষ্টই নষ্ট হইবে। বৈরিতার মধ্যে যে সফল হস্তগত হইবার সম্ভাবনা ছিল, সম্ভবতঃ তোমার বৈরিই তাহা প্রাপ্ত হইবে। পরিণামে তোমার অধঃপতন দর্শনে তাহারই আনন্দ বর্দ্ধিত হইবে। ঈদৃশ অবস্থা কদাচ বাঞ্ছনীয় নহে। কোন পিতা আপন পুত্রকে বলিয়াছিলেন, “পুত্র! তুমি সকলেরই সহিত সদ্যবহার করিবে। এমন কি, যাহারা তোমার প্রতি অযথা ব্যবহারও করে, তাহাদিগেরও প্রতি তুমি ভদ্রতাচরণ করিবে, কেন না, তাহাদিগের প্রতি তোমার যে ভদ্রোচিত ব্যবহার, তাহারা ভদ্রলোক বলিয়া নহে, তুমি একজন ভদ্র বট।” বাস্তবিক বৈরিতা সম্বন্ধেও এইরূপ ব্যবহারই প্রশস্ত। অসরল বা কপট ব্যবহারে তোমার অন্তর ব্যথিত হইবে সন্দেহ নাই। কিন্তু সেই জন্ত তোমার অসরল বা কপট-চারী হওয়া উচিত নহে। ধোঁত বস্ত্র অণুরে পঙ্কিল করিল, কিন্তু তদদর্শনে তোমার শুভ্র হৃদয়-পরিচ্ছদ কেন তুমি দূষিত করিবে?

বৈরিতা-বিজয়ের প্রেমই মহামন্ত্র। এই প্রেমই মাধা-  
ইয়ের প্রবল শক্রতা চিরদিনের জন্ত পরাস্ত হইয়াছিল।  
ইহা কল্পনা-সম্মত আখ্যায়িকা নহে। প্রতি জীবনেই ইহা  
পরীক্ষার বিষয়। জলে অগ্নি নির্বাপিত হয়। প্রেমই  
বৈরাগ্নি নির্বাপনে সলিল স্বরূপ। মিষ্ট কথায় ছষ্টকে পরাস্ত  
করিতে কে না দেখিয়াছে? প্রেমে জগৎ পরাজিত, বৈরিতাও  
তাঁহাতেই পরাভূত। মস্ত্রে সর্প বশীভূত। বৈরীই সেই সর্প,  
এবং প্রেমই তাহার বশীকরণমন্ত্র।

ভ্রাতা তোমার প্রতি অসদ্ব্যবহার করিলেন, তুমি তাহাতে  
ক্ষুব্ধ হইলে। তুমিও শক্রতাচরণে প্রবৃত্ত; কিন্তু স্বরণ রাখিবে,  
তোমার ভ্রাতা আর ভগিনীর তুল্য তোমাকে সংসারে কে  
আর অধিক ভাল বাসিবে? তুমি স্নেহে অগ্ৰকে ভাই বা  
ভগিনী বলিয়া স্মৃষ্টি সন্মোদন করিয়া থাক, কিন্তু প্রাণের  
সোদর বা সহোদরাকে কেন ঐ মধুর সম্ভাষণে বঞ্চিত  
করিবে? ছন্দ পরিবর্জন করিয়া তক্রে ছন্দ-সাধ মিটাইবার  
অভিলাষ? কুত্রাপি ইহা ঘটতে পারে না। প্রেম দাও,  
প্রেম পাইবে। আপনাকে ঐ প্রেমের স্নকোমল রঙে  
রঞ্জিত করিলে, ভাই, ভগিনী এবং তৎসহ তাবৎ জগৎকে  
সেই রঙে অমুরঞ্জিত দেখিবে। সতের সংস্পর্শে সকলই  
সম্ভাব ধারণ করিবে। ঐ অবস্থায় অধিষ্ঠিত হইলে শক্রও  
শক্রতাচরণে লজ্জিত হইয়া তোমারই নিকট পরাভব স্বীকার  
করিবে।

বন্ধু বা বিশ্বস্তের বিশ্বাসঘাতকতায় হিংসা-প্রবৃত্তি উত্তে-  
জিত হইবার সম্ভাবনা বটে, কিন্তু যিনি সকল অবস্থাতেই

অপরকে প্রেম-বর্জিত দেখিলেও তাহাকে নিজ প্রেমদানে তুষিতে কাতর নহেন, তিনিই ধন্য। “মেরেচিন্ বেশ করেচিন্ একবার হরি বল” শত্রুর প্রতি হৃদয় যেন এই কথাই সর্বদা বলিতে পারে। জগতে এই শান্তিরাজ্যই উপস্থিত হউক। বিবাদ-বিসম্বাদ ঘুচাইয়া মনুষ্য নিত্যানন্দের উদার ব্যবহারে আপনাকে ও জগৎকে ধন্য করুক।

### ৪। পরোপকার।

ইহা মানব-জীবনের শ্রেষ্ঠব্রত। এই ব্রতে দাতা ও দানগ্রহীতার যুগপৎ আনন্দ। এইরূপ আনন্দ আর কিছুতেই উদ্ভূত হয় না। অপিচ, ঐ আনন্দই চিরস্থায়ী। সাধারণ দানে যে আনন্দ, তাহা সাময়িক। তুমি দানে ত কীর্তি-স্তুত স্থাপিত করিতে পারিবে না; দান-ছত্রও অধিষ্ঠিত করা তোমার ক্ষমতাধীন নহে। কিন্তু একটা উপকার দানে তোমার কীর্তিস্তুত স্বতঃই চিরদিনের জন্ত সংস্থাপিত হইল। কুতী যখনই তাহা দেখিবে, তাহার আনন্দ। উপকৃতও যখন ঐ কার্য স্মরণ করিবে, তখনই সে আনন্দ অনুভব করিবে।

এই উপকার-দান সকলেরই স্বায়ত্ত। ভগবান্ শ্রীরাম-চন্দ্র সেতু-বন্ধনে ক্ষুদ্র কাষ্ঠ-মার্জারের নিকট উপকার প্রাপ্ত হইয়াছিলেন। ইহা রূপক বা আখ্যায়িকা হইলেও, সংসারে অনেক সময়ে ক্ষুদ্র হইতেও মহত্বপকার সমুদ্ভূত হয়। তুমি ধনী নহ, যে সম্পত্তি দ্বারা কাহারও উপকার করিতে

ক্ষম ; কিন্তু ধন না থাকিলেই যে তুমি উপকার করিতে অসমর্থ একরূপ নহে, মনে করিলেই তোমার উপকার করিবার ক্ষমতা আছে। প্রত্যেক মনুষ্যের জীবনভার এবং জীবিকা অপর মনুষ্যের হস্তে হস্ত। মনুষ্য ঐ সম্বন্ধে পরের নিকট নিত্য উপকার পাইয়া থাকে, কিন্তু তাহা সে সর্বদা বুঝে না। পরন্তু সে তাহা না বুঝিলেও, যে ব্যক্তি অন্তঃকরণের সহিত তাহার উপকার করিল, সে আশ্ব-সন্তোষ লাভ করিয়াই কৃতার্থ হয়।

যেমন শর্করা সংযোগে ক্ষীরের অধিকতর মিষ্টতা, তদ্রূপ অন্তঃকরণের মিষ্টতায় উপকারের প্রকৃত মধুরতা। তুমি কাহারও উপকার করিলে ; কিন্তু তোমার হৃদয়ের কঠোরতা যদি তাহাতে সংস্পৃষ্ট হয়, তবে ক্ষীরে লবণ প্রদত্ত হইয়া মূল দ্রব্যটাই নষ্ট হইল। দুগ্ধপূর্ণ-কুন্ডে যেমন বিদু পরিমাণ গোমূত্র প্রদান বিজ্ঞের অসঙ্গত কার্য, পরোপকার নির্দয়তার দ্বারা দূষিত করাও তদ্রূপ। ক্ষমতা থাকিলে কোমলতার সহিত সরলান্তঃকরণে উপকার দান করিবে। যেখানে ক্ষমতা নাই, আশ্বাস দিবে না, এবং কঠিনতাও প্রকাশ করিবে না। কোন পণ্ডিত বলিয়াছেন, “সহৃদয়তার সহিত প্রার্থনা অগ্রাহ্য করাও একটা সহৃদয়তা।” এই সূত্রই তোমার বৈষয়িক উপকার প্রদানের নিয়ামক হউক।

যেখানে ক্ষমতার প্রতি আশ্ব-নির্ভর নাই, প্রার্থীকে নিজ ক্ষমতা জানিতে দিবে না। বিনাড়ম্বরে কার্য-সিদ্ধ হইলেই তোমার ক্ষমতা প্রকাশ হইবে। পুনশ্চ, তোমার ক্ষমতার প্রতি আশ্ব-বিশ্বাস অথবা নির্ভর থাকিলেও, প্রার্থীকে তাহা

জানাইবে না। কারণ, উহার পরিচয় পাইলে সেই ব্যক্তি আশাতীত আশা করিবে, এবং তাহার আশা পূর্ণ করিলেও সে পূর্ণমনস্কাম হইবে না।

আত্ম-গরিমা সর্বত্রই বিনাশের মূল। উপকার করিয়া আত্ম-গৌরব প্রচার করিবে না। রাজা হরিশ্চন্দ্রের শূণ্ণে স্থিতি, ইহা কেবল আখ্যায়িকা নহে। ইহা অধ্যাত্ম-জগতের আত্ম-গরিমা বিষয়কলের একটা মনোহর উদাহরণ। উপকারে আত্ম-গৌরব প্রচারে তোমারও শূণ্ণে স্থিতি হইবে। তোমা কর্তৃক নিজের বা জগতের আর কোন উপকার সংসাধিত হইবে না। “যাহা দক্ষিণ হস্ত করিবে, তাহা বাম হস্তকে জানিতে দিবে না;” ইহাই উপকারের বীজমন্ত্র। এক হস্তের চালনা হইলে, পরে স্বভাবতই অপর হস্তের পরিচালনা হইবে। ছয়েরই যুগপৎ পরিচালনায় তুমি সহজে শীঘ্রই ক্লাস্ত হইয়া পড়িবে; অসময়েই ক্ষমতা-বিহীন হইবে; তোমা কর্তৃক দ্বিতীয় কার্য সংসাধিত হওয়া অসম্ভব হইবে। দৈহিক হস্তাদি-পরিচালনের যে নিয়ম, মানসিক বৃত্তিনিচয় পরিচালন সম্বন্ধেও সেই নিয়ম। জগৎকে আত্মবৎ জ্ঞান করিবে। তাহাতে জগৎ যেমন তোমার আত্মীয় হইবে, তুমিও জগতের তদ্রূপ হইবে।

উপকার-করণের ক্ষমতা না থাকিলে অপকরণ-প্রবৃত্তি কদাচ উত্তেজিত করিবে না। দুর্বলচিত্ত ব্যক্তিগণের এইরূপ প্রকৃতিই ঘটনা থাকে। এবম্বিধ দুর্বলতা হইতে আপনাদিগকে রক্ষা করিবার জন্ত তাহাদিগের সর্বদা সাবধান থাকা নিতান্ত প্রয়োজন। অপকারীর পারিশ্রমিক পুরস্কার

নাই, স্মৃতরাং তাহার দুষ্ট পরিশ্রম কেবল পশুশ্রমই হইবে। লাভের মধ্যে সে জগতের আশীর্বাদ হইতে বঞ্চিত হইবে। পুনশ্চ, কর্তব্য পালনে কার্য্য-ফলাফলের দিকে দৃষ্টি রাখিবে না; অথবা কাল্পনিক সহৃদয়তার দ্বারাও পরিচালিত হইবে না। ঈশ্বরে কার্য্য-ফলভার শ্রুত রাখিলে সকল বিপদ হইতে বিমুক্ত থাকিবে।

## ৫। যথার্থ স্মৃতি কে ?

যাহার আশা বা নিরাশা নাই, সেই যথার্থ স্মৃতি। ধন আশাকে বর্জনশীল রাখে, এই জন্ত স্মৃতি আনয়ন করে; ধন স্মৃতির কারণ বলিয়া আখ্যাত হয়। বাস্তবিক মূল দেখিতে গেলে তাহা নহে। যাহার ধন ছিল না, সে ধনের আগমনে যে স্মৃতির আশা করিয়াছিল, তাহা তাহার জীবনে কদাচও ঘটিল না। কিন্তু সে তথাচ অস্মৃতিও না হইতে পারে। নিরাশা দ্বারা আক্রান্ত না হওয়া পর্য্যন্ত সে পূর্ব্ববৎই থাকিবে। কিন্তু যে দিন ঐ নিরাশাকার তাহার হৃদয়মধ্যে উপস্থিত হইবে, অমনি দেখিবে তাহার তুল্য অস্মৃতি আর সংসারে নাই।

ধনের অপগম মনুষ্যকে নিরাশ করে, এই জন্ত অস্মৃতি আনয়ন করে। উদাসীনের স্মৃতিস্মৃতি নাই। তিনি ধনস্পৃহা বা ধনাপগমের নিরাশা দ্বারা কখনও আক্রান্ত নহেন।

যেই নিকাম, সেই নিত্যানন্দ। মাতৃস্নেহ নিকাম; সেই জন্ত পুত্রকে দেখিলেই মাতার এত আনন্দ। যেখানে



স্নেহের বিনিময় প্রত্যাশা, সেইখানেই নিরানন্দের মূল নিহিত। যাহারা পৃথিবীতে স্বর্গরাজ্য স্থাপন করিতে আসিয়া-  
ছিলেন, তাঁহাদিগের আনন্দ কে বুঝিবে? সেই উদারচেতা  
কামন-বিরহিত মহাপুরুষেরা কখনও সংসারের দুঃখে নিপী-  
ড়িত হন নাই।

শিশুর স্নেহ অকৃত্রিম, আনন্দও অকৃত্রিম। তাহার মনে  
বিনিময়ের ভাব বা আশা-নিরাশার ভাব সেই কাল পর্য্যন্ত  
উপস্থিত হয় নাই। সে দেখে, মাতার স্নেহ অকৃত্রিম,  
হাস্তও অকৃত্রিম; নিজে সেই জন্তু কাহাকে শত্রু-মিত্র ভাবে  
না; সকলকে দেখিলেই হাসে। যখন সে স্নেহের বিনিময়ে  
স্নেহ প্রত্যাশা করিতে শিখিল, সেই সময় হইতে কুটিলতা  
তাহার হৃদয়কে আক্রমণ করিতে আরম্ভ করিল। অমনি  
তাহার শত্রু-মিত্র ভেদাভেদ জ্ঞান উপস্থিত হইল। সঙ্গে  
সঙ্গে শিশু স্নেহের স্থলে দুঃখ অনুভব করিতে শিখিল।  
আহ! বালকের স্বাভাবিক সরল প্রকৃতি, তৎপর তাহার  
কুশিক্ষা-জনিত কুটিল ভাব, এই অবস্থাস্থয়ের কি প্রভেদ!  
এই জন্যই বাইবেলে কথিত হইয়াছে “বালাস্তঃকরণদিগেরই  
স্বর্গরাজ্য।”

বর্তমানাবস্থায় সস্তুষ্ট ব্যক্তিই যথার্থ স্নেহী। কিন্তু সংসারে  
এই লোকের সংখ্যা অতি অল্প। রাসেলাসের মত মনুষ্য ভাবে  
বর্তমানাবস্থা হইতে উত্তীর্ণ হইতে পারিলেই স্নেহে অবস্থিত  
হইবে। হয় ত সে যে অবস্থার কামনা করিতেছিল,  
তাহাই তাহার উপস্থিত হইল। কিন্তু সে যে সেই, বরং  
অপেক্ষাকৃত দুঃখী দৃষ্ট হইল। সমস্ত অবস্থাই মনুষ্যের

মঙ্গলের জন্ম এবং অমঙ্গল কিছুই নাই ইহা যে বুঝিয়াছে, সেই প্রকৃত স্ত্রী।

## ৬। স্ত্রী।

পরিণীতা রমণী স্বামীর কেন প্রশয়িনী? বাহার সহিত তাহার কোনই সংস্রব ছিল না, এমন কি বাহার পিতা মাতা বা কোন আত্মীয় স্বজনকেও সে কখনও চিনিত না, সেই কামিনী কি জন্ম তাহার এত স্নেহের পাত্রী হইল? পরস্পর আত্মসমর্পণই ইহার মূল কারণ। যেখানে পরস্পরের প্রতি পরস্পরের সহানুভূতি নাই, সেখানে প্রেমও নাই। এই কারণেই কোন কোন ললনা স্বামী কর্তৃক পরিত্যক্ত হইয়া দুঃখিনী হয়। আবার কত পুরুষও স্ত্রীর অনাদরে সংসারকে বিষতুল্য দৃষ্টি করে। যে স্ত্রী বা পুরুষ স্বার্থশূন্য হইয়া আপন প্রশয়ের সামগ্রীতে আত্মসমর্পণ করিতে শিক্ষা করিয়াছে, সেই প্রশয়ের ভাজন হইয়া স্ত্রী হইয়াছে। বাল্য-বিবাহ আপাততঃ অপর কারণে দূষণীয় হইলেও তাহাতে স্বামী-স্ত্রীতে প্রশয়ের বীজ প্রথম হইতেই বেরূপ নিহিত হয়, কৌমার বিবাহে সাধারণতঃ তদ্রূপ হইবার সম্ভাবনা নাই। বালক ও বালিকা বিবাহকালে কেহ স্বাধীন হইতে পারে নাই; উভয়ে স্ব স্ব জীবিকার জন্মও স্বীয় অভিভাবক বা কর্তৃপক্ষগণের সম্পূর্ণ মুখাপেক্ষী। বিবাহান্তে কত্মা স্বস্তুরালায়ে আসিল; দেখিল, সেও বেরূপ পরাধীন, তাহার স্বামীও তদ্রূপ পরাধীন। ছই জনেরই অবস্থার সাম্য

হেতু স্বভাবতঃ পরস্পরের প্রতি ক্রমশঃ সহানুভূতি জন্মিতে থাকে। একবার সেই ভাব দৃঢ়মূল হইলে তাহা অবিচলনীয় হইল। অনন্তর স্বামী উপায়ী হইয়া স্বাধীন হইলে, স্ত্রীও গৃহিণী হইয়া স্বাধীনতা প্রাপ্ত হইল। উভয়ের বয়োবৃদ্ধির সহিত পরস্পরের প্রণয়ানুরাগও বৃদ্ধি পাইতে লাগিল। সেই জন্ম বহু কষ্টের মধ্যেও বহুল হিন্দু পরিবার স্মৃথী পরিবার। আবার সেই পরিবারের মধ্যে যখন পরস্পরের প্রতি সহানুভূতির হ্রাস হইয়াছে, তখন প্রণয়েরও হ্রাস হইয়া সেই গৃহ শ্মশান তুল্য হইয়াছে। ভালবাসা পাইতে ইচ্ছা করিলে কখনও বিনিময়ের জন্ম অপেক্ষা করিবে না। মাতা পুত্রস্নেহের বিনিময়ের আশা করেন না, তজ্জন্মই তাঁহার স্নেহ স্বর্গীয়। যেখানে পরস্পরের মধ্যে বিনিময়ের প্রত্যাশা নাই, অথচ পরস্পর পরস্পরকে স্নেহ করিতেছে, সেই স্নেহই প্রকৃত নিঃস্বার্থ ও অকৃত্রিম। যতদিন ঐ ভাব থাকিবে, তথায় বিচ্ছেদ নাই। ভাবান্তর হইলেই ঈর্ষা-বিরাগাদি বিচ্ছেদ-প্রবর্তক রিপূর প্রাবল্য হইবে। তদনন্তর তথায় উভয়ের বিনাশই অবশ্যস্তাবী।

স্ত্রীর প্রণয় হইতে জগৎকে প্রেম করিতে শিক্ষা কর। মানব-হৃদয় যে পরকে নিঃস্বার্থভাবে প্রেম করিতে সমর্থ, দাম্পত্য-প্রণয়ই তাহার প্রমাণ স্থল। তবে পরস্পরের মধ্যে অপ্রণয় কেন? সাংসারিক স্বার্থপরতাই তাহার মূল। ঐ স্বার্থবিনাশই পরম স্মৃথ।



## ৭ । স্বার্থপরতা ।

যথার্থ স্বার্থ কি ? মনুষ্য অনেক সময়ে ইহা না বুঝিয়া আপনাকে অনর্থক অপরের দৃষ্টিতে কলঙ্কিতরূপে প্রতিভাত করে। যে ব্যক্তি স্বার্থের প্রকৃত অর্থ বুঝিয়াছে, সেই যথার্থ ধীমান্ এবং স্মৃধী। প্রকৃত স্বার্থপরতাই স্বার্থশূন্যতা। সাধারণতঃ যাহা স্বার্থপরতা নামে অভিহিত, তাহা স্বার্থান্ধতা। তুমি নিজে পরিষ্কৃত বা সংস্কৃত জলপান করিয়া স্বাস্থ্য রক্ষা করিতেছ। তোমার প্রতিবেশী পঙ্কিল ও অপরিষ্কৃত সলিলেই তৃষ্ণা নিবারণ করিতেছে। ভাবিতেছ, আশ্রয়রক্ষাতেই জগৎ রক্ষা; কিন্তু ভাব নাই, কোন্ দিন সেই প্রতিবেশীই সেই পঙ্কিল-জল-পান-জনিত রোগের দ্বারা তোমারই গৃহে মৃত্যু আনয়ন করিবে। তোমার যথার্থ স্বার্থ কি ? যাহাতে সেই ব্যক্তি তোমার মত পরিষ্কার জলপান দ্বারা নিজ স্বাস্থ্যরক্ষা করিতে পারে, পূর্বে হইতে তাহার চেষ্টা করাই প্রকৃত স্বার্থ। যদি তাহা না করিয়া থাক, এতদিন স্বার্থান্ধ হইয়া রহিয়াছিলে, যথার্থ স্বার্থের অর্থ বুঝিতে পার নাই।

স্বার্থান্ধতা মোচনই সংসারীর বৈরাগ্য। এই বৈরাগ্যই অবলম্বন করিবে। মনুষ্যজীবনের শ্রেষ্ঠত্ব ইহাতেই প্রতিপাদিত হইবে।

বালাবস্থা হইতেই যথার্থ স্বার্থ বুঝিতে শিক্ষা কর। এই মূলমন্ত্রের অনভিজ্ঞতাই সংসারীর তাবৎ দুঃখের মূল। পরোপকার অভ্যাস করিলেই নিজোপকার আপনিই শিক্ষা হইবে। চিকিৎসক স্বীয় অর্ধোপায় জন্ত অপরের চিকিৎসা

করেন, কিন্তু পরের স্বাস্থ্য দেখিতে গিয়া, সময়ে তিনি আপনার স্বাস্থ্যের প্রতি স্বভাবতই যত্নশীল হইয়া উঠেন। আশ্চর্য্যকরভাবে জগৎ রক্ষা শুনিয়াছিলে, এখন দেখ, জগৎ-রক্ষাতেই আশ্চর্য্যকর।

### ৮। বন্ধুতা।

আখ্যানিকারে দুইটি বন্ধুর কথা উল্লিখিত আছে। কোন দিন উহাদের মধ্যে একজন অপরের দ্বারে গিয়া আঘাত করিলেন। আঘাতের শব্দ শুনিয়া গৃহাভ্যন্তর হইতে বন্ধু কহিলেন, ‘দ্বারে কে?’ অভ্যাগত ব্যক্তি উত্তর করিলেন, ‘আমি আসিয়াছি।’ তাহাতে গৃহস্থ বলিলেন, ‘চলিয়া যাও’ সময় হয় নাই, এইরূপ ভোজ্যপাত্রের অপরিপক্ক লোকের অধিকার নাই। অপরিপক্ককে বিচ্ছেদানলে দণ্ড হওয়া আবশ্যিক, তাহা হইলে সে পরিপক্ক হইয়া দৈতভাব হইতে মুক্ত হইবে। যখন স্বাস্থ্য তোমা হইতে এখনও বিদূরিত হয় নাই, তখন সস্তাপানলে দণ্ড হওয়া তোমার পক্ষে প্রয়োজন।’ এই কথা শুনিয়া দুঃখী আগন্তুক চলিয়া গেলেন। এক বৎসর বিদেশে থাকিয়া বন্ধুর বিচ্ছেদানলে দণ্ড হইলেন, দণ্ড হইয়া সাধন করিয়া পরিপক্কতা লাভ করিলেন। অনন্তর বন্ধুর আলয়ে প্রত্যাগত হইলেন এবং ভয় ও বিনয় সহকারে দ্বারে আঘাত করিলেন। গৃহস্থানী জিজ্ঞাসা করিলেন, ‘কে দ্বারে উপস্থিত?’ আগন্তুক বলিলেন, ‘প্রেমাস্পদ তুমিই দ্বারে আছ।’ ”

উপরোক্ত আখ্যায়িকার তাৎপর্য্য এই যে, ছুইয়ের এক দ্ব না হইলে প্রকৃত বন্ধুত্ব হয় না। যেখানে স্ত্রী স্বামীর বাস্তবিক শরীরাত্ম নহে, সেখানে উহারা তদবধি পরস্পরের প্রকৃত বন্ধুত্ব লাভে বঞ্চিত রহিয়াছেন। ছুইয়ের মধ্যে আমিত্ব বিনাশই প্রকৃত বন্ধুত্বের ভিত্তি-ভূমি। যেখানে সাংসারিক স্বার্থপরতা বন্ধুতার মূল, সেই বন্ধুতা অবশ্যই ক্ষণবিক্ষয়সী। বন্ধুতা প্রাপণেচ্ছু হইলে স্বার্থশূন্য হইয়া গমন করিবে। কারণ ঐ স্বার্থকে সঙ্গে লইয়া চলিলে বাহ্য পাইবার জন্ত যাইতেছ, তাহাই হারাইবে।

ধর্ম্মবন্ধনই বন্ধুতার প্রকৃত বন্ধন। আবার সেখানে অধর্ম্ম প্রবেশ করিলেই বিচ্ছেদ অবশ্যস্তাবী। এই জন্ত উন্নত সম্প্রদায়-ভুক্ত ব্যক্তিগণও পরস্পর ধর্ম্মগ্রন্থিতে বদ্ধ হইয়া পরে বিচ্ছিন্ন হইতে দৃষ্ট হয়। যদি বন্ধুত্বকে চিরস্থায়ী করিতে ইচ্ছা কর, আমিত্ব সমূলে উচ্ছেদ করিয়া পরস্পরের মধ্যে কেবল ঈশ্বরকেই একমাত্র লক্ষ্য রাখিবে।

বন্ধুতা দর্শনমাত্রই অধিষ্ঠিত হইবার বস্তু নহে। স্তম্ভ বন্ধুতা বর্ষার জল। ইহা বাপীর মধ্যে তিষ্ঠিতে পারে, কিন্তু সাধারণ ভূমিতে উহা কখনই অবস্থিত হইতে পারে না। ছুই গভীর হৃদয়ে দর্শন-জনিত সম্মিলন চিরস্থায়ী হইতে পারে, কিন্তু সাধারণতঃ বন্ধুতা সময়-সাপেক্ষ সামগ্রী। ছুইটা হৃদয় পরস্পর মিলনাকাজক্ষী হইলে, একে অপরকে পূর্ণ পরীক্ষা করিয়া পরে পরস্পরকে আলিঙ্গন করিবে। ততদিন পর্য্যন্ত প্রকাণ্ডভাবে এক অপর হৃদয়কে বন্ধুত্ব বরণ করে নাই, ততদিন সে তাহাকে বন্ধুত্ব গ্রহণ করিমাছে

বলিয়া যেন জানিতে না দেয়। অত্যাধা, পরে উভয়েই পরীক্ষায় বিবাদ প্রাপ্ত হইবে। স্বরিতজাত বন্ধুতা শেবে বিরক্তিতেই পরিসমাপ্ত হইয়া থাকে।

প্রকৃত বন্ধুতায়ই দেবত্বের আবির্ভাব। তথায় পরস্পর-মধ্যে ভেদজ্ঞান থাকে না। পুনশ্চ, সেইখানে ভেদজ্ঞান উপস্থিত হইলেই বিচ্ছেদ নিশ্চয়। যিনি বন্ধু তিনি সর্বদা পূজ্য এবং স্মরণীয়। বন্ধুতা অবিচলিত রাখিতে হইলে হৃদয়ে বন্ধু পূজা বা বান্ধবাভিবাদন নিত্য প্রয়োজন। তাহা হইলে উভয়ের মধ্যে কখনই বিচ্ছেদ উপস্থিত হইতে পারিবে না। তুই আত্মার প্রকৃত যোগ ইহাতেই সংঘটিত হইবে। ঐ যোগ শিক্ষা কর, পৃথিবীই তোমার নিকট স্বর্গ তুল্য হইবে। মহাত্মারা এই যোগবলেই আপন সঙ্গীবর্গকে আত্ম-মধ্যে চিরযুক্ত দেখিয়াছেন এবং প্রত্যেকের মধ্যে অভেদাত্মা-দর্শন-জন্য জগৎকে শিক্ষা প্রদান করিয়াছেন।

## ৯। পরিশ্রম।

অপেক্ষাকৃত কিছু অতিরিক্ত পরিশ্রমে, হৃদয়ে স্বভাবতই বিরক্তির উদ্বেক হয়। কিন্তু উচিত সময়ে পরিশ্রম না করিলে পরিণামে আক্ষেপই উপজাত হয়। সকলে প্রতিভা-সম্পন্ন হওয়ার সম্ভাবনা নাই। ঐ বিষয়ে যাহাদিগের অভাব, পরিশ্রম দ্বারা সেই অভাব তাহাদিগের নিজ ও সাধারণ সম্বন্ধে পূরণ হইয়া থাকে। পরিশ্রমই বুদ্ধির জনক। পরিশ্রম দ্বারা যাহার বুদ্ধির প্রথরতা উৎপাদিত না হইল,

অনান সে যে পরিশ্রমী, তাহার ঐ প্রতিপত্তিও লাভ হইল।

তুমি স্বীয় প্রভুর কার্য্য সম্ভাবজনকরূপে নির্বাহ করিতে সক্ষম নহ, কিন্তু যদি তোমার প্রভু জানেন যে, প্রকৃত অধাবসায় সহ তুমি তাঁহার কার্য্য নিষ্পাদনে চেষ্টিত, অবশ্যই তাহাই তাঁহার সম্ভাষের কারণ হইবে। অথবা তুমি কোন কার্য্য নিজ অজ্ঞানতা-হেতু ঘরিত সম্পাদনে পরাজুখ। যদি তুমি পরিশ্রমী বলিয়া পরিচিত থাক, সেই কার্য্য বহুবিলম্বে সম্পাদিত হইলেও তোমার জ্ঞানাপ্রচুরতা-নিবন্ধন কার্য্য-শৈথিল্য-দোষ তোমাতে আরোপিত হইবে না।

সুনাম লাভ করিবার পরিশ্রমই একমাত্র উপায়। যৌবনে যতদিন সামর্থ্য আছে, পরিশ্রম করিতে বিমুখ হইও না। পরিশ্রমী বলিয়া তোমার নাম প্রতিষ্ঠিত হইলে, অক্ষমতার কালে পরিশ্রম-বিমুখতার জন্ত তুমি অপরাধী স্থিরীকৃত হইবে না। পুনশ্চ, সময়ে পরিশ্রম না করিলে অসময়ে পরিশ্রমের কারণ উপস্থিত হয়, তজ্জন্ত বিষম বিপদে পড়িবে।

যৌবনকালে সহজেই সকল বিষয়ে শীঘ্র বিরক্তি উদ্ভে-  
জিত হয়। তুমি কার্য্যক্ষম; তোমার প্রভু একটীর উপর আর একটা কার্য্যভার তোমার প্রতি অর্পণ করিলেন। তুমি উভয়টাই সম্পাদন করিলে, কিন্তু অসম্ভাষের সহিত তাহা সম্পাদিত হইল। যাঁহার কার্য্য, তাঁহার ত একরূপ তাহা সম্পন্ন হইল, কিন্তু তোমার তাহাতে লাভের অংশ কম হইল। কার্য্যেই নৈপুণ্যের উৎপত্তি। অসম্ভাষে যাহা সম্পাদন করিলে তুমি অধিকতর নিপুণতা লাভ করিতে,



বিরক্তি সহকারে তাহা সম্পাদিত হওয়ায় তুমি সেই লাভ হইতে বঞ্চিত হইলে।

কার্য উপস্থিত হইলে কখন শৈথিল্য করিবে না। শৈথিল্যাবলম্বনে তোমারই শিথিল স্বভাব সঞ্জাত হইবে। তদনন্তর, কালে তোমার পক্ষে কার্যে একেবারে অক্ষম হইয়া পড়া বিচিত্র নহে। যে কার্যই তোমার হস্তে গ্ৰস্ত হয়, তাহা পূর্ণান্তঃকরণে সম্পাদন করিবে। প্রত্যেক কার্য-কেই তোমার শিক্ষার কারণ স্বরূপ করিবে, এবং তাহা করিলে প্রত্যেক কার্য হইতেই তোমার শিক্ষা লাভ হইবে।

জাত-বুদ্ধি বলিয়া যাহা শ্রুত হও, অনেক সময়েই তাহা পরিশ্রম-লব্ধ-বুদ্ধি। এই বুদ্ধিলাভ সকলেরই আয়ত্ত। একা-গ্রতাসহ যে কোন কার্যে তুমি ব্রতী থাকিবে, তাহাতেই তুমি নৈপুণ্য-লাভে সক্ষম হইবে। সে নৈপুণ্য সর্বোৎকৃষ্ট না হইলেও তুমি কশ্মিষ্ঠ বলিয়া প্রতিপত্তি লাভ করিবে।

পরিশ্রম-বিমুখ ব্যক্তিই জগতে ঘূণার্থী। ভিক্ষাবৃত্তিই তাহার জীবিকা। ঈদৃশ ব্যক্তিগণের মধ্যে যাহাদিগের ধনা-ভাব, বাস্তবিক ভিক্ষা ভিন্ন তাহাদিগের উপায়ান্তর নাই; এবং যাহারা অর্থবান্, সম্পত্তি-সত্ত্বেও তাহারা যাচক। প্রত্যেক কার্যের জন্ত তাহাদিগের অপরের উপর নির্ভর; অন্তের দয়াতেই তাহাদিগের জীবন রক্ষণ। জগতে যদি মর্যাদাবান্ হইতে চাহ, কখনও পরিশ্রমে বিমুখ হইও না। নিয়মিত পরিশ্রম যেমন স্বাস্থ্য ও পরমাবৃদ্ধক, তেমনি উহা মর্যাদা-বর্দ্ধকও জানিবে।



প্রতিজ্ঞা। ১:৩২০  
Acc ২২০৬৮<sup>২১</sup>  
০২/১/০৬

১০। প্রতিজ্ঞা।

প্রচলিত কথায় মনুষ্যের বাক্য হস্তি-দন্ত সহ উপমিত হইয়াছে। কিন্তু হস্তি-শুণ্ডের সহিত মনুষ্য-বাক্যের তুলনা হয় নাই। বাস্তবিক, মনুষ্যের বাক্য হস্তিদন্তই বটে। হস্তীর বল শুণ্ডে, কিন্তু মূল্য দস্তে। শুণ্ডবৎ বাক্য ইত-স্ততঃ বিক্ষেপের বিষয় হইলে, সেই শুণ্ডের সহিত বাক্যের উপমা হওয়াই উপযুক্ত ছিল। দন্ত কঠিন ও ভারযুক্ত, বাক্যও তদ্রূপ। যে বাক্য উচ্চারিত হইবে, তাহা নড়িবে না, ইহাতেই তোমার গুরুত্বের পরিমাণ হইবে। বাক্যকে অটল করিলে তোমার বিপদ আছে সন্দেহ নাই; কিন্তু তাহা বলিয়া তুমি চপলস্বভাব হইবে না। কারণ চঞ্চলস্বভাব হইলে, কেবল যে তুমি অপরের নিকট ঘণারপাত্র হইবে তাহা নহে, তোমারও নিজের আত্মনির্ভর ক্রমশঃ হ্রাস হইয়া যাইবে। চপল ব্যক্তি নিয়তই অস্থির। স্থিরতাই বৈষয়িক উন্নতির মূল কারণ। কথার অস্থিরতা না থাকিলে কার্যেও অস্থিরতা থাকিবে না। নিতাই তুমি নূতন লোক ও অব্যবস্থিত-চিন্তারূপে পরিলক্ষিত হইবে।

পরন্তু, প্রতিজ্ঞায়ও সদসৎ আছে। যাহা সৎ, তাহা অদ্যও অখণ্ড, কল্যাণ অখণ্ড থাকিবে। অসৎ প্রতিজ্ঞা সদযুক্তির দ্বারা খণ্ডিত হইলে, তাহার খণ্ডনে সঙ্কুচিত হইবে না। প্রতিজ্ঞার পূর্বে স্থিরভাবে কার্যের সদসৎ বিবেচনা করিবে। পরে যাহা সত্য, স্থির সিদ্ধান্ত হইবে, তাহাই অবলম্বন করিবে। সত্য প্রতিজ্ঞায় চ্যুতি যেন কখন না হয়।

এ বিষয়ে কবির বীরবাক্য যেন তোমারই নিজ বাক্য হইতে পারে, যথা—

“ উদয়তি যদি ভানুঃ পশ্চিমে দিগ্বিভাগে  
বিকনতি যদি পদ্মং পর্কতানাং শিখাগ্রে ।  
প্রচলতি যদি মেরুঃ শীততাং যাতি বহ্নি-  
র্ন চলতি খলু বাক্যং সজ্জনানাং কদাচিৎ ॥”

ইহা দৃঢ় প্রতিজ্ঞের চরম দৃষ্টান্ত। মানবের সর্বদা এই দৃষ্টান্তানুসারে চলা স্কন্ধিন; কিন্তু সংপ্রতিজ্ঞা হইলে এই ভাবেই তাহা অবশ্য রক্ষণীয়।

হঠাৎ কোন বিষয়ে কখন প্রতিজ্ঞারূঢ় হইবে না। অস্বারোহণানভিজ্ঞ অস্বারোহীর যেরূপ হৃদশা, ঝাটতি প্রতিজ্ঞারূঢ় ব্যক্তির অবস্থাও ঠিক সেইরূপ। যে কার্য্য করণাকরণ তোমার আয়ত্ত নহে, তাহাতে কখনই প্রতিজ্ঞাবদ্ধ হইবে না। কারণ, কার্য্য সম্পন্ন হইলে যে ব্যক্তি ফলভোগী তাহার উপকার হইল; কিন্তু তাহা তোমা কর্তৃক সম্পাদিত না হইলে, তুমি যে কেবল অপরকে নিরাশাগ্রস্ত করিলে তাহা নহে, নিজেও প্রতিজ্ঞাভঙ্গাপরাধে অপরাধী হইলে। আয়ত্ত বিষয়ে প্রকাশ্যভাবে পার্য্যমাণে বাক্যাবদ্ধ হইবে না; হইলেও সত্য-বিষয়-সম্বন্ধে নিজ সর্বনাশেও তুমি স্থলিত-পদ হইবে না।

স্ব স্ব প্রতিজ্ঞা-পালন-দৃঢ়তায়ই প্রত্যেক জীবনের উন্নতি। যে, যে পরিমাণে স্থিরচিত্ত, তাহার বাক্যও সেই পরিমাণে

স্থির। তাহার উন্নতিও তৎপরিমাণে নিশ্চিত। “মস্তকের সাধন কিম্বা শরীর পতন” ইহা স্থিরপ্রতিজ্ঞেরই কথা। সময়ে অবশ্যই ঐরূপ ব্যক্তির মস্ত সাধিত হয়।

প্রতিজ্ঞা-পালন-দৃঢ়তায় যেমন প্রত্যেক মানবের উন্নতি, ঐ প্রকৃতির উপরই প্রত্যেক সমাজের উন্নতি এবং জাতীয় উন্নতি নির্ভর করে। সমাজ বা জাতি গঠন করিতে হইলে, প্রতিজ্ঞার দৃঢ়তা-বন্ধন সর্ব্বাঙ্গেই প্রয়োজন ও তাহা কর্তব্য। প্রত্যেকের দৃঢ়তা না থাকিলে সমাজের দৃঢ়তা থাকিবে না; জাতীয় দৃঢ়তা ত দূরের কথা।

জীবনকে উন্নত করিতে হইলে বাক্য অটল করিবে, এবং বাক্য অটল করিতে হইলে তুমি একজন স্থিরব্রতী\* হইবে। তোমার জীবন-নিয়ামক† ভিন্ন ভিন্ন হইলে, তুমি সংসার-ঝটিকার মধ্যে তুলাখণ্ড সদৃশ ইতস্ততঃ বিক্ষিপ্ত হইতে থাকিবে। তাহাতে আপনারই নিকট তুমি হেয়রূপে পরিচিত হইবে। অপিচ, একব্রতাবলম্বী না হইলে তুমি অবশ্যই কপটাচারী হইবে; অন্য উদারচেতা সংস্কারক, কল্যাণ সংসারকীট স্বরূপে পরিলক্ষিত হইবে। স্থিরব্রতী ও স্থিরপ্রতিজ্ঞ হও, সংসার তোমার অধিকৃত হইবে এবং তুমি প্রকৃত প্রতিপত্তিলাভ করিয়া কৃতার্থ হইবে।

---

\* A man of fixed principle.

† Principle of life.

## ১১। ক্রোধ ।

ক্রোধ মনুষ্য-স্বভাবে প্রতিষ্ঠিত। ইহা একেবারে পরিহার্য্য নহে; ইহার অপব্যবহারই পরিহার্য্য। সাংসারিকতায় যে ক্রোধের উৎপত্তি, তাহাই দূষণীয়। তাহার মূলে অভিমান অথবা অহঙ্কার। অভিমান-জাত ক্রোধের পরিণাম-ফল মহাভীষণ। আত্মহত্যাাদি ইহা হইতেই উৎপন্ন। নিম্নস্থের প্রতি উচ্চের ক্রোধ স্বতন্ত্র, তাহা পরঘাতক। পুনশ্চ, এই দুই প্রকার ক্রোধমধ্যে এক অপরে পরিণত হইলে উহা বিপরীত কার্য্যে অবদান হয়। স্ত্রী স্বামীর প্রতি প্রথমে অভিমানিনী হয়। তৎপর তাহার অভিমান, ক্রোধের আকার ধারণ করিলে তাহার হিংসা-প্রবৃত্তি উত্তেজিত হয়। স্ত্রী কর্তৃক স্বামীর লাঞ্ছনার মূলে, এই ক্রোধই অবস্থিত দেখিবে।

পুনশ্চ, অহঙ্কার-জাত ক্রোধ অভিমানের আকার ধারণ করিলে, তাহা সেই অভিমানেরই বিনাশের হেতু হয়। অন্যান্য তাহা তাহার চির অশান্তির বা সাময়িক অতি ভীষণ মনোপীড়ার কারণ হয়।

উভয়বিধ ক্রোধ সংহারের একই উপায়। কোন পণ্ডিত কহিয়াছেন, হঠাৎ ক্রোধ উপস্থিত হইলে তৎকালে মনে মনে আপন বর্ণমালা আবৃত্তি করিবে। ইহাতে ক্রোধের সাময়িক উপশম হইতে পারে সন্দেহ নাই, কিন্তু একেবারে তাহাতে ছুষ্ট ক্রোধ নিঃশেষিত হয় না। সেব্য-সেবকের ভাব হৃদয়-মধ্যেই বদ্ধমূল করিতে পারিলেই ক্রোধকে একে-

বারে পরাজিত করিতে পারিবে। প্রভুর প্রতি প্রকৃত-দাসের ক্রোধ কোথায়? অস্ত্রের সম্বন্ধে নিজ হৃদয়ে সেবকত্ব ভাব পরিগ্রহ করিতে পারিলেই ক্রোধ আপনিই সম্বরিত হইবে। কাহার প্রতি তোমার ক্রোধ উপজাত হইলে জানিবে যে অন্যান্য তৎকালের জ্ঞাত তুমি যে অপেক্ষাকৃত শ্রেষ্ঠ, এই ভাব তোমার মনোমধ্যে উদ্ভূত হইয়া তোমার ক্রোধকে উত্তেজিত করিতেছে। তুমি তাহা অপেক্ষা বড় নহ, আপনাকে “তৃণাদপি স্নানীচ” জ্ঞান করিতে পারিলেই ক্রোধ নিশ্চয়ই চিরদিনের জ্ঞাত নিরস্ত হইবে। একটা ঘটনায়ও এইরূপ ক্রোধের উপর জয়লাভ করিতে পারিলে তুমি শীঘ্রই আপনাকে ক্রোধ-বিজয়ী দেখিতে পাইবে। কিন্তু ইহাতে যেন তোমার হৃদয়ে অহঙ্কার সঞ্চার না হয়। কেন না, অহঙ্কারেই পুনশ্চ বিনাশের সম্ভাবনা এবং বিনাশও নিশ্চিত।

মানবমাত্রেরই পরস্পর পরস্পরের সেব্য ও সেবক। ক্রোধের দ্বারা কেবল যে তুমি ভ্রাতার প্রতি অসদ্ব্যবহার করিলে তাহা নহে, ঈশ্বরের সমক্ষেও তুমি দোষী হইলে। পরিণামে পরিতাপনলে অবশ্যই তোমাকে দণ্ড হইতে হইবে। কাহাকে শত্রু বিবেচনায় তৎপ্রতি ক্রোধ করিলে তাহাতে সময়ে যে পরিতাপ উপস্থিত হয়, জীবনে নিত্য শত্রু-তর্পণেই ঐ পরিতাপনল হইতে মুক্তির একমাত্র উপায়। উহার দ্বারাই ঈশ্বরের প্রসন্নতা লাভ করিবে, এবং তাহাতেই শত্রুর প্রসন্ন মুখ দর্শনে সুখী হইবে।

কাহার প্রতি ক্রোধের কারণ উপস্থিত হইলে, “কেন

আমি ক্রোধ করিব, আমি তাহার দাস বৈ ত নয়” বদ্যপি এই কথাগুলি প্রকৃতরূপে হৃদয়-মধ্যে বলিতে পার, দেখিবে ক্রোধ কোথায় পলায়ন করিয়াছে। অন্তর-মধ্যে এই কয়েকটা বাক্যোচ্চারণেও কোন অবমাননা নাই। ইহা প্রকৃত সাধনেরই মন্ত্র। মন্ত্রের যদি কোন সাগর্য থাকে, উক্ত বাক্যগুলির পরাক্রম প্রত্যেক জীবনেই পরীক্ষা দ্বারা অল্পভূত হইবে। এইরূপে আত্মরিক ক্রোধ শমিত হইলে তোমার হৃদয়ে দেব-ক্রোধমাত্র রহিয়া যাইবে। পাপের প্রতি হৃদয়ের যে ঘৃণা-বিরক্তি, তাহাই দেব-ক্রোধ। তাহাতে মঙ্গল ভিন্ন অমঙ্গলের আশঙ্কা নাই।

## ১২। বস্ত্রহরণ ।

বস্ত্রহরণের রহস্য কে বুঝিবে? ব্রজের ব্রজনন্দন শ্রীকৃষ্ণ, যিনি পরমব্রহ্ম বলিয়া আখ্যাত, তিনি ব্রজকুমারীগণের বস্ত্রাপহরণ করিয়া তাঁহাদিগকে বিবস্ত্রা করিলেন, ইহা সামান্ততঃ লজ্জার কথা সন্দেহ নাই। কিন্তু ইহার গূঢ় রহস্য হৃদয়ে ভাবিলে শরীর অবশ্যই লোমাশ্লিত হয়। ব্রজ-গোপালনাগণ তাঁহাদিগের প্রাণবল্লভ পরম পুরুষ শ্রীহরিকে পাইবার জন্ত কাত্যায়নীত্রত করিয়া ব্রতের আনুষ্ঠানিক কার্য সমাপনান্তে যমুনায় স্নান করিতে প্রবিষ্ট হইলে তথায় গোপীমনোবিহারী ভগবান্ তাঁহাদিগের বস্ত্রহরণ করিয়াছিলেন।

যখন সাধক ঈশ্বর-লাভের জন্ত ব্যাকুল হন এবং তদুপ-লক্ষে ব্রতাবলম্বন করেন, তাহার প্রথম পরীক্ষাই বস্ত্রহরণ।

বস্তুহরণ না হইলে কখনও চিন্তাবিহারী পরমেশ্বরের দর্শন হয় না। যাহারা সেই বস্তুহরণে লজ্জিত, তাহারা ঈশ্বর-দর্শন লাভেও বঞ্চিত। আর যাহারা যমুনা-প্রবিষ্ট গোপ-বালাগণমধ্যে শ্রীরাধিকাসম একাগ্রমন হইয়া সেই ভগবান্ চিন্তনেই অনুরক্ত, সবস্তু কি বিবস্তু তৎসম্বন্ধে বাহু-জ্ঞান-বিরহিত, যাহারা সংসারের চাক্চিক্যের প্রতি একেবারে উদাসীন, তাহারা ঈশ্বর-দর্শনে পরমার্থ স্মৃতি লাভ করিয়া বিমোহিত এবং চিরকুতার্থ হন।

ভগবান্ সাধকের বস্তুহরণ করিয়া তাহার ধর্মরাজ্য-নিচরণের প্রস্তুততা দর্শন করেন। অপ্রস্তুত ব্যক্তি বস্তুহরণে লজ্জিত হইয়া পৃষ্ঠ প্রদর্শন পূর্বক পলায়ন করে। কিন্তু প্রস্তুত সাধক বিনা সম্বলে কোপীনমাত্র গ্রহণে ধর্মরাজ্যে ক্রমশঃ অগ্রসর হইতে থাকেন। “দীনাঙ্গাদিগেরই স্বর্গরাজ্য।” বাস্তবিক বাহ্যিক ও আভ্যন্তরিক দরিদ্রতা পরিগ্রহ না করিলে, সেই রাজ্যে প্রবেশাধিকার নাই। বাহ্যিক দরিদ্রতা হৃদয়কে মূঢ় ও কোমল-ভাবাপন্ন করে। সাধক তাহাতেই উন্নতি লাভ করিতে থাকেন।

সাধক বস্তুহরণে ঈশ্বরের বিশেষ অনুকম্পা দর্শন করেন। বস্তুহরণে সংসারী বিবাদপূর্ণ হইবে। কিন্তু রাজাও উচ্চাতে লজ্জিত বা বিষাদিত হন নাই। বুদ্ধরাজ আর বুদ্ধদেব সম্মানী একই ব্যক্তি হইলেও বুদ্ধদেব হৃদয়ের ধন এবং প্রাতঃস্মরণীয় হইয়াছেন; বুদ্ধভূপাল থাকিলে কেবল ঐতিহাসিক ব্যক্তিমাত্র থাকিতেন। হয় ত তাঁহার নামও লোকে বিস্মৃত হইত। বস্তুহরণেই নবজীবন লাভ; নব-



জীবনেই ঈশ্বর দর্শন, এবং পরিণামে তাহাতেই নির্বাপন মুক্তি।

### ১৩। একাগ্রতা।

ইহা জয়োন্নতির জীবন স্বরূপ। যে কার্যেই মনুষ্য প্রবৃত্ত হউক, তাহার একাগ্রতা না থাকিলে সেই কার্য অবশ্যই বিনাশ-প্রাপ্ত হইবে। একাগ্রতা যেমন কার্যের জীবন, তেমনি তাহা হইতেই মানবের কার্যবল উপস্থিত হয়। তুমি বক্তা নহ, কিন্তু ছদয়ে একাগ্রতা থাকিলে, আপনিই তোমার বক্তৃতাশক্তি স্ফূর্তি পাইবে। দেখিবে, সে স্থানে তোমার পরাভব নাই।

ধন-সঞ্চয়-স্পৃহা মনুষ্যের স্বাভাবিক। কিন্তু বিত্ত-সঞ্চয় কয় জনের ভাগ্যে ঘটে? ইহার কারণ অনুসন্ধান করিতে গেলে মূলে ঐ একাগ্রতার অভাবই দেখিতে পাইবে। কথিত আছে “ইচ্ছা থাকিলেই পস্থা আছে।” সেই ইচ্ছাই একাগ্রতা। ইহা লইয়া কার্য আরম্ভ করিলে, সম্প্রতি উন্নতি না দেখিলেও, সময়ে তাহা দেখিয়া অবশ্যই স্মৃথী হইবে।

সাধারণ মত, যে মনুষ্য মূর্থ বা পণ্ডিত হইয়াই জন্ম-গ্রহণ করে; কিন্তু তাহা নহে। কুলুমোদ্যানে অনেকগুলি বৃক্ষ রোপিত হয়; যত্নের তারতম্যে কোনটা সতেজ বা কোনটা নিস্তেজ হয়। অনেক কালিদাস নিজাবলম্বিত শাখা ছিন্ন করিয়াই জীবন হারাইয়া চলিয়া যান। সরস্বতীর বর-লাভ একাগ্রতা ভিন্ন হইতে পারে না।

পুনশ্চ, দীক্ষা ভিন্ন বরলাভ হয় না। এই নিয়ম পূর্বকালে যদ্রূপ ছিল, বর্তমানকালেও তদ্রূপ আছে। বালকের পিতামাতাই তাহার দীক্ষা-গুরু। সময়ে সে দীক্ষিত না হইলে তাহার জীবন লক্ষ্যশূন্য হইয়া চলিয়া যাইবে। একাগ্রতা তাহার হৃদয়ে উদ্দীপিত করিতে পারিলে, আপনিই সে লক্ষ্য ঠিক করিয়া লইবে।

জীবনে নৈরাশ্র অনেক সময়ে উপস্থিত হয়। তাহাতে কেহ নাস্তিক অথবা কেহ কুসংস্কার-জড়িত প্রেতপূজক হইয়া পড়ে। মেঘাবৃত আকাশে সৰ্ব্বদাই অন্ধকার থাকে না, মধ্যে মধ্যে বিদ্যুদালোকও দৃষ্ট হয়। জীবন-আকাশেও ঠিক তদ্রূপ বিদ্যুৎজ্যোতিঃ প্রকাশিত হয়। সেই বিদ্যুৎকে ধরিতে পারিলে তাহা তড়িৎ-বাহী-বাহক শক্তি স্বরূপ তোমার লক্ষ্যের সহিত তোমার হৃদয়ের যোগ সংস্থাপন করিয়া দিবে। লক্ষ্য স্থির হইলে, জয় অবশ্যস্বাবী। তদবস্থায় কেবল হৃদয়ের একাগ্রতাই আবশ্যিক। এই একাগ্রতা তড়িৎ-বাহিতার সদৃশ তোমার লক্ষ্যের সহিত চিরযুক্ত রাখিতে হইবে। নতুবা হৃদয়ের সহিত লক্ষ্যের যোগ থাকিবে না।

ভৌতিক কার্যবলে অলৌকিক কার্য সম্পাদিত হইতে দেখিলে লোকে বিস্ময়াপন্ন হয়। তথায় কার্যকারীর বিস্ময় নাই। একাগ্রতা দ্বারা যাহা নিষ্পাদিত হইবে, তাহাতে যাদুকর ও দর্শক উভয়েই চমকিত হইবে। জগতের তাবৎ বিস্ময়কর-ব্যাপার একটী মন্ত্রেই সংসাধিত হইয়াছে। সেই মন্ত্রই একাগ্রতা।

## ১৪ । ধৈর্য্য ।

শাস্ত্রকারেরা বলিয়াছেন, বিপদে ধৈর্য্য এবং অভ্যুদয়ে ক্ষমা অবলম্বন করিবে। বিপৎকালে ধৈর্য্যের বিশেষ আবশ্যক হইলেও সর্বদাই ইহা আচরণীয়। “সবুর বা স্নাকাল-বিলম্বে স্নফল উৎপন্ন হয়” সাধারণ কথা প্রচলিত আছে। অতীত কার্য্যে ধৈর্য্যই সাফল্যাৎপাদনের একমাত্র পন্থা।

অনেকেই প্রথম উদ্রিক্ত-ভাবের পক্ষপাতী। কিন্তু অনেক সময়ে প্রথম চিন্তা উৎকৃষ্ট চিন্তা নহে। যাহারা বিচার-কার্য্যে প্রবৃত্ত, তাঁহারা এই কথার সত্যতা অবশ্যই অনুভব করেন। অনেক সময়ে মানসিক গতি দ্বারা প্রথম ভাবের উদ্রেক হয়; সেই গতি রোধ হইলে, ভাবান্তরের লক্ষণ দৃষ্ট হয়। যাহারা প্রথম-ভাবের পক্ষপাতী, তাঁহারা তদ্বারাই প্রচালিত হইয়েন। ধীর ব্যক্তির দ্বিতীয় ভাবের অবমাননা করেন না। ইহাতে স্নফলই উৎপাদিত হয়। বাস্তবিক ফল অল্পতর হইলেও, বিচারক আত্ম-সন্তোষ-লাভে স্নখী হইয়েন। অপর পক্ষে, যাহারা প্রথম-ভাবের পক্ষপাতী, তাঁহারা অনেক সময়ে আত্মস্নখ হারাইয়া অল্পতপ্ত হইয়া থাকেন। “দুইবার চিন্তা করিয়া পশ্চাৎ কার্য্য করিবে,” ইহা ধীমানের বাক্য। ধীর ব্যক্তিরই এই প্রণালী দ্বারা প্রথম ধৈর্য্যভ্যাস। ক্রমে ক্রমে যাহা অভ্যস্ত হয়, পরে তাহা প্রকৃতির অংশীভূত হয়। ধৈর্য্যভ্যাসে কখনই অবদ্ব প্রকাশ কর্তব্য নহে।

যৌবনকালে স্বভাবতই অধীরতার প্রাবল্য। এই জন্ম

আপংকালে বৃদ্ধেরই বচন গ্রাহ্য, ইহা শাস্ত্রানুমোদিত। বয়ো-বৃদ্ধও বৃদ্ধ, এবং জ্ঞানবৃদ্ধও বৃদ্ধ বটে। সন্ধিবেচকের পরামর্শ ভিন্ন গুরুকার্য্যে কদাচ হস্তক্ষেপ করিবে না! এই নিয়মের অজ্ঞথায়, লাভ এই হইবে যে তোমার উদ্দেশ্য সং হইলেও কার্য্যের নিষ্ফলতা হেতু সেই উদ্দেশ্য চিরপ্রচ্ছন্ন রহিয়া যাইবে।

কোন বন্ধু এক সময়ে বলিয়াছেন যে, “তাড়িতে সংবাদ প্রদান এবং অধীর ব্যক্তির কার্য্য একই সমান।” বাস্তবিক এ কথা অর্থযুক্ত। যে স্থানে বাক্যের সংক্ষিপ্ততা হেতু উত্তরের স্থিরতা নাই, বা যে স্থানে অনেক অবস্থার উপর প্রত্যুত্তর নির্ভর করিতেছে, সে স্থলে তড়িতবার্তা দ্বারা গোলযোগই অনীত হয়। এইরূপ অবস্থায় একটীর পর দ্বিতীয় বার্তার অবশ্যই আবশ্যক হইয়া থাকে। হয় ত পরিণামে তাহাতেও কার্য্যের সূচাকতা দৃষ্ট হয় না। অধীর ব্যক্তিদিগের কার্য্যও ঠিক সেইরূপ। তাহার। যাহা এক্ষণে হৃদয়-ভাবের বশীভূত হইয়া করিল, তাহাদিগের তৎপর পাঁচটা কার্য্যের দ্বারা তাহার সংশোধনের আবশ্যক হইবে। এ অবস্থায় বরং বিলম্বে একটা কার্য্য সম্পাদনও শ্রেয়ঃ, তথাচ স্বরিত ঐরূপ পাঁচটা কার্য্য সম্পাদিত হওয়া বাঞ্ছনীয় নহে।

যখন যাহা করিবে, স্থিরচিত্তে উত্তম বিবেচনার পর তাহাতে প্রবৃত্ত হইবে। কেহ কোন কার্য্যের অগোণ সম্পাদন তোমার নিকট চাহিলেও স্থস্থিরভাবে তাহা সম্পাদিত হইবার পক্ষে তোমার অবকাশ প্রাপ্তির স্লযোগ আছে। ইহা নিশ্চিত যে বিয়য়-কর্ম্ম-নিযুক্ত ব্যক্তিগণ তাহাদিগের

বিষয়কার্যে এইরূপ অবসর পাইয়া থাকেন। সূতরাং অন্য সাধারণ পক্ষে তাহা অবশ্যই সম্ভব। পরন্তু, এ অবস্থায় অন্য একটা বিপরীত স্বভাব হইতে আপনাকে রক্ষা করিবে। অলসের স্বভাব দীর্ঘস্থত্রতা, এবং স্থবিরেরও ঐ প্রকৃতি। এতদুভয়ের স্বভাব হইতে আপনাকে মুক্ত রাখিবে। ধৈর্যেরও পরিমাণ আছে। ধীর ও ধীমানের নিকট হইতে সেই পরিমাণ গ্রহণ করিবে। হৃদয়ে প্রকৃত সবলতা থাকিলে তুমি দীর্ঘস্থত্রতা-দোষে অপরাধী স্থিরীকৃত হইবে না। সরল হইলেই ধীর ও ধীমান হইয়া স্মখী হইবে ॥

### ১৫। সহানুভূতি ।

সংসারে সহানুভূতিই মনুষ্যের প্রাণ। যেমন প্রত্যেক সংসারী ইহা দ্বারাই সঞ্জীবিত থাকে, তেমনি ইহাতেই সমাজ এবং জাতির স্থিতি। সমতাতেই সহানুভূতির উৎপত্তি। ভিন্ন ভিন্ন শ্রেণীর লোককে একত্রিত কর, যতদিন তাহা-দিগের অবলম্বিত ভাবের প্রধান্য থাকিবে, তাহাদিগের কার্যেরও একত্রোদ্যম দেখিবে। সেই ভাবের অবসানে একতার বিচ্যুতি অবশ্যজ্ঞাবী। তুমি জাতি বা সমাজ সংগঠনে প্রবৃত্ত। তাহার মূল ভিত্তি কোথায়? ক্ষণস্থায়ী ভাবের উপর উহার চিরভিত্তি কখনও স্থিত হইবে না। যত্বপরি প্রকাণ্ডাটালিকার স্থিতি সম্ভব, এমন একটা চির-স্থায়ী ভাবের আবশ্যক। এই জন্য মহাপুরুষেরা যখন সমাজ বা জাতি গঠনে প্রবৃত্ত হইয়াছিলেন, তাহা তাঁহারা উদার-

প্রেমের ভিত্তিতে সংস্থাপিত করিয়াছিলেন। সেই জন্যই কত স্মরণাতীত কালের কীর্ত্তি এখনও জাজ্বল্যমান। তুমি পাঁচটা রং বজায় রাখিয়া একটা রং ফলাইতে ইচ্ছা করিয়াছ; কিন্তু তাহা অসম্ভব। একত্র মিশ্রণ-যোগেই সুরঞ্জের বিকাশ। এই মিশ্রণ-যোগ স্থাপন না হইলে কুত্রাপি স্থায়ী বা নয়ন-রঞ্জক দৃশ্য পরিলক্ষিত হইবে না।

নর ও নারীর বিবাহ হয়। দৈবজ্ঞ অগ্রে বরকন্যার গণ স্থির করে; পরে পরস্পরের উদ্বাহের অনুমোদন করে। পঞ্জিকা বা কেপ্তী দৃষ্টেই পাত্র-পাত্রীর নরগণ বা রাক্ষসগণ স্থির হইল। বর-কন্যার সহিত তাহার একবার সাক্ষাৎও হইল না। এইরূপ দৈবজ্ঞানুমোদিত নরনারী-সংযোগে সফল ফলিত না হইলে পরিণামে তজ্জন্য আক্ষেপ বৃথা। পাত্র-পাত্রীর পিতামাতাই প্রকৃত দৈবজ্ঞ। পুত্র-কন্যা দেবগণ কি অসুরগণ, তাঁহারাি বলিতে পারেন; তবে তাঁহারা সাংসারিক স্বার্থপরতা বশতঃ তাহা প্রকাশ করেন না। পরিণামে তাহার ফল তাঁহাদিগকেও ভোগ করিতে হয়।

আত্মাই আত্মার সহকারী। কিন্তু পরস্পরের মধ্যে প্রকৃত সহকারিত্ব হইবার জন্য উভয়ের মধ্যে সহানুভূতির আবশ্যক। যে স্থলে দুই সহানুভাবক আত্মার যোগ, তথাই প্রকৃত পরিণয়। প্রণয়ও ঐ আত্মায় আত্মায় যোগ।

কথিত আছে, দেশ ভ্রমণে মনুষ্য উদার হয়; কিন্তু তাহাতে যেমন তাহার উদারতা বৃদ্ধি হয়, তেমনি সঙ্কীর্ণতাও উপস্থিত হয়। মনুষ্য স্বর্গের মর্যাদা কখন শিক্ষা করে? যখন সে প্রবাস-ক্লান্তিতে ক্লিষ্ট হইয়া শাস্তির জন্য পিপাসু,

হয়, তখনই হৃদয়-বলে “জননী জন্মভূমিষ্ট স্বর্গাদপি  
 গরীয়সী” । স্বর্গের মিষ্টতা তখনই মানব অমুভব করেন ।  
 কবির হৃদয় হইতে “গৃহ তুল্য আর সুমিষ্ট স্থান নাই” এই  
 কথাই উদ্ধৃত হয় । কেনই বা এই ভাব মনোমধ্যে উদ্ভিত  
 হয় ? অন্যত্র প্রকৃত সহানুভূতির অভাবই তাহার এই ভাবের  
 উত্তেজক । সাধারণের পক্ষে সময়ে ইহা মঙ্গলকর, সন্দেহ  
 নাই । ইহার দ্বারা স্বদেশানুরাগিতা ও স্বজনবাৎসল্য প্রভৃতি  
 সদ্গুণ বর্দ্ধিত হয় । কিন্তু ইহা প্রকৃত মহত্বের লক্ষণ নহে ।  
 মহাপুরুষদিগের আত্মীয় অনাত্মীয় নাই । পৃথিবীই তাঁহা-  
 দিগের গৃহ । নিখিল মানব-সহ সহানুভূতি তাঁহাদিগের হৃদয়ের  
 স্বভাবজাত ধর্ম । তাঁহারা তাহাতেই জগৎ অম্বরঞ্জিত দৃষ্টি  
 করিয়া ভেদাভেদ-জ্ঞান-শূন্য-হৃদয়ে চির-আনন্দে ভ্রমণ করেন ।  
 মনুষ্য সঙ্কীর্ণতা দূর করিয়া সেই উদারতা শিক্ষা করুক ;  
 পরস্পরকে সহানুভূতি দানে সংসারকে আনন্দ-সংসার করিয়া  
 পরস্পর-চিরপ্রেমে আবদ্ধ হউক !

### ১৬ । দানশীলতা ।

কোন যাচক ব্রাহ্মণ বলিয়াছিলেন, “দান ও শীতের  
 প্রাতঃস্নান উভয়ই সমান, একবার করিতে পারিলেই  
 নিশ্চিন্ত ।” এই উক্তি স্বার্থ-প্রণোদিত হইলেও, ইহা অতি  
 গভীর তত্ত্বপূর্ণ । ব্রহ্মচারী অথবা নিতাপ্রাতঃস্নায়ী ব্যক্তি  
 প্রাতঃস্নানে ভীত বা কুণ্ঠিত নহেন । কিন্তু সাধারণ মানব,  
 শীতবস্ত্র ত্যাগানন্তর কিরূপে জলমগ্ন হইবে, ইহাতেই চিন্তাগুরু ।

হৃদয়বান্ ব্যক্তি দানের পাত্র উপস্থিত দেখিলেই অকাতরে স্বীয় ক্ষমতানুসারে সেই প্রার্থীর প্রার্থনা পূর্ণ করেন ।

নিত্য-নৈমিত্তিক-দান সম্বন্ধে দানের পাত্র আগত হইলে বিচারে প্রবৃত্ত হইবে না । হৃদয়-তন্ত্রী বাজিয়া উঠিলেই স্বীয় ক্ষমতানুসারে দান করিবে । দানে নামের প্রত্যাশা করিবে না । তুমি বড়লোক বলিয়া প্রসিদ্ধ, কিন্তু অবস্থা তাদৃশ নহে । তুমি ক্ষুদ্র দানে লজ্জিত হইবে । কিন্তু লজ্জার কোন কারণ নাই । প্রসিদ্ধ আছে যে, পিতৃমাতৃ-শ্রাদ্ধান্তে আক্ষেপ মহাপাপ । বাস্তবিক দানাশ্বে এই আক্ষেপ সর্বদাই পাপ । বাহাতে হৃদয়ের শান্তি অপহৃত হইল, তাহাই পাপ । অশান্তি ক্ষণস্থায়ী বা চিরস্থায়ী । ক্ষণস্থায়ী অল্পশ্বে পাপ নাই এরূপ মনে করিবে না । অকাতরে বাহা যখন দান করিতে পার, সেইরূপই দান করিবে । ঈশ্বর তাহাই চাহেন । সংসারও সেই দানাপেক্ষী ।

ক্ষমতাভীত দান যেরূপ দুষণীয়, ক্ষমতাসম্বন্ধে রূপণতাও তদ্রূপ নিন্দার বিষয় । উভয় দিকে সমতা রক্ষা করিয়া দান করিবে । যেখানে ক্ষমতা আছে, সময়ে দানের আপেক্ষিক উপকারিতার দিকে দৃষ্টি করিবে । দানের পাত্রও সময়ে দ্রষ্টব্য । গ্রাম্য যোগীর অন্নাতাব, এ অপবাদ যেন না থাকে । “স্বগৃহেই দাতব্যের আরম্ভ” এই কথা অবশ্য স্মরণীয় । স্বজন বা স্বপল্লিস্বজন অথবা স্বগ্রাম্যজনের অবস্থা দানের উপযুক্ত দেখিলে অগ্রে তাহাদিগের অভাব মোচনীয় । কিন্তু ইহাতে যেন সঙ্কীর্ণতা আক্রমণ না করে । তটিনী স্বীয় বৃদ্ধিকালে প্রথমতঃ আপন তট ও তটস্থ ভূমি জনপূর্ণ



করে; তৎপরে সমস্ত প্রদেশকে স্বীয় বারি প্রদানে সৌন্দর্য-শালী করে। যেমন স্বজনের উন্নতি, সেইরূপ অপরের উন্নতির দিকে অবগু দৃষ্টি রাখিবে।

নামের জন্য দান করিবে না। দানের দ্বারা উপাধি প্রাপ্ত হইতে পারিবে বটে, কিন্তু “দাতাকর্ণ” ত হইতে পারিবে না। অতএব তোমার দানটীতে কেন রাজসিক ভাব সংস্পৃষ্ট করিয়া উহাকে অনর্থক কলঙ্কিত করিবে। তুমি ঈশ্বরের ভাগ্যারী। প্রেমেরই সেই ভাগ্য হইতে দান করিবে। আত্মসন্তোষ ও জগৎপ্রেমই তোমার দানের পুরস্কার হইবে।

যে রূপ উপকারীর হৃদয়ের কোমলতায় কৃতোপকারের মধুরত্ব, তেমনি ঐরূপ সহৃদয়তায় কৃতদানেরও মিষ্টতা। দীনাগুঃকরণে যে দান প্রদত্ত হয়, তাহা অতি সামান্য হইলেও “বিহুরের ক্ষুদ” সদৃশ ভগবান্ যেমন তাহা গ্রহণ করেন, মনুষ্যও তৎপ্রাপ্তিতে পরম সন্তুষ্ট হয়। বিনাডম্বরে যাহা প্রদত্ত হইবে, তাহা দাতা ও গ্রহীতা উভয়েরই প্রকৃত সন্তোষের কারণ হয়। এই আডম্বর-শূন্যতা এবং হৃদয়ের দীনতা দ্বারা তোমার দানকে স্মহান্ করিবে।

### ১৭। প্রশংসাপত্র।

সংসারক্ষেত্র-বিচরণের সম্বল যে রূপ ধন, সেইরূপ বিষয়-ক্ষেত্র-বিচরণের সম্বল প্রশংসাপত্র। উভয়ের জন্যই মনুষ্য ঈশ্বরীকৃত। উপযুক্ততা না থাকিলেও তাহার যেমন ধন-

প্রাপণাকাঙ্ক্ষা তীব্র, তদ্রূপ অনুপযুক্ততা সত্ত্বেও তাহার প্রশংসা-পত্র-প্রাপ্তি-লালসা ছুঁনিবার। আবার ধন ও প্রশংসা সময়ে অনুপযুক্ত পাত্রেও গ্ৰস্ত হইয়া থাকে। সুতরাং অনুপযুক্তের ঐ আকাঙ্ক্ষা স্বাভাবিক। কিন্তু দস্যুর ধন সঞ্চয় যেরূপ গরীয়ান্ নহে, অনুপযুক্ত ব্যক্তির প্রশংসা-সংগ্রহও সেইরূপ দুষণীয়।

বিভাপহারী অপেক্ষা অনুচিত-প্রশংসা-পত্র-সংগ্রাহক সংসারের অধিক অপকারক। একে, যাহার অনিষ্ট করে তাহারই করে; অপর সংসার-সাধারণের অনিষ্টকারী। এই অযথা-প্রশংসা-পত্র-সংগ্রাহক ও প্রশংসা-পত্র-দাতা উভয়েই দণ্ডার্থ। সাধারণতঃ ধনাদিদানে দাতা কখনও লোক-সমীপে অপরাধী স্থিরীকৃত হয় না। কিন্তু অনুপযুক্তে প্রশংসাপত্র-দানকারী চিরাপরাধী।

যথার্থ বলিতে কখনও কুণ্ঠিত হইবে না। সহৃদয়তা প্রকাশের অনেক স্থান আছে। “নির্দয়” অপবাদ-ভীতি সত্যের সোপান হইতে তোমাকে যেন স্থলিত-পদ না করে। তোমার অযথার্থ প্রশংসা-পত্রে গ্রহীতার বা অনুগ্রহীতের আশু উপকার হইতে পারে বটে এবং তুমিও তাহার নিকট সহৃদয়রূপে গৃহীত হইতে পার সন্দেহ নাই, কিন্তু তোমার অযথার্থিকতার প্রকাশ হইলে তুমি যে কেবল হয় হইবে তাহা নহে, যাহার সাময়িক উপকার করিলে, তাহারও চিরদিনের জন্ম অনিষ্ট করিলে।

প্রশংসা-পত্র-দানে অনুরোধের বশীভূত হইবে না। ভাবিলে, প্রার্থীর প্রার্থনা পূর্ণ করিয়া তুমি আপাততঃ তদনুসারে

কাকূতি হইতে নিষ্কৃতি পাইলে; সে পরের স্বন্ধে আরোহণ করিয়া যাহাই করুক তাহাতে তোমার ক্ষতি নাই। কিন্তু ইহা ভ্রম। যে অস্ত্রের দ্বারা তুমি তাহাকে সজ্জিত করিলে, সেই অস্ত্রই সময়ান্তরে সেই ব্যক্তি তোমারই প্রতি নিক্ষেপ করিতে পারে। তখন তোমার সেই অস্ত্র প্রতিরোধের সামর্থ্য থাকিবে না।

অপ্রকৃত প্রশংসা প্রদান দুর্বলতার লক্ষণ। আবার দুর্বলই প্রশংসার ভিখারী। কিন্তু দুর্বলের দ্বারা দুর্বল রক্ষিত হয় না। সবল বা যথার্থানুরক্ত-ব্যক্তি কর্তৃক প্রশংসাই দুর্বলের রক্ষা। অতএব দুর্বলচিত্ত ব্যক্তির নিকট প্রশংসার জন্ত প্রার্থী হইবে না। পুনশ্চ, উহা সকলের নিকট না পাইলেও ক্ষুণ্ণ হইবে না। কেন না, সকলে তোমার গুণের বিষয় পরিজ্ঞাত হইলে উপযুক্ত সময়ে প্রশংসা প্রদানে পরাঙ্মুখ হইবেন না। যিনি প্রশংসাপত্রের জন্ত প্রতীক্ষা না করিয়া আপন কর্তব্য-সম্পাদনে স্বীয় চিত্ত-সম্বোধ লাভ করিয়াই কৃতার্থ হন, তিনিই ধন্ত।

মানবের প্রশংসাপত্রে তোমার বিশেষ কি লাভ হইবে। হয় ত ঝাঁহার প্রশংসার মুখাপেক্ষী হইয়া রহিয়াছ, তিনি তোমার সম্যক্ গুণাভিজ্ঞ নহেন, অথবা জ্ঞাত হইয়াও তোমার গুণ বিশ্বৃত। তাঁহার নিকট উচিত প্রশংসা না পাইলে তুমি ক্ষুব্ধ হইলে, অথবা উচিত প্রশংসার জন্ত দ্বিতীয় আশা করিলে। এই আশা তোমার ক্রমোন্নতির কারণ হইলে তাহা দুষণীয় নহে; কিন্তু হতাশা যেন তোমার হৃদয়ের কার্যোদ্যম বিলুপ্ত না করে। স্বীয় কর্তব্য-পালন-

জ্ঞান এবং এক ঈশ্বরে তোমার নির্ভর থাকিলে, তুমি বিষয়-ক্ষেত্রে বীরপুরুষ-পরাক্রমে ও নির্ভীকাস্তঃকরণে অনারাসে বিচরণ করিতে পারিবে। তাহা হইলে তোমার বল ও উদ্যম চির-অক্ষুণ্ণ রহিয়া যাইবে।

### ১৮ । দুঃখ ।

দুঃখ কি ? কোন বালক স্বীয় মাতার অঙ্গুলিতে জলস্ত অঙ্গার-স্পর্শে তাঁহাকে যন্ত্রণা প্রকাশ করিতে দেখিয়া কহিয়াছিল, “মাতঃ! অগ্নিতে ত উত্তাপ নাই, উত্তাপ মনে।” বাস্তবিক, বালকের কথা হইলেও ইহার গূঢ় তাৎপর্য আছে। স্মৃথ এবং ক্লেশ কেবল মানসিক বিকারমাত্র। যাহাতে তুমি দুঃখ অনুভব করিলে, অপরের তাহাতে স্মৃথ অনুভূত হইল; একান্ত তাহা না হইলেও তাহাতে তাহার ক্লেশ অনুভূত হইল না। অঙ্গুলিতে একটা কণ্টকের স্পর্শমাত্রই তোমার যন্ত্রণা বোধ হইল; কিন্তু এগনও লোক দৃষ্ট হয়, যে শত শত তীব্র কণ্টকের উপরি শয়ান এবং স্মৃথে নিদ্রিত। মিউসস্ স্কিভোলা স্বীয় দক্ষিণ হস্ত অগ্নিস্কুলিঙ্গে অর্পণ করিলেন এবং তাহা প্রজ্বলিত হতাশনে ভস্মীভূত হইয়া গেল। কিন্তু তিনি তাহা অবিকৃত-চিত্তে সহ করিলেন। দেবায়ুজ যীশু যখন ক্রুশে আহত হইলেন, তিনি চৈতন্য-বিরহিত শত্রুদিগের জন্ত প্রার্থনা করিলেন। কই, তাঁহার ত হৃদয়ের ভাব বিচলিত হইল না। রূপগোস্বামী বিপুল বিভব পরিত্যাগ করিয়া অতীব সামান্ত ভিক্ষকের

অবস্থা অবলম্বন করিলেন; রাজহর্ম্যা পরিত্যাগ পূর্বক কুটীর আশ্রয় করিলেন; ছুঙ্ক-ফেন-নিভ-শয্যার পরিবর্তে কঠোর ভূমি-শয্যা-গ্রহণ করিলেন। ছুংখ কোথায়? আত্মপরিভূষ্টিই মুখ, মানসিক বিকারই ছুংখ।

সংসার-চক্রে বিঘূর্ণিত হইয়া আমরা ভাবি, আমাদের জীবনের ঘটনাগুলিই আমঙ্গলিক। এই তুলনাই ছুংখের আকর। ভগবানের রাজ্যে কি অমঙ্গল আছে, এই ভাব যাহার হৃদয়মধ্যে বদ্ধমূল হইয়াছে, তাহার ছুংখ-সস্তাপ নাই। তুমি বলিবে যে যাহা প্রত্যক্ষ দৃষ্টিতেই অমঙ্গলকর, তাহা কিরূপে কল্যাণযুক্ত। তাহা হইলে জীবন-গ্রন্থ তুমি প্রকৃত-রূপে পাঠ কর নাই। কোন পাশ্চাত্য পণ্ডিত বলিয়াছেন যে, সমুদ্র হইতে একটা বিন্দু-পরিমাণ জল তোমার নিকট আনীত হইলে তুমি সেই জলবিন্দু হইতে সমুদ্রের মাহাত্ম্য বৃদ্ধিতে বেরূপ অক্ষম, মানব-জীবনের একটা ঘটনা লইয়া সেই জীবনের মাহাত্ম্য বৃদ্ধিতেও তুমি তাদৃশ অপারগ। স্ব স্ব জীবনগ্রন্থ স্থিরচিত্তে পাঠ কর, দেখিবে সমস্ত ঘটনা-বলী এক শৃঙ্খলে আবদ্ধ; যেটা অমঙ্গলকর বলিয়া সেই ঘটনার সময়ে প্রতিভাত হইয়াছিল, তাহা একটা মহামঙ্গলের নিদান-স্বরূপ। ঈশ্বরের মঙ্গলময় রাজ্যে মঙ্গল ভিন্ন অমঙ্গল হইতে পারে না।

অনেকে ভাবে, পাপই ছুংখের মূল। পাপে ছুংখ উৎপন্ন হয়, ইহা সত্য হইতে পারে; কিন্তু যেখানে ছুংখ, সেখানে পাপ, ইহা সত্য নহে। এই ভ্রান্তি সংসারের অনেক অনিষ্ট করিয়াছে। ছুংখীদিগের প্রতি স্নেহশূন্যতা এই ভ্রান্তিই ইহার

মূল। তুমি যাহাকে দুঃখ-ক্লেশ বল, মহাত্মাদিগকে সেই দুঃখ-ক্লেশে নিপতিত দেখিতে পাও। পাপ সেখানে অসম্ভব। তথাচ দুঃখ ক্লেশ তথায় দৃশ্যমান। যেখানে তুমি অমঙ্গল দেখ, মহাত্মারা সেইখানে ঈশ্বরের মঙ্গল হস্ত দর্শন করেন। উখ না মারিলে ক্ষুর শাণিত হয় না; ঘর্ষণ না করিলে হীরকের জ্যোতিঃ নির্গত হয় না। লিটন\* বলিয়াছেন, “ঈশ্বরের যাহাকে অধিক স্নেহ করেন, তাহাকে তিনি অধিক উজ্জ্বলতর করিবার জন্ত তত্পরি পরীক্ষারূপ উখ প্রভৃতি অস্ত্রের আঘাত করেন।” সমস্তই ঈশ্বরের হস্ত হইতে আগত, যিনি জানিয়াছেন, তাঁহার কিছুতেই দুঃখ বোধ নাই। “হয় রাখ স্নেহে, না হয় রাখ দুঃখে, তোমার সম্পদ বিপদ আমার দুই সমান” ইহা সেই ব্যক্তিরই হৃদয়ের নিত্য-সঙ্গীত; সৰ্ব্বাবস্থায় ভগবদানন্দে তাঁহারই প্রাণ সৰ্ব্বদা বিগলিত। ক্ষুদ্র পৰ্ণকুটীরেও সম্যাসীর তাই এত আনন্দ। সুখ-দুঃখে যাহার সমভাব, যিনি আপন হৃদয়ানন্দে সৰ্ব্বদাই আনন্দিত, যাহার সন্নিধানতা লাভে সংসার-নিপীড়িত জীব স্নেহতা লাভ করিয়া তন্মাহাত্ম্যানুভবে স্নেহী হয়, সেই পুরুষই ধন্য।

### ১৯। স্বৰ্গখনি ।

কোন বন্ধু কথোপকথনে এক সময়ে বলিয়াছিলেন যে, তিনি যেখানে যান, তাঁহার মনে হয় যেন সেইখানেই

স্বর্ণখনি আবিষ্কার করিবেন। কখনও ঐরূপ খনি তিনি কোথাও দেখিতে পাইয়াছেন কি না, তাঁহাকে জিজ্ঞাসা করিলে তিনি বলিয়াছিলেন যে এ পর্য্যন্ত কোন স্থানে উহা প্রাপ্ত হন নাই, তবে স্বীয় বাটার মধ্যে অন্বেষণ করিতে করিতে এক সময়ে একটা মুদ্রাখণ্ড প্রাপ্ত হইয়াছিলেন। বাস্তবিক স্বর্ণখনি দূরে নয়, তাহা নিকটেই বর্তমান। প্রত্যেক মনুষ্যের হৃদয়ই স্বর্ণখনি। একাগ্রচিত্তে অন্বেষণ করিলে ইহার মধ্যেই স্ব স্ব অভীক্ষিত রত্ন প্রাপ্ত হওয়া যায়। তুমি ধনী হইবার ইচ্ছা করিয়াছ, কিন্তু সাংসারিক-বিত্ত সংগ্রহে অনেক বিঘ্ন। হয় ত ঐ বিত্ত সংগ্রহে যাহা যাহা আবশ্যিক, তৎসমুদায় তোমার নাই। ধন উপার্জনে মূলধনের প্রয়োজন। হয় ত সেই মূলধন তোমার নাই। তোমার অন্যান্য গুণ থাকিলেও শুদ্ধ এই একটীর অভাবে বিত্ত সংগ্রহ হইল না। কিন্তু হৃদয়খনি খনন দ্বারা বিত্ত উদ্ধার করিতে মূলধনের আবশ্যিকতা নাই। একাকী সেই ধন সংগ্রহে যত্নবান্ হও, সময়ে রত্ন আপনিই হস্তে উপস্থিত হইবে।

প্রত্যেক হৃদয়-ভাণ্ডারে বিপুল ধন নিহিত রহিয়াছে। কেহ বা প্রকৃত ধনের পরিবর্তে কেবল অঙ্গার উদগীরণ করিয়া থাকে। তাহাতে জগতের বা নিজের বাঞ্ছিত উপকার সংসাধিত হয় না। তবে অঙ্গার দ্বারা জগতের যে উপকার, তাহাই হইয়া থাকে। স্মৃচতুর ব্যক্তি সেই অঙ্গার হইতে হীরক উৎপাদন করেন, অর্থাৎ তদ্বারা আপন জীবন সংস্কারের ব্যাপার সংঘটিত করিয়া লয়েন; জীবন-

খনি হইতে রত্ন সংগ্রহ করিবার ইচ্ছা থাকিলে কঠোর অধ্যবসায় সহকারে সেই কার্যে নিযুক্ত থাকিবে। সময়ে রত্নই আবিষ্কৃত হইবে, এবং খনিরও আদর সর্বত্র ঘোষিত হইবে।

কেহ বা কিরূপে অর্থ সঞ্চিত হইবে, সর্বনা এই বিষয়েই চিন্তিত থাকেন। তিনি নানা উপায় অবলম্বন করিলেন, কিন্তু কিছুতেই তাঁহার অভীক্ষিত বস্তু হস্তগত হইল না। তিনি যে যে উপায় অবলম্বন করিলেন এবং যে যে কারণে অকৃতকার্য হইলেন, তৎসমস্ত লিপিবদ্ধ করিয়া রাখিলেন। অবশেষে তাঁহার সেই জীবনগ্রন্থ প্রচার হইল ; তাহাতেই তাঁহার বিপুল অর্থ সংগ্রহ হইল। অন্যান্য প্রত্যেকে যদি স্ব স্ব দৈনিক কার্যকলাপ এবং হৃদয়ের ভাবসমূহ লিপিবদ্ধ করিয়া জগতের নিকট প্রচার করেন, তাহা হইলে তাহাতেই জগতের এবং নিজের বহুল উপকার হইবে।

যেৰূপ জড়-জগৎ কতকগুলি অখণ্ড নিয়ম দ্বারা শাসিত, অন্তর্জগৎও সেইরূপ নিয়ম দ্বারা প্রচালিত হইতেছে। যে দিবস মনুষ্য, প্রত্যেক জীবনের ঘটনাবলী হইতে জড়-মাধ্যাকর্ষণশক্তি সদৃশ অধ্যাত্মজীবনেরও ঐরূপ শক্তির আবিষ্কার করিয়া জগতের নিকট প্রচার করিবেন, সেই দিনই প্রকৃত জীবন-বিজ্ঞান প্রচারিত হইবে।

মনুষ্য, এক্ষণে জীবনের উৎকর্ষাপকর্ষের প্রকৃত কারণ নির্ণয় করিতে অক্ষম। বিদ্বান্ পিতার মূর্খ-পুত্র, ধার্মিকের অধার্মিক-সন্তান ; পৌরাণিক পণ্ডিতেরা পূর্ক-পথের উল্লেখ



করিয়া ইহার ব্যাখ্যা করিবেন, এবং জ্যোতিষিক জন্ম-গ্রহের দ্বারা ইহার কারণ নির্ণয় করিবেন। কিন্তু উভয়ের নির্ণয়-ফল সর্বগ্রাহী বা সন্তোষজনক নহে। প্রত্যেকে জীবন-গ্রহ সঙ্কলন করুন, তাহা হইতেই মূলতত্ত্বের আবিষ্কার হইবে। এই জীবন-গ্রহ সঙ্কলনে আর একটা সূত্র এই হইবে যে, ইহার দ্বারা অঙ্গার-খনি সময়ে স্বর্গ বা হীরক-খনিতে পরিবর্তিত হইবে।

## ২০। প্রীতি।

জগৎ বাহ্যিক প্রীতিতেই সমৃদ্ধ। আত্মার প্রীতি গভীর; তদ্বিকে সাধারণের ক্ষুদ্র দৃষ্টি ক্চিৎ নিপতিত হয়। তড়িতের বার্তাবাহকতাশক্তি যেমন আশ্চর্য-জনক অথচ প্রকৃত, আত্মায় আত্মায় সংযোগও তদ্রূপ। পূর্বকালে ঋবিগণ ধ্যানাবস্থায় ভূত-ভবিষ্যৎ দর্শন করিতেন। ইহা কেবল পৌরাণিক কথা বা পুরাকালের সম্ভাবিত ঘটনা নহে। বর্তমানকালেও ঐরূপ ঘটনা দৃশ্যমান। পুত্রের ক্রেশে মাতার অন্তর ব্যথিত হয়। ইহা পুত্র নিকট থাকিলে যেমন ঘটে, দূরে থাকিলেও ঐরূপ হইয়া থাকে। ইহার মূল কারণ, পরস্পরের আত্মায় আত্মায় যোগ। যেখানে ঐ যোগ যত অধিক, পরস্পরের অবস্থার প্রতি সহানুভূতিও তত অধিক।

জগৎ একটা অলৌকিক কার্য্যে বিশ্বয়াপন্ন হয়। কিন্তু প্রতিনিয়ত যে কত অলৌকিক ঘটনা সংঘটিত হইতেছে, তৎপ্রতি কয় জনের দৃষ্টি? দৃষ্টি পড়িলেও মনুষ্য আত্ম-

ব্ৰাহ্মিতে উহার অলৌকিকতা দৰ্শন করে না। কিন্তু প্রকৃতপক্ষে জগতে কিছুই অলৌকিক নহে। ঐন্দ্রজালিক-বিদ্যাভিজ্ঞের নিকট যাহু বা ঐন্দ্রজালিককার্য্য যেরূপ আশ্চর্য্যের ব্যাপার নহে, যোগাভ্যাসীর বা ষেণীগীর নিকট আত্ম-যোগের ব্যাপার সকলও সেইরূপ বিশ্বয়কর নহে।

এক প্ৰীতি হইতেই জগতের উৎপত্তি। প্রকৃতি ও পুরুষ হইতে জগৎপত্তির কথা যাহা কথিত আছে, সেই প্রকৃতি ও পুরুষ দুই স্বতন্ত্র নহে। এক অনাদি পুরুষ, সৃষ্টির কর্তা-রূপে সৰ্ব্বশাস্ত্রে আখ্যাত। জগৎ অনন্তকাল হইতে সেই পুরুষে অবস্থিত ছিল। আত্ম-প্রতি সেই মহান ঈশ্বরের অনন্ত-প্ৰীতি উচ্ছ্বসিত হইলে জগৎ বিকাশ প্রাপ্ত হইল। যেমন সৃষ্টি প্ৰীতির বিকাশমাত্র, দেহীর বিনাশ বলিয়া যাহা আখ্যাত, তাহাও ঐ প্ৰীতি হইতে সংঘটিত হয়। দুই আত্ম-যোগাধিক্যে পরস্পর পরস্পরের অধিক নিকটবর্তী হয়। দেহের বিচ্ছিন্নতাতেই দেহীর আত্মা, পরমাত্মার অপেক্ষাকৃত সন্নিধানতা লাভ করে। ইহাতে পরমাত্মার প্ৰীতির আধিক্যই প্রকাশ পায়। মহাপুরুষদিগের পার্থিব জীবন অল্প-স্থায়ী, ইহা একটা ঐতিহাসিক সত্য। সাধারণে ইহাতে বিশ্বয়াপন্ন হয়। কেহ বা পার্থিব কারণ নির্দেশে তাঁহাদিগের পার্থিব জীবনের অল্পত্বের কারণ নির্দেশ করেন। কিন্তু মূলে দেখিবে, যে পরমাত্মা এবং মহাপুরুষাত্মার মধ্যে প্ৰীতির আধিক্য হেতু এক কর্তৃক অপর সত্ত্বর আকৃষ্ট হইয়া, মহাপুরুষের তিরোধানে তৎসহ পরমাত্মার মহাননন্ত-যোগের নৈকট্য-সংস্থাপনই সংঘটিত হয়।

শ্রীতির আশ্চর্য ক্ষমতা যাহারা জীবনে অনুভব করিয়াছেন, তাঁহারা মানব-জীবনের অলৌকিকতা দর্শনে ধ্বংস হইয়াছেন। পতি-পত্নী পরস্পরের অর্দ্ধাঙ্গভাব জগতে এই একটা শ্রীতির প্রতিমূর্তি আধারণে দর্শন করে। কিন্তু এই অর্দ্ধাঙ্গভাব যে প্রত্যেক দুই আঙ্গায় সম্ভব, তাহা অন্নায়াসে হৃদয়-স্পন্দ করিবার সাধ্য থাকিলেও, অল্প জনেই তদ্বিষয়ে যত্নবান্ হয়। যাহারা ঐ দিকে যত্নও করেন, তাঁহারা কৃতার্থতা লাভেও স্মৃথী হইয়েন।

জগতে ইহা নিত্য দর্শনের ব্যাপার যে তুমি একজনকে শ্রীতি প্রদান কর, তাহার শ্রীতি তোমার প্রতি প্রত্যাগিত হইবে। তৎপর, আশ্চর্য্যাবিত হইবে যে দূর হইতে তোমার হর্ষে তিনি হর্ষযুক্ত হইবেন, এবং তোমার ক্রন্দনে তিনিও নেত্রাশ্রু বিসর্জন করিবেন। পরস্পর এই ভাবে যেমন চমকিত হইবে, তেমনি স্মৃথীও হইবে। পরে এই আঙ্গার যোগ বন্ধমূল হইলে, তড়িতের দ্বারা সংযুক্ত দুইটা স্থান সদৃশ একের সংবাদ আপনিই অপরের নিকট আসিবে। তখন আর তোমার বিশ্বয় থাকিবে না। কিন্তু অল্প সাধারণের নিকট ঐ সংযুক্তাঙ্গায় বিশ্বয়জনক দৃশ্যরূপে প্রতিভাত হইবে। যাহারা এই আঙ্গায়োগ শিক্ষা করিয়া জগতে যোগী হইয়াছেন, শ্রীঅদ্বৈত নিত্যানন্দের অদ্বৈতভাব পৃথিবীকে দেখাইয়া আপনারা স্মৃথী হইয়াছেন এবং জগৎকেও স্মৃথী করিয়াছেন, তাঁহারা ই ধ্বংস।

---

## ২১। রচনা।

প্রত্যেকেই এক একটি ক্ষুদ্র বা বৃহৎ রচনাকার। যে মুর্খ, তাহারও রচনাশক্তি আছে। তাহার সহিত কথোপকথনে প্রবৃত্ত হও, তাহার সেই শক্তির পরিচয় পাইবে। রচনা একটা ভাবের পরিব্যঞ্জক ভাষামাত্র। যেমন প্রত্যেক জীবন এক একটি প্রধান ভাবের বিকাশভূমি, প্রত্যেক রচনাও সেইরূপ এক একটি মূল ভাবের বিকাশস্থল। হৃদয়ে ভাবের উচ্ছ্বাস হইলে রচনা আপনিই স্ফূরিত হইবে। একটা ভাব লইয়া আরম্ভ কর, কত সহায়ভাবক ভাব আপনিই উপস্থিত হইবে; উদাহরণ, অলঙ্কার, কবিত্বাদি সমুদায়ই আপনা আপনি তোমার সহায়তা করিবে।

কথিত আছে, “উত্তম আরম্ভে অর্দ্ধ পরিসমাপ্তি সংসাধিত হয়।” যখন রচনায় প্রবৃত্ত হইবে, প্রথম ভূমিপত্তনটা উৎকৃষ্ট করিয়া লইবে। তৎপর তাহাতে যে চিত্রখানি অঙ্কিত বা প্রতিফলিত করিবে, তাহাই স্পৃহা ও উৎকৃষ্ট হইবে। রঙের জন্ত চিন্তা করিবে না। স্বভাবের মধ্যে রং দেখিলেই রং ফলাইতে পারিবে। হয় ত তোমার অভিধান অল্প। তাহাতেও সঙ্কোচের কারণ নাই। প্রাকৃতিক অভিধান, যাহা প্রত্যেক মানবের পৈতৃক সম্পত্তি, সেই ভাণ্ডার হইতে ইচ্ছামত রত্নগুলি আপনিই আসিবে। সর্বকার্য্যে হৃদয়ের প্রকৃত ব্যগ্রতার প্রয়োজন। এই ব্যগ্রতাই সেই ভাণ্ডার-গৃহের কুঁজি-স্বরূপ। ইহা লইয়া উপস্থিত হও, সমস্ত ভাণ্ডারের দ্বার উদ্ঘাটিত হইবে। ভাণ্ডারের ধনও তোমাকে

পরিশ্রম করিয়া নির্বাচন করিয়া লইতে হইবে না। তুমি যে মালা গাঁথিবার মানস করিয়াছ, তাহাতে যেখানে যে রত্নের আবশ্যক, সেই সেই রত্ন আপনা আপনিই শৃঙ্খলামত সংলগ্ন হইয়া যাইবে। ভাবোচ্ছ্বাসের আতিশয্য এবং সত্যান্বেষণে ব্যগ্রতার আধিক্য থাকিলে, এমনই সহজে ঐ রত্নহার প্রস্তুত হইবে, যে শেষে আপনার কার্যে আপনিই চমকিত হইবে।

হৃদয়ের ভাবোদগম হইলেই তাহা লিপিবদ্ধ করিবে। জলাশয়ে নামিয়া মৎস্ত শিকারে প্রবৃত্ত হইলে, মৎস্তও অন্বেষণ করিতে হয়, এবং মৎস্ত-স্থাপনের উপাদানও সঙ্গে সঙ্গে রাখার প্রয়োজন। সেইরূপ হৃদয়-ভাবগুলি ধারণ করিয়া রাখার জন্ত, লেখনীয় দ্রব্যসহ সর্বদাই প্রস্তুত থাকা কর্তব্য।

সরস্বতী বা দেববাণীর আবির্ভাব সকল হৃদয়েই হইয়া থাকে। ব্যগ্রতা এবং সত্যান্বেষণে যেখানে, দেববাণীও সেইখানে। কিন্তু দেববাণীর আবির্ভাবকাল সকল সময়ে সমান নহে। সুসময় আসিলেই ঐ সুযোগের উপযুক্ত ব্যবহার করিবে। ভ্রমণার্থ নির্গমনের মাহেঞ্জক্ক্ষণের কথা কথিত আছে। তদ্রূপ রচনারও মাহেঞ্জক্ক্ষণ আছে। ঐ মাহেঞ্জক্ক্ষণ অতীত করিয়া ফেলিলে তোমার ভাবোচ্ছ্বাসও কমিয়া যাইবে। শুভক্ক্ষণে বাহা করিবে, তাহার নূতনত্ব চিরদিনই থাকিবে। তাহা দেশকালে আবদ্ধ থাকিবে না। রচকের ভাবোচ্ছ্বাস চিরদিনই অপরের ভাবোচ্ছ্বাসের কারণ হইবে।

হৃদয়েরও জোয়ার ভাটা আছে। জোয়ারের সময় নৌকা

ছাড়িয়া দিলে তাহা উর্দ্ধ্বাসে চলিয়া যাইবে। ভাটায় উজান-গমনে অধিক সময় লাগিবে। এই জোয়ারভাটা তোমারই আয়ত্ত। চন্দ্রের আকর্ষণে নদী যেমন ক্ষীত হয়, তদ্রূপ সত্যের আকর্ষণে হৃদয় ক্ষীত হয়। সত্যে আর হৃদয়ে যোগ থাকিলে, স্বতঃই হৃদয়ে জোয়ার খেলিতে থাকিবে। এবং রচনাতরণী আপনা-আপনিই তীব্রবেগে চলিতে থাকিবে। এই যোগ প্রাকৃতিক-যোগ করিয়া লও, হৃদয়ে নিত্য জোয়ারের ক্রিয়া হইতে থাকিবে।

যাত্রার গম্যস্থান যেমন অগ্রেই স্থির থাকে, সেইরূপ রচনারও সীমা অগ্রেই স্থির করিয়া লইবে। তোমার নিজ শক্তির পরিমাণানুসারে অথবা আবশ্যকতানুসারে তোমার সীমার দূরত্ব বা অন্তত্ব স্থিরীকৃত হইবে। কিন্তু একবার তাহা স্থির করিয়া লইলে তুমি তোমার গম্যস্থানে অবশ্যই পৌঁছিবে। এক সময়ে না পৌঁছিতে পারিলেও হানি নাই। অদ্য কতক দূর গমন করিতে পারিলে, সময়ান্তরে আরও অধিক অগ্রসর হইবে। কিন্তু মস্তিষ্কে অধিক নিপীড়িত করিবে না। দ্বিতীয় ভাবোচ্ছ্বাসের অপেক্ষা কর। তাহা উপস্থিত হইলে বাকি কার্য সহজেই সমাধা করিতে পারিবে।

## ২২। প্রায়শ্চিত্ত ।

ইহার দ্বারাই মনুষ্য নষ্টধন পুনঃ প্রাপ্ত হয় ;  
এবং ভগ্ন-সামগ্রীর পুনঃ সংযোগ সাধন করিয়া থাকে ।

ইংরাজী ভাষায় ইহার প্রকৃত-ভাব-জ্ঞাপক একটা সুন্দর শব্দের\* ব্যবহার আছে। ঐ শব্দের মূলার্থ “এক হওয়া”। বাস্তবিকই, প্রায়শ্চিত্ত দ্বারা দুইটা বিচ্ছিন্ন বস্তু পুনশ্চ এক হইতে পারে। ঈশ্বর হইতে মানবাত্মা বিচ্ছিন্ন হয়, এই জন্ত সর্বশাস্ত্রে প্রায়শ্চিত্তের বিধির উল্লেখ আছে। কিন্তু মনুষ্য প্রায়শ্চিত্তসময়ে প্রায় কেবল আংশিক বিধি লইয়া কার্য্য আরম্ভ করে। তড়াগবারি যখন সমুদ্রের দিকে অগ্র-সর হয়, তখন উভয়ের মধ্যস্থিত পয়ঃপ্রণালী ও নদ প্রভৃতি দিয়াই গমন করিয়া থাকে। পরমাত্মার মনুষ্যাত্মার গমনও তাদৃশ। স্বীয় জনক জননী হইতে নিজ অবাধ্যতা হেতু বিচ্ছিন্ন হইয়া থাকিলে, স্বীয় ভ্রাতা ও ভগিনীর প্রতি চির অক্ষুণ্ণ স্নেহ প্রকাশই ঐ পাপের প্রায়শ্চিত্ত; এবং তাহাতেই বেরূপ জনক-জননীর সহিত পুনর্ব্যোগ সংস্থাপিত হয়, তদ্রূপ পরমাত্মার সহিত এক হইবার ইচ্ছা থাকিলে, তাঁহার সম্মান-গণের সহিত সর্বাগ্রে এক হওয়ার প্রয়োজন এবং তাহাই ঈশ্বরে ব্যোগ স্থাপন করিবার একমাত্র উপায়। ভ্রাতা ভ্রাতাকে স্নেহ করিতে দেখিলে যেমন মাতার আনন্দ, তেমনি ঐরূপ প্রীতিতে জগৎজননীরও আনন্দ। এই জন্তই খ্রীষ্ট বলিয়াছেন, “অগ্রে ভ্রাতার সহিত মিলিত হইয়া, পরে পূজোপহার প্রদান করিতে আসিবে।”

প্রায়শ্চিত্ত অন্তরের, ইহা বাহিরের নহে। এবং ইহাও আত্মার নিত্য করণীয় কার্য্য। নিত্য প্রায়শ্চিত্তে আত্মার

আত্মায় যে যোগ সংস্থাপিত হয়, তাহাতে কুত্রাপি বিচ্ছেদ নাই। বন্ধুর সহিত বন্ধুবিচ্ছেদ শুনা যায়। জানিবে, সেখানে প্রায়শ্চিত্ত-বিধি প্রচলিত নাই, অথবা কখনও তাহা তথায় অনুষ্ঠিত হয় না।

ব্যক্তিগত প্রায়শ্চিত্ত যেমন একের সহিত অপরের যোগ স্থাপনের জন্ত আবশ্যক, সামাজিক ও জাতীয় প্রায়শ্চিত্তের আবশ্যকতাও তদ্রূপ। সমাজের প্রতি সমাজের বিরোধ, জাতির প্রতি জাতির শত্রুতা, এই প্রায়শ্চিত্ত-বিধির অবমাননাই তাহার কারণ। এক মনুর সন্তানই মানব; ইহা যেমন বৈয়াকরণিক সত্য, প্রকৃতি ও শাস্ত্রানুসারেও ইহা সত্য। তবে সম্প্রদায়ে সম্প্রদায়ে বিবাদ কেন? পরস্পর পরস্পরের প্রতি অপরাধী, এবং সেই অপরাধের কেহ প্রায়শ্চিত্ত করেন নাই; এই জন্তই সেই বিবাদ দৃষ্ট হয়। এখানে উচ্চের বা নিম্নস্থের প্রায়শ্চিত্তের তারতম্য নাই। নিম্নসহ উচ্চের যোগ অনাবশ্যক বিবেচনায় কেহ প্রায়শ্চিত্তেরও অনাবশ্যকতা বিবেচনা করিতে পারেন, কিন্তু তাহা ভ্রম। নিম্নের সহানুভূতি ভিন্ন উচ্চের রক্ষা কোথায়? এই সহানুভূতিতেই জগতের শান্তি। মানব যদি বাস্তবিকই নিজ শান্তির জন্ত আকাঙ্ক্ষিত হয়, প্রত্যেকে এই প্রায়শ্চিত্ত-বিধির অনুষ্ঠান করুক। অস্ত্রের অপরাধ ক্ষমা করিয়া স্বরূতাপরাধ ক্ষমার জন্য যে প্রার্থনা, তাহাই প্রকৃত প্রার্থনা। দেবাত্মজ যীশু এইরূপ প্রার্থনাই করিতে বলিয়াছিলেন। এই প্রার্থনায় প্রায়শ্চিত্ত এবং মুক্তি যুগপৎ সংসাধিত হইবে।



## ২৩। কথোপকথন।

সকলেই বঁড়শী দ্বারা মৎশ-শিকারার্থ তড়াগকূলে উপ-  
বিষ্ট। কাহারও চেষ্টা সফল হইল, এবং কেহ বা সম্পূর্ণ  
শূন্যহস্তে প্রত্যাবৃত্ত হইল। একের তাবৎ উপকরণগুলি ঠিক  
ছিল, নিজের মানসিক প্রবৃত্তিও স্থির, তজ্জন্যই সে মৎশ  
ধরিতে সমর্থ হইল। অপরের আবশ্যকীয় উপকরণের  
অভাব, স্মরণে সে মিথ্যা সময় ক্ষেপণ করিয়া চলিয়া গেল।

কথোপকথন একটা সরোবর; তথায় জ্ঞানমীন নিয়তই  
অধিবাস করিতেছে। পঙ্কিল পুষ্করিণী-মধ্যেও মৎশ বাস  
করে। যে ধীবর বা প্রকৃত শিকারী, সে মৎশ ধরিয়াই  
আপন কার্যসাধন করে। সাধারণে কর্দমযুক্ত হইয়াই  
চলিয়া যায়।

কথোপকথনে যদি কিছু সঞ্চয় না হইল, সে কথোপ-  
কথনই বৃথা। ব্যবসা লাভের জন্য। বাক্য, জ্ঞান-লাভ-ব্যব-  
সার জন্য প্রদত্ত হইয়াছে। লাভ না করিতে পারিলে তুমি  
প্রদত্ত ধনের অপব্যবহার করিলে। তোমার একটা লক্ষ্য  
ঠিক থাকিলে, কথোপকথনে অবশ্য তোমার লাভ হইবে।  
দুই কাষ্ঠ ঘর্ষণেও অগ্নি-সঞ্চারণ হয়। দুইটা হৃদয় পরস্পরের  
সহিত সংঘর্ষিত হইলে ভাবাগ্নি উদ্দীপিত হয়। অগ্নিহোত্রী  
যিনি, তিনি সেই অগ্নিই ধারণ করিয়া রক্ষিত করেন।  
তবে কাষ্ঠের ঘর্ষণে সর্বদাই যে অগ্নি উদ্ভাবিত হইবে, তাহা  
সম্ভব নহে। তজ্জন্য কাতর বা অধীর হইবে না। কাষ্ঠ-  
ঘর্ষণ-সংঘর্ষণে অগ্নি আবির্ভূত না হইলে তাহা কাষ্ঠের দোষ।

যখন কথোপকথনে ফললাভ না হইল, তখন নিশ্চয়ই কথোপকথনকারী উভয়ের, কিংবা অন্যতরের দোষ জানিবে। কথোপকথনে ফললাভের অভিলাষী হইলে মনকে প্রস্তুত রাখিয়া তাহাতে প্রবৃত্ত হইবে, এবং সর্বদা সচকিত থাকিবে। নিদ্রিতাবস্থায় চক্ৰমকিতে আঘাত করিলে অগ্নি প্রজ্বালিত করিতে পারিবে না। চেতনাতেই চৈতন্যের প্রকাশ পাইবে।

কথোপকথনে উৎকর্ষ লাভ করিতে হইলে, যে নিয়মে সেই উৎকর্ষ লাভ হয়, কুত্রাপি তাহা উল্লঙ্ঘন করিবে না। ঠিক সোজা যাইবার অভিপ্রায় থাকিলে, বিনাশ্রয়ে অন্ধকার-মধ্যে তাহা পারিবে না। কিন্তু স্থানটী একবার অভ্যস্ত হইয়া আসিলে, আশ্রয়ের দিকে দৃষ্টি বা তত্পরি অবলম্বন না রাখিলেও চলিতে পারিবে। প্রত্যেক বিষয়ের শাখা প্রশাখা আছে। একটী শাখা অধিকৃত হইলে, তৎপর অপর শাখা ধারণ করিতে প্রয়াস পাইবে। কিন্তু বৃক্ষারোহী যেমন শাখা হইতে শাখান্তর অবলম্বন করিলেও নিজ গম্য স্থানের প্রতি লক্ষ্য রাখে; সেইরূপ কথোপকথনে উৎকর্ষ লাভ করিতে হইলে এক প্রকৃত জ্ঞান বা সত্যের দিকেই দৃষ্টি রাখিবে। তোমার জীবনের লক্ষ্য ঠিক থাকিলে, তোমার বাক্যও আনন্দপ্রদ হইবে। ন্যায় বা অলঙ্কারশাস্ত্র তোমার পঠিত না থাকিলেও স্বাভাবিক ন্যায়ালঙ্কারে তোমার বাক্য বিভূষিত হইবে। ছিদ্রাশ্বেষী কঠোর-সূত্র মিলাইয়া তোমার ন্যায় বা অলঙ্কার-পরিপাট্যের দোষাবিষ্কার করিতে পারিলেও তোমার মুখের নিকট সে অবশ্যই পরাস্ত হইবে। সম্মুখ-

যুদ্ধে পরাস্ত করণই বীরত্ব । তুমি সত্যব্রতিক হইলে তোমার এই বীরত্বেই জগৎ স্তম্ভিত হইবে ।

## ২৪ । লক্ষ্যবস্তু ।

ব্যাধ সপ্তনলি দ্বারা পক্ষী শিকার করে । তাহার হস্তে কতিপয় নল ; ক্রমশঃ একটার উপর একটা স্থাপিত হই-  
তেছে, কিন্তু লক্ষ্য তাহার পক্ষী । শেষে নলের দ্বারাই সেই  
পক্ষী তাহার করতলস্থ হয় । যাহার জীবনের লক্ষ্য এক,  
তাহার লক্ষ্যসাধন নিশ্চয়ই হইয়া থাকে । তুমি জ্যোতিবী  
হইবে, নূতন নূতন নক্ষত্র তোমার নয়নপথে স্বতঃই নিপ-  
তিত হইবে । তুমি সধক্ত হইবার ইচ্ছা করিয়াছ, সধক্তার  
নিয়মাবলী আপনা আপনিই তোমার বোধগম্য হইবে ।  
জ্ঞানোপার্জনে ব্রতী হইয়াছ, কত রত্নই ক্রমশঃ তোমার  
অধিকৃত হইবে ।

জীবনে সর্বদা একটা লক্ষ্য রাখিয়া চলিবে । সেই  
লক্ষ্য সাধন হইলে দ্বিতীয় অবলম্বন করিবে । অন্যথা,  
একই সময়ে দুইটা পক্ষীর প্রতি ধাবিত হইলে একটাও কর-  
কবলিত না হওয়ারই সম্ভব । পুনশ্চ, জীবনে বহুল ক্ষুদ্র  
ক্ষুদ্র লক্ষ্য বস্তু থাকিলে একটা মহালক্ষ্য যাহার নাই,  
তাহার জীবন অসম্পূর্ণাবস্থায় অবসান হইবে । কথিত হই-  
য়াছে যে, প্রত্যেক জীবন একটা প্রধান ভাবের বিকাশ-  
ভূমি । সময়ে সময়ে বিদ্যাদালোকের ন্যায় এই ভাব হৃদয়ে  
ক্ষুরিত হইবে । ঐ ভাবটী ধরিতে পারিলেই তোমার

জীবনের লক্ষ্য স্থির হইল। তৎপর ইহ জীবনে যতদূর অগ্র-সর হইলে, তোমার সেই লক্ষ্যের দিকেই গতি হইল। লক্ষ্য ভিন্ন জীবনের গতি, মহাসমুদ্রে দিগদর্শন-যন্ত্র বিনা অর্গব-যানের গতি তুল্য। ঘুরিয়া ঘুরিয়া পরিণামে বৃদ্ধবৃদ্ধের ছায়া যেমন ঐ অর্গব-তরী জলসাৎ হইবে, কেহই তাহা জানিবে না, লক্ষ্য-বিহীন জীবনের অবস্থাও তদ্রূপ ঘটিবে।

বীজমন্ত্র বলিবার বিষয় নহে। অপক বা অসিদ্ধাবস্থায় লক্ষ্যের প্রকাশ অনুচিত। প্রকাশের দ্বারা অপরের কুদৃষ্টিতে হয় ত মন্ত্রের মাহাত্ম্য বিলুপ্ত হইবে। অথবা অহঙ্কার উপস্থিত হইয়া সেই মন্ত্রের সঞ্জীবনী শক্তিকে নষ্ট করিবে। কিন্তু মন্ত্রবান্ ব্যক্তি সময়ে ফলের দ্বারা পরিচিত হইবে। তদবস্থায় পরিচয়ে কোন হানি নাই।

বীজমন্ত্রটী সর্বদা ঠিক রাখা আবশ্যিক। তৎপর “ মন্ত্রম্ বা সাধয়েয়ম্ শরীরম্ বা পাতয়েয়ম্ ”। এই দুই মন্ত্র এক হইলে অতি সহজেই তোমার মূল মন্ত্র সাধিত হইবে। এই অবস্থায় যেখানে যখন থাকিবে, মূল মন্ত্রের পোষক প্রমাণ জাজল্যরূপে দেখিতে পাইবে। পুস্তকপাঠে নিযুক্ত থাক বা কথোপকথন কর, আফ্লাদ আমোদ কর বা কোন সারবান্ কার্যে ব্রতী থাক, তোমার লক্ষ্য বস্তুকে পুষ্টিকায় করিবার বহুল সামগ্রী পাইবে। নিপুণ চিত্রকর যেমন আকাশে স্বচিত্রানুরঞ্জনের উপযুক্ত স্ফুৰ্ণাদি দেখিতে পান, তেমনি পৃথিবীতেও তাহা পাইয়া থাকেন। রং কলাইবার জন্ত কোন বস্তুই তাঁহার অনাদরণীয় নহে, বরং তিনি প্রত্যেকের সৌন্দর্য্য-গ্রহণ করিয়া আপন কার্য সাধন করিয়া লয়েন। সেইরূপ

লক্ষ্যযুক্ত ব্যক্তি অপরের অলক্ষিত বস্তু হইতে আপন লক্ষ্য-সাধন করিয়া লয়। জহরী অঙ্গার-রাশি বা আবর্জ্ঞনস্তূপ হইতেও রত্ন আবিষ্কার করে। সাধারণে তাহা অব্যবহার্য্য স্তূপই দৃষ্টি করিবে। জীবনের লক্ষ্য স্থির করিলেই তুমি জহরী হইবে; জহরী হইলেই প্রকৃত জীবনরত্ন লাভ করিয়া কৃতার্থ হইবে।

## ২৫। কুসংস্কার ।

মাদক দ্রব্য ও কুসংস্কার উভয়ই সমান। উভয়ের ফল মানব-জীবনে সময়ে অবশ্যই লক্ষিত হইবে। আপাততঃ যৌবনে বা স্বাস্থ্যের প্রাচুর্য্যে মাদকের কালিমা মাদক-সেবীর আশ্রে প্রকাশিত নহে। বলের হ্রাস হইলে ফলেরও প্রকাশ হইবে। সেইরূপ তুমি আপাততঃ সভ্যতা বা জ্ঞানের তেজে তেজীয়ান্ এবং তোমার আত্মা আকাশমার্গে উড্ডীন। সংসার-পিঞ্জরে আবদ্ধ হইলেই কুসংস্কারের বিক্রম তোমাতে অবশ্যই পরিলক্ষিত হইবে।

এ সংসারে কুসংস্কার অপেক্ষা অধিক অনিষ্টকর আর কিছুই নাই। ইহার দ্বারা মনুষ্য কর্তৃক মনুষ্যহত্যা পর্য্যন্ত হইয়াছে এবং এখনও হইতেছে। বোধ হয় জ্ঞানের প্রভাবে তুমি ঐরূপ ভীষণ কুসংস্কার দূরীকরণে সক্ষম। কিন্তু এমন কতকগুলি সংস্কার আছে, যাহা তদপেক্ষা অধিক ক্ষুদ্র নহে, কিন্তু তাহা তুমি সম্ভবতঃ পরিত্যাগ করিতে অপারগ। এই-রূপ কুসংস্কারের অধীন হইয়া মনুষ্য বন্ধুর সহিত বন্ধুত্ব-

বিচ্ছেদ করিতেছে, এবং এক ভ্রাতা অপর ভ্রাতাকে অনা-  
য়াসেই অপমান করিতেছে। তোমার জীবন যদি এক সত্যের  
বশবর্তী হয়, তাহা হইলে এই কুসংস্কার হইতে নিষ্কৃতি ;  
নতুবা তোমার বিদ্যার গৌরব কি বুদ্ধির প্রথরতা, কিছতেই  
তোমাকে উহা হইতে রক্ষা করিতে পারিবে না।

ব্রাস্ত সংস্কার সর্বদাই মনুষ্যকে উদ্যম-বিহীন করিয়া  
পাকে। তুমি কোন স্মহৎ কার্যে প্রবৃত্ত হইবার ইচ্ছা  
করিয়াছ, এই ব্রাস্ত সংস্কার তোমার উন্নতি-পথের প্রতিবন্ধক  
হইবে। মনুষ্য জ্যোতিষের দ্বারা প্রচালিত হইতে পারিলে  
অবশ্য ভাল হইত। কিন্তু সে জ্যোতিষ কোথায় ? প্রকৃত-  
রূপে পরিচালিত হয়ই বা কে ? যাহারা ধরাধামে দিগ্-  
বিজয়ী হইলেন, জ্ঞানের উচ্চ-শিখরে আরোহণ করিয়া জগৎকে  
স্বস্তিত করিলেন ; যাহারা মানমর্যাদার পরাকাষ্ঠা প্রাপ্ত  
হইয়া ধরাতলে ধন্য হইলেন, তাঁহারা ত জ্যোতিষের দ্বারা  
প্রচালিত হইয়া কৃতার্থতা লাভ করেন নাই। তুমি কয়টি  
নক্ষত্র দেখিয়া নিজ গতিবিধি স্থির করিবে। কয়টি নক্ষত্রই  
বা আবিষ্কার হইয়াছে। একটি পুষ্যা তোমার সহায়তা  
করিল, কিন্তু শত শত অনাবিষ্কৃত মঘা তোমার বিরুদ্ধে  
রহিয়াছে তাহা কি বুঝিলে না ? একটি অমৃতযোগের জন্য  
অপেক্ষা করিবে, কিন্তু সহস্র অলক্ষিত অমৃতযোগ যে বহিয়া  
গেল, তাহা তুমি ভাবিয়াও দেখিলে না। ঈশ্বরের রাজ্যে  
সকল সময়েই শুভযোগ। তুমি প্রকৃত জ্যোতিষী নহ বলিয়া  
তাহা উপযুক্ত রূপে ব্যবহার করিতে সক্ষম নহ। হৃদয়-  
মধ্যে ভগবৎ-বাণী শ্রবণ করিয়া কার্যে প্রবৃত্ত হও, সমস্তই

তোমার কল্যাণকর হইবে। অন্তরাকাশে একটা স্থূল নক্ষত্র সর্বদাই বিরাজিত। সেই নক্ষত্রকে তোমার অমুকুল করিয়া লইতে পারিলেই তোমার অমঙ্গল অসম্ভব।

কিন্তু কুসংস্কার পরিত্যাগ করিতে গিয়া তৎসহ স্ত্রুসংস্কার যেন পরিত্যক্ত না হয়। প্রেতের আঞ্জাধীন হওয়া যেমন দূষণীয়, প্রেতের স্থিতি একেবারে অস্বীকার করাও তেমনি গর্হিত। একটাতে তুমি কুসংস্কারাপন্ন প্রেতবাদী হইলে; অপরটা তোমাকে নাস্তিক করিল। তুমি প্রেতবাদী হইলে খ্যাতি-পন্ন হইবে, ইহার জ্ঞা যেন তুমি প্রেতবাদী না হও। ঈশ্বরের আলোকে যতটুকু মানা আবশ্যক, তাহাই মানিবে। আলোক পাইবার জন্য আয়াস কর, সময়ে যথার্থ তাহা পাইয়া কৃতার্থ হইবে। ইহাতে দাস্তিকতা বা অহঙ্কার নাই। সাধিলেই সিদ্ধি; যত্ন কর, সিদ্ধি লাভ করিয়া তোমার শ্রেয়-কারী শত্রুদিগকে তুমি অনায়াসে পরাস্ত করিতে পারিবে।

## ২৬। মতামত ।

মহাকবি সেক্সপিয়ার বলিয়াছেন, “প্রত্যেক মনুষ্যকে তোমার কর্ণ দিবে, কিন্তু অল্পকেই তোমার স্বর প্রদান করিবে।” ইহা বৈষয়িক বুদ্ধি বটে, এবং সময়ে ইহা সং-বুদ্ধিও সন্দেহ নাই। মুকের শত্রু নাই, ইহা জ্ঞানের কথা। যেখানে কথার আবশ্যক নাই, সেখানে মৌনই শ্রেয়ঃ। কিন্তু ইহাও দেখিবে যেন এই প্রকৃতির দ্বারা কখনও সত্যের অবমাননা না হয়।

সকলেরই উপর সত্য রক্ষণের ভার শ্রুত । পুরাকালে নাইট-এরন্ট\* নামে সত্যের বিশ্ববিজয়ী সেনাপতি-দল ছিলেন । ইঁহারা কেবল ইংলণ্ডে বা ইউরোপে ছিলেন না । বহু প্রাচীনকালে ভারতবর্ষে ইঁহাদিগের প্রথম আবির্ভাব হয় । শ্রীরামচন্দ্র প্রভৃতি এই দলেরই নেতা । যেখানে বাক্যের দ্বারা অর্থাৎ মত-প্রচার দ্বারা সত্যের বিজয়-ঘোষণা না হইত, স্বীয় কার্য্যে এবং জীবনে তাঁহারা উহার ঘোষণা করিতেন ।

মতপ্রকাশ কেবল বাক্যে নহে । বাক্যও সকল অবস্থায় সময়েচিত বা সুসঙ্গত নহে । কোন সময়ে শত বাক্যে যাহা না হইবে, তোমার মৌনাবলম্বনই তোমার মত প্রচারিত করিবে । হৃদয়ের লক্ষ্য ঠিক থাকার আবশ্যক । ভাব আপনিই আশ্বে প্রকাশিত হইবে । তবে মতামত প্রকাশে চিন্তা কি ? সত্যের সৈনিকদল নির্ভীক । বিজয় তাঁহাদিগের পতাকার চিরানুগামী ।

যে স্থলে স্বমত প্রকাশের আবশ্যক, তথায় তাহা প্রকাশে ভীত বা কুণ্ঠিত হইবে না । কিন্তু ইঁহাতে যেন অহঙ্কার উপজাত না হয় । ঐরূপ প্রকৃতিতে তুমি আপনাকে শ্রেষ্ঠ-জ্ঞানীরূপে দৃষ্টি করা অসম্ভব নহে । জীবন লক্ষ্য তোমার ঠিক থাকিলে, অহং বিকাশের কম সম্ভাবনা । লক্ষ্য স্থির থাকিলেই, যথেষ্ট মতামত প্রকাশে আপনিই সঙ্কোচভাব উপস্থিত হইবে । তাহাতেই তোমার রক্ষা হইবে ।



লক্ষ্যের অনিশ্চিততাতেই ভাবের অনিশ্চিততা। স্মৃত রাং মত সারবান্ হইবে না। কথোপকথনেই হউক, আর রচনা-কার্যেই হউক, হৃদয়ের মূল ভাবটী সর্বদা নয়নপথে দেদীপ্যমান রাখিবে। তাহা হইলেই বিপথগমন তোমার পক্ষে অসম্ভব হইবে। অন্যের চক্ষে বিপথগামী দৃষ্ট হইলেও তুমি ধৃষ্টতাদোষে অপরাধী হইবে না; এবং প্রকৃতই বিপথে তোমার গতি হইলেও, তোমার সংস্কারের পথও সহজ থাকিবে।

আত্ম-সংস্কার যাহার লক্ষ্য, তাহার অহঙ্কার উপজাত হইবার সম্ভাবনা নাই। যেখানে “ গুরুগিরি ”, সেইখানেই সত্যের বিনাশ। চিরদিন শিক্ষাকারীর পদে আপনাকে অধিষ্ঠিত রাখ, সংসার বিচরণে তোমার ভয় নাই। তাহা হইলে তোমার মতের যেরূপ আদর হইবে, অন্যের মতও সমাদর করিতে তুমি তক্রপ সক্ষম হইবে।

আদান-প্রদানেই ধনের বৃদ্ধি। প্রদানেই কুসীদের আদায়। জ্ঞানবৃদ্ধি বা মত-সংস্কারের ইচ্ছা থাকিলে, ঐ আদান-প্রদান বা ক্রয়-বিক্রয়ের প্রয়োজন। সত্যাত্মেবী হইয়া ঐ ক্রয়-বিক্রয় করিলে উন্নতি ভিন্ন অবনতির সম্ভাবনা নাই।

বিক্রেতা যেমন নিজ দ্রব্য ভাল চক্ষেই দেখিয়া থাকে, সত্যের বাজারে প্রতি বিক্রেতা সেইরূপ আপন দ্রব্যের অধিক সমাদর করেন। এবম্বিধ নিজ শ্লাবারও আবশ্যকতা আছে। নিজের আদর না জানিলে, পরের আদর হয় না। স্বীয় সম্মানাজ্ঞ ব্যক্তি সর্বদা অব্যবস্থিত-চিত্ত; স্মৃতরাং তাহার প্রকৃত সংস্কার সাধিত হইবার সম্ভাবনা কম।

সর্বদা গ্রহণেই অধিক তৎপর থাকিবে। অপিচ ভিক্ষকের গ্রহণতৎপরতা হইতে আপনাকে বিশেষ মনোযোগী রাখিবে। এতৎসম্বন্ধে তুমি ভূপালের ঞায় উচ্চ-প্রকৃতি-বিশিষ্ট হইবে। যেমন সমস্ত বস্তুই ভূপালের গ্রহণাধিকারে থাকিলেও, অত্যাংকুষ্ঠ রত্নই তাঁহার কোষাগারে স্থিতি লাভ করে, এবং তাঁহার দানও সর্বদা ঐরূপ উৎকৃষ্ট হইয়া থাকে, সেইরূপ উচ্চ সত্যমত গ্রহণ এবং তাদৃশ সত্যমত প্রদানই তোমার জীবনের লক্ষ্য করিবে।

### ২৭। ভূত্যের প্রতি ব্যবহার।

পুরাকালে ঋষিদিগের শিষ্য ও ভূত্যের কোন প্রভেদ ছিল না। উভয়েই শিষ্য নামে বাচ্য হইত। বাস্তবিক ভূত্য, শিষ্য বা পুত্রবৎ আচরণীয়। যাহার দ্বারা জীবনের তাবৎ আবশ্যকীয় কার্য সম্পাদিত হয়, সে অবশ্যই বাৎসল্যার্থ।

স্নেহ, স্নেহের বিনিময়। মনুষ্য প্রেমেই বশীভূত। সদ-ভূত্যের ইচ্ছুক হইলে, আপনাকে অগ্রে সং করিবে। নিম্ন-স্বের প্রতি উচ্চের প্রীতি অতীব সূন্দর। সেই প্রীতির বিনিময়ও অধিক। এবং তাহাতে উচ্চের মহত্বেরই অধিক প্রকাশ পায়। এক গুণ দানে শত গুণ প্রাপ্তির কথা কথিত আছে। ভূত্যের প্রতি প্রভুর প্রীতি দানে ঐরূপ ফলই প্রাপ্তি হইয়া থাকে।

স্নেহেই জগৎ পরাজিত। ভূত্য সম্বন্ধে ইহা নিতান্ত

সত্য। ক্রোধ বা শাস্তিতে মানুষ শাসিত নহে; কিন্তু ম্লেহ ও দয়ার শাসনে সে অবশ্যই পরাভূত। কোন সেনাপতির অধীন একজন সৈনিক-পুরুষ কৰ্ম করিত। ঐ সৈনিক-পুরুষের চরিত্র বিশেষ সন্তোষজনক ছিল না। সেনাধ্যক্ষ নানাপ্রকারে তাহার শাসন করিতেন; এমন কি, সময়ে সময়ে তাহাকে সাংঘাতিক প্রহারও করিতেন। তথাপি তাহার সংশোধন হইল না। যে অপরাধের জন্ত সে সৰ্বদা দণ্ডিত হইয়া থাকে, পুনশ্চ একদা সে সেই প্রকার অপরাধ করিল। প্রভু তাহাকে নিজ সমক্ষে ডাকিলেন, এবং তিরস্কার করিয়া বলিলেন, “তুমি বার বার অপরাধ কর এবং তজ্জন্ত গুরুতর দণ্ডও প্রাপ্ত হইয়া থাক, তোমার কি কিছুতেই সংশোধন হইবে না?” প্রভুর একটা বালক-ভৃত্য ছিল। সে ঐ সমস্ত কথা শুনিতেছিল। শেষোক্ত কথাটা শুনিবার পর বলিল, “স্বামিন্! আপনি সৰ্বদাই ত উহাকে প্রহার করেন, কই উহাকে ত একবার ক্ষমা করেন নাই?” প্রভু বালকের বাক্য শুনিয়া তদ্ভাবে বিমুগ্ধ হইয়া অপরাধীকে বলিলেন, “আমি তোমাকে এইবার ক্ষমাই করিলাম।” অপরাধী বিস্ময়াপন্ন হইল। ভাবের লহরী তাহারও হৃদয়ে উথিত হইল। সেই দিন হইতে চিরদিনের জন্ত তাহার জীবন-সংস্কার সাধিত হইল। এই ঘটনাটা যেমন সত্য, ইহার অন্তর্ভূত ভাবটাও তেমনি সত্য। ম্লেহের দাসই প্রকৃত দাস; ক্রোধের শাসন, রাগের শাসন।

পরন্তু সময়ে ক্রোধেরও প্রয়োজন। পুত্রকে এবং ভৃত্যকে ম্লেহ করিবে এবং সময়ে তাড়নাও করিবে। ক্রোধে ম্লেহের

বিকাশ কোথায়? পিতার বা মাতার ক্রোধদৃষ্টিতেই সেই স্নেহ দৃশ্যমান। সেইখানেই কঠোরতাতে মধুরতা বিরাজমান। আবশ্যক হইলে, পিতার কোপদৃষ্টি ভৃত্যের প্রতি সময়ে প্রক্ষিপ্ত হইতে পারে। কিন্তু সকল কার্যের যেমন উচিত সময় আছে, কোপ প্রকাশেরও তাদৃশ কালকাল আছে। ভৃত্যের প্রতি অবধা কোপ প্রকাশে অনিষ্টই হইয়া থাকে। তুমি উচিত বিবেচনা না করিয়া ভৃত্যের উপর অধিক কার্যভার গুস্ত করিলে। ভৃত্য তাহাতে অপারগতা বা শিথিলভাব প্রকাশ করিল। ইহাতে তোমার ক্রোধ উদ্দীপিত হইলে তুমি যে কেবল ভৃত্যের কার্যক্ষমতা নষ্ট করিলে তাহা নহে, তুমি সেই ভৃত্য কর্তৃক নিজ কার্যসম্পাদনেও অসুবিধা উপস্থিত করিলে। ভৃত্যকে সর্বদা আশ্রয়িত দেখিবে। তাহাতে তুমি যেমন ভৃত্যের আশ্রয়িত্য লাভ করিবে, তেমনি আশ্রয়িত্য-লাভেও সুখী হইবে।

## ২৮। বিষাদ।

কুস্বপ্ন এবং বিষাদ উভয়ের শান্তি সময়ে বা প্রকাশে। উভয়ের উৎপত্তিও এক। একটা নিদ্রিতাবস্থার মনোবিকার; অপরটা জাগ্রতাবস্থার। স্বপ্ন ও বিষাদ মানুষের সম্পূর্ণায়ত্ত না হইলেও আয়ত্তের সম্ভব। সুস্থ মনের স্বপ্ন নাই, বিষাদও নাই। স্বাস্থ্যোৎপাদন স্বীয় আয়ত্তের বিষয় বটে। তুমি মনকে প্রকৃতরূপে গঠিতে পারিলে তথায় বিষাদের প্রবেশ সম্ভবপর নহে।

পরন্তু শরতের চন্দ্রিকা প্রতিনিয়ত উপভোগের বস্তু নহে। কোন সময়ে তাহা মেঘাচ্ছন্নও হইতে পারে। অজ্ঞান বা বাতুল শশী অলক্ষিত হইলে ক্রন্দন করিবে, অথবা চন্দ্রমার পুনর্বিকাশের আশা হইতে নিরাশ হইবে। প্রকৃতিস্থমনার জ্যোৎস্নাভ্যুদয়ে যে আনন্দ, মেঘাচ্ছন্ন চন্দ্রালোকেও সেই আনন্দ।

স্বপ্নপ্ত ব্যক্তি জাগরিত হইলেই স্বপ্নের অবসান। বিষণ্ণ ব্যক্তিও আত্মভ্রম হইতে আত্মজ্ঞানে উপস্থিত হইলে বিষাদ হইতে তাহার নিষ্কৃতি। স্বপ্ন ও বিষাদ চিরস্থায়ী নহে। কিন্তু কুসংস্কার বা অজ্ঞানতার আধিক্যামুসারে ঐ দুইয়েরই স্থায়িত্বের আধিক্য হইয়া থাকে। স্বপ্ন বা দুঃস্বপ্ন যাহার বিবেচনায় দুই সমান বা দুই কিছুই নহে, ঐ দুইয়ের ফলাফল চিন্তায়ও তাহার মন আকুলিত নহে। সুখ দুঃখ যাহার সমান জ্ঞান, তাহার অবস্থা নিয়ত জাগ্রতের অবস্থা; বিষণ্ণতা তাহার মনের স্বৈর্য্য অপহরণে সক্ষম নহে।

বিবাদ সর্বদা আশার পূর্বগামী। যেখানে বিষণ্ণতা অধিক, তথায় পরে আশারও আতিশয্য নিশ্চয়। অন্ধকারের স্থিতি সময়াবদ্ধ। দীপালোক বা দিবালোকের প্রকাশেই উহার বিনাশ। বিষণ্ণ ব্যক্তির হৃদয়ান্ধকার বিনাশের দীপালোক, স্বগণ বা সহৃদয় ব্যক্তির সহায়ভূতি। আর যাহার আত্মমন প্রকাশে সহৃদয়তার দ্বার উদ্বাটিত হইবার অবকাশ দেয় না, স্বর্গীয় আশা-জ্যোতিঃ স্বতঃই সময়ে তাহাদিগের হৃদয়-মধ্যে প্রকাশিত হয়। সে আলোক আর নির্দীপিত

বা অপসারিত হইবার নহে। সেই আশালোকে বিষাদ নিশ্চয়ই বিনষ্ট হয়।

বিষাদের কারণ দূরে থাকিতে কখনও বিষাদিত হইবে না। বিপদ, বিপদ আনিতে পারে, কিন্তু বিপদের আশঙ্কা কেন তোমাকে বিষাদিত করিবে? যতক্ষণ পর্য্যন্ত বিপদ উপস্থিত হয় নাই, তাহা প্রতিরোধের চেষ্টা করিবে। পুনশ্চ, বিপদ উপস্থিত হইলে বিষাদপূর্ণ হইলেই বা লাভ কি? বরং তৎকালে স্থিরচিত্তে তাহার প্রতিকার-বিধান করাই কর্তব্য। যাঁহার ঈশ্বরের ইচ্ছায় সমস্ত অর্পণ করেন, তাঁহার বিষন্নতা দ্বারা কখনও আক্রান্ত হন না। ঈশ্বরে আত্ম-সমর্পণ শিক্ষা করিলে, বিষাদের হস্ত হইতে সহজেই মুক্তিলাভ করিবে। তাহা হইলেই তোমার জীবন চির-আনন্দময় হইবে। অসুখী মানব ঐরূপ অবস্থায়ই তোমার সংস্পর্শ-পিপাসু হইবে, এবং সংস্পর্শ-লাভেও সুখী হইবে।

## ২৯। ধূর্ততা।

কথিত আছে সাবধানের মৃত্যু নাই। সংসারে বিচরণ করিতে হইলে, সংসার-শৃগাল হইতে আপনাকে রক্ষা করিবার জন্ত পূর্ক হইতে সাবধান হইবে। শৃগালের দৌরাগ্ন্য বেষ্টন-বিরহিত উদ্যানে; ধূর্তেরও প্রতাপ সতর্কতা-শূন্য মানব-হৃদয়ে।

ব্যবসায়ীর ধূর্ততা মিষ্টভাষা এবং উপরের চাক্চিক্য। উভয় হইতে আপনাকে সাবধানে রক্ষা করিবে। আবশ্যক

না থাকিলে কখনও বিপণিতে যাইবে না; অথবা তথায় নিজ আবশ্যকীয় ভিন্ন অল্প দ্রব্যের প্রতি দৃষ্টি নিক্ষেপও করিবে না। এই ছইয়ের অশ্রুতাচরণ করিলে, নিশ্চয়ই ধনের অপব্যয়ে বিবাদগ্রস্ত হইবে।

তাহার চতুরতা অধিক, বঞ্চনা দ্বারা তাহার প্রতারণিত হইবার সম্ভাবনাও অধিক। কোন দ্রব্য ক্রয় করিবার ইচ্ছুক হইলে, সরলভাবে তাহা ক্রয়ের চেষ্টা করিবে। বড়শী দ্বারা মৎশ শিকার করিতে হইলে উপযুক্ত স্থান বুঝিয়াই মৎশ শিকারে নিবিষ্ট হইতে হয়। তদ্রূপ দ্রব্য ক্রয় করিতে হইলে, তজ্জন্ম অগ্রে উপযুক্ত পণ্যালা নির্বাচনের প্রয়োজন। পুনশ্চ, যেমন জল আবিষ্কার করিলে মৎশ তথা হইতে পলায়ন করে, সেইরূপ অধিক পণ্যালয় একত্রে ঘোঁটনে ক্রয়কারী সহজেই দিশাহারা হইয়া যায়, এবং তদবস্থায় তাহার নিজ আকাঙ্ক্ষিত বস্তু প্রাপণে বঞ্চিত হওয়া বিচিত্র নহে।

তুমি উচ্চপদস্থ হইলে, অনেকের দ্বারা তোমার প্রতারণার সম্ভাবনা। ঐ অবস্থায় আপনাকে সর্বদা সচকিত রাখিবে। কেহ তোমার অথবা প্রশংসা করিয়া নিজ কার্য সাধন করিবে। কেহ প্রকারান্তরে তোমাকে ভয় প্রদর্শন করিয়া স্বীয় ঈর্ষিত বিষয় লাভ করিবে। কেহ বা অযাচিত সেবা দ্বারাও তোমাকে নষ্ট করিবে। কেবল স্বীয় কর্তব্যের প্রতি প্রতিনিয়ত তোমার লক্ষ্য থাকিলেই এই সকল হইতে রক্ষা পাইবে।

কখন কখন তোমার অধীনস্থ ব্যক্তিগণ অন্তরে নিকট

স্বকীয়োন্নতির আশায় গমনেচ্ছুক হইবে, এবং তোমার সহৃদয়তার উত্তেজনা করিয়া তোমার নিকট প্রশংসাপত্রের প্রার্থী হইবে। অথবা প্রশংসাপত্র-প্রদান-বিরতিতে তুমি সর্বদাই স্থিরসঙ্কল্প থাকিবে। তোমার কঠিন শ্রায়-ব্যবহার প্রথমতঃ ঐ সকল লোকের নিকট তোমার অশ্রায় গ্লানির কারণ হইলেও পরিণামে তজ্জগুই তুমি প্রশংসিত হইবে। অপিচ, তোমার শ্রায়-ব্যবহার দর্শনে প্রতারণাকারীরা স্বতঃই তোমার নিকট আসিতে বিরত হইবে। প্রশংসা-লাভাশায় কার্য্য করিবে না। কিন্তু প্রশংসা আপনি আসিলে তাহা অবহেলাও করিবে না।

তোমার কোন দ্রব্য বিক্রয় করিবার থাকিলে উহাকে নিকৃষ্টরূপে প্রতিভাত করাই চতুর ক্রয়কারীর ইচ্ছা। কণ্ঠ্য-পুত্রের বিবাহ-সম্বন্ধ-নির্দ্ধারণ-ব্যবসায়ও ঐরূপ দেখিবে। যাহারা পুত্র ও কণ্ঠ্যর জগু উপস্থিত হইবে, তাহারা আপন অভি-প্রায় সাধন জন্য প্রথমতঃ পাত্র অথবা পাত্রীর দোষোল্লেখই করিবে। পরন্তু ইহা ঐ পাত্র-পাত্রীর অভিভাবকের অথবা আশ্রয়গৌরব-নিবারণের উপায় বটে। সরলতাই এই সকল অবস্থায় একমাত্র আশ্রয়কার কবচস্বরূপ। এই কবচ ধারণ করিলে, কোন বিষয়েই ধূর্তের ধূর্ততা তোমাকে আক্রমণ করিতে পারিবে না। যেমন সরলতাই আশ্রয়-রক্ষা, তেমনই উহাতেই ধূর্তের শিক্ষা এবং ধূর্ততা বিনাশ হইবে।





## ৩০। পণরক্ষা ও জেদ।

এতদ্ব্যতীত বীরত্ব আছে সন্দেহ নাই, কিন্তু উভয় সমন্বিত না হইলে ঐ দুয়েই অধিক মূঢ়ত্ব। কারণ ইহাও ঠিক সত্য যে, যেমন “বৃক্ষের অগ্রদেশে গোঁয়ারের মৃত্যু” জেদী বা নির্বন্ধাক্রমিত ব্যক্তিরও ঐরূপ অধঃপতন হয়।

স্বীয় উন্নতি অথবা জগতের কল্যাণ জন্যই সত্যানুসন্ধারী ও সত্যব্রতীদিগের পণরক্ষা। সেই পণরক্ষায় অহঙ্কার নাই। তাঁহাদিগের প্রকৃতিতে জেদও উপস্থিত হইতে পারে না। বৈদিক কালে জেদের অনুরূপ শব্দের ব্যবহার নাই। পৌরাণিক-কালে “পণরক্ষা” শব্দের ব্যবহার দৃষ্ট হয়। তাহা বীরত্বের কাল। সেইকালে সত্যব্রতী মহাপুরুষেরা সত্যপালনে স্ব স্ব পণরক্ষা করিয়াছেন। কলির কাল, অন্ধকারের কাল। এই কালে তামসিক প্রকৃতির প্রাবল্য-হেতু “পণরক্ষার” পরিবর্তে “জেদ” “গোঁয়ার” ইত্যাদি শব্দের ব্যবহার।

প্রত্যেক মনুষ্য-জীবনে বৈদিককাল, বালাকাল। ঐ বেদের কালে, তাহার প্রকৃতিতে জেদ বা পণরক্ষা কিছুই নাই। তৎপর শিক্ষার কালে পণরক্ষার কাল উপস্থিত। এই সময়ে যাহারা যথার্থ বীরত্বল্যা এবং কর্তব্য-প্রতিপালন-পণ জীবনে দেখাইতে পারে, তাহারাই খ্যাতিপন্ন হয় এবং পৃথিবীতে যশঃ লাভ করিয়া সুখী হয়। মনুষ্য পৌরাণিক কাল অবসান করিয়া কলিতে উপস্থিত হইলেই তাহার বিনাশ। কলির আগমনেই যুধিষ্ঠিরের তিরোভাব। ক্ষেত্র-

মধ্যে রত্নভাণ্ডের উদগম; তৎপর তৎসম্বন্ধে ক্ষেত্রপতি ও কৃষকের ন্যায়ের জন্য বিতর্ক; অনন্তর উভয়মধ্যে অসত্যের জন্য বিরোধ। উহাতেই সত্যত্রত যুধিষ্ঠির কলির আবির্ভাব দর্শন করেন, এবং পরে আপনিই অন্তর্হিত হন। এই উপাখ্যানে অসত্যের আবির্ভাবে ধর্মের অন্তর্দ্বান অতি সুন্দর-রূপে ব্যাখ্যাত হইয়াছে।

সত্যের প্রতি অনুরাগের হ্রাস হইলেই মানব-হৃদয়ে জেদের আবির্ভাব হয়। জেদ্ হইতে বিরোধ অবশ্যসম্ভাবী। বৈষয়িক কার্যে জেদ্ সর্বদা বিপত্তির কারণ। ক্ষমতা-সঙ্কেও জেদী-ব্যক্তি নিশ্চয় অনাদৃত থাকিবে। তাহার উন্নতির দ্বার এককালে প্রতিকূল হইবে। সত্যানুরাগে হৃদয়ের কোমলতা স্ফূর্তি পায়। সেই কোমলতাতেই সেই সত্যানুরাগীর প্রতি অন্যের স্নেহ সঞ্চার হয়। তাহার উন্নতিতে সকলে হর্ষিত। সে কাহারও অধীনস্থ কর্মচারী হইলে তাহার উন্নতিতে তাহার প্রভুরও আনন্দ; কিন্তু জেদী-ব্যক্তি যেমন অপরের কোপে পতিত হইবে, তেমনি নিজ প্রভুর কোপেও তাহার পতিত হইবার অধিকই সম্ভাবনা। প্রভুর প্রসাদলাভে বঞ্চিত হইলে জেদী-ব্যক্তির এককালে অধঃপতন না হইলেও, তাহার উন্নতির আশা সেই হইতে একরূপ শেষ হইয়া যাইবে। সাংসারিক উন্নতি-প্রাপণেচ্ছ হইলে জেদ্ একেবারে পরিহার করিবে। তোমার কর্তব্য ভিন্ন অন্য কিছুই প্রতি লক্ষ্য রাখিবে না। জেদ্ বা কোট্-বজায় রাখার প্রয়োজন কি? যাহার কার্য্য করিতেছ, যদি তোমার কোট্‌বজায় রাখার লাভ না থাকে, তিনি তোমার

ঐরূপ মত সমর্থনের প্রত্যাশী নহেন। যাহাতে তোমার প্রভুর বা নিজের কোন লাভ নাই, ঐরূপ প্রকৃতি অবশ্য পরিহার্য। যেমন প্রকৃত কর্তব্যজ্ঞানে ঐ প্রকৃতি উদ্ভিন্ন হইতে পারে না, উহা সজ্ঞাত হইলেও ঐ কর্তব্য-বোধেই উহার উচ্ছেদ। পণরক্ষা করিতে হইলে সত্যপণ রক্ষার জন্যই ব্রতী হইবে, তাহা হইলে ঐহিক ও পারমার্থিক উভয়বিধ সুখলাভে চরিতার্থতা লাভ করিবে।

### ৩১। মহত্ব।

শৃগালের বৃক্ষস্থিত-স্বপক্ষ-ফল-লালসা-পরিহার জগতে অনেক সময়ে মহত্বাখ্যা প্রাপ্ত হইয়া থাকে। এইরূপে অন্য কিছু অসাধারণ দর্শন করিয়াও, তাহা মহান্ বিবেচনায় লোকে অনেক সময়ে প্রতারিত হন। সত্রাটের ভিক্ষুক-গৃহ-প্রবেশে সংসার স্তম্ভিত হইল। চারিদিকে তাঁহার মহত্বের বোষণা হইল। কিন্তু ঐ প্রশংসায় ভূপাল হয় ত অন্তরে লজ্জিত হইলেন। সংসার-বৈপরীত্যে মহত্ব দর্শন করিয়া প্রতারিত হওয়া বিচিত্র নহে। বাস্তবিক, বৈপরীত্যে মহত্ব আছে। পরন্তু তাহা মূলে বৈপরীত্য নহে। যাহাতে ঐরূপ বৈপরীত্য দৃষ্ট হয়, তাহার উহা একটা নিত্য প্রকৃতিগত ধর্ম। বিশাল মহাসাগরের গভীর নীল সলিলের প্রশান্ত মূর্তি অবশ্যই মহত্ব-প্রবোধক। যখন ভূপাল বা কোন উচ্চপদবীস্থ ব্যক্তি স্বভাবতঃই প্রশান্ত ও দয়াবান্, অথবা যখন দীনাত্মার সংস্পর্শে তাঁহার আত্মা চির-দীনবেশ ধারণ করিল, তখনই

ঠাঁহার যথার্থ মহত্ব । বাস্তবিক, প্রকৃত দীনতায়ই আত্মার মহত্ব । কিন্তু অনেক সময়ে এই দীনতা উচ্চাকাঙ্ক্ষার ছদ্মবেশমাত্র । ঐরূপ দীনতাতেই বকধান্নিকের উৎপত্তি ।

জগৎ অনেক সময়ে বাহ্যিক মহত্বেই বিমুগ্ধ । কিন্তু এইরূপ বিমুগ্ধ হইবার আবশ্যকতাও আছে । বটবিটপীর; বিশালত্বে মোহিত না হইলে, মনুষ্য বটবীজের এবং তাহা হইতে তদ্রূপার মহত্ব অনুভব করিতে সক্ষম হইত না । একই বৃক্ষে একই প্রকারের অনেকগুলি বীজ উদ্ভূত । ঐ বীজগুলি সময়ে বৃক্ষাকারে পরিণত হইল । তন্মধ্যে কোনটী ক্ষুদ্র, কোনটী খর্ব্বতা-প্রাপ্ত এবং কোন কোনটী মহান্ বিশালবৃক্ষরূপ ধারণ করিল । বৃক্ষের ক্ষুদ্রতা বা খর্ব্বতা-প্রাপ্তি বীজের দোষে নহে; তাহা ভূমি বা বৃক্ষপালকের দোষে । এক মানবাত্মা নানা আকারে দৃষ্ট হয় । কেহ ক্ষুদ্র, কেহ খর্ব্ব এবং কেহ বা গগনস্পর্শী মহান্ । কিন্তু এক মূলাধার হইতে সমস্তই উদ্ভূত । ঠাঁহার মহত্বের জ্ঞান আছে, ঠাঁহার নিকট ক্ষুদ্রের অনাদর নাই । মহাত্মারা ক্ষুদ্র-জীবনে পরমাত্মা দর্শন করিয়া স্মৃথী হয়েন । সমুদ্রেই তাবৎ সলিল মিলিত হয় । মহতের হৃদয় সমুদ্রবৎ । তাহা সমস্ত হৃদয়ের প্রবাহভূমি । মহাজন আপনাতে সমস্ত সন্দর্শন করেন, স্মৃতরাং ঠাঁহার হৃদয়ের সহায়ভূতি সকলের প্রতি স্বভাবতঃ ধাবিত হয় ।

ঈশ্বর হইতে সমস্ত মানবাত্মা প্রসূত । স্মৃতরাং ঠাঁহার দয়া মানবের সহজাধিকার । কিন্তু যেমন মনুষ্যের প্রতি মনুষ্যের ঘৃণা বা কঠোর-ন্যায়-দৃষ্টি স্বাভাবিক, কেন না তাহা

আত্ম প্রতি সময়ে উপজাত হয়, তেমনি ঈশ্বরের ন্যায়দৃষ্টি এই নিম্নজগতের কার্য প্রতি নিরন্তরই প্রক্ষিপ্ত হইতেছে। কিন্তু তথাচ ঈশ্বর মহান্ এবং তাঁহার অনন্ত দয়া মানবের পৈতৃক সম্পত্তি, স্নতরাং সেই দয়া দ্বারা মানব সর্বদাই রক্ষিত।

ঈশ্বরের মহত্ব না বুঝিলে, মনুষ্য প্রকৃত মহত্ব লাভ করিতে সমর্থ নহে। এক একটা মানবাত্মা সমুদ্র-বিচ্ছিন্ন এক একটা হৃদস্বরূপ। যতদিন ঐ হৃদগুলি মূল সাগরের সহিত সংযুক্ত থাকিবে, তাহা মহান্ বলিয়া পরিচিত হইবে। হৃদের ও মূলের বিচ্ছেদ হইলে, হৃদ কাজেই সময়ে শুষ্ক হইয়া যাইবে, এবং মহত্বেরও বিলোপ হইবে।

হৃদয়ের পাবকতা-শক্তিই তাহার মহত্ব। গঙ্গার সহিত তড়াগ মিলিত হইলে যেমন তড়াগের পূতকারী-শক্তির উদ্ভব হয়, পরমাত্মার সহিত আত্মার যোগ অধিষ্ঠিত হইলেই আত্মায় মহত্বের বিকাশ হয়। •তৎসময়েই ঐ ক্ষুদ্রাত্মা দ্বারা আলৌকিক কার্য সমাহিত হয়। সেই আত্মার সংস্পর্শে বাহাই আসে, তাহা পূতশাব ধারণ করে; তৈলপা স্নন্দর কাঁচপোকাকার আকারে পরিণত হয়। যাহারা নিজ অন্ত-মহত্বগুণে, অন্য অবাচিত মহত্ব প্রদান করিয়া তাহাদিগকে মহিমান্বিত করেন, সেই মহাত্মারা ধন্য।

### ৩২। আশা ।

আশা-মরীচিকা দ্বারা প্রতারিত হইতে কেহ ইচ্ছুক নহে। কিন্তু আবার এই প্রতারণায়ই আনন্দ। যে সময়ে

চতুর্দিক তমসাচ্ছন্ন, আশালোকই তৎকালে জীবনপথের পথপ্রদর্শক এবং তাহা সেই সময়ে হৃদয়কে এক প্রকার গুহ্ব আনন্দে বিমুগ্ধ রাখে। যিনি যথার্থ জ্ঞানী, তিনি ঐ আলোক বা মরীচিকা দ্বারা প্রচালিত হইতে না পারেন; কিন্তু তাঁহারও দৃষ্টি সময়ে সময়ে তৎপ্রতি নিক্ষেপ না হইয়া থাকিতে পারে না।

আশাই সংসারের মোহ। সাধারণের পক্ষে এই মোহ সময়ে মহোপকারী। সমুদ্র-মধ্যে ঝটিকা উপস্থিত হইলে স্রুদূর-দূর্গস্থিত আলোক দ্বারা অর্গব-যান রক্ষা পাইতে পারে না সত্য, কিন্তু তদর্শনে অনূ্যন দিক্ভ্রম হইতে রক্ষিত হইয়া সেই অর্গবপোত ঝটিকায় কিয়ৎকাল যুঝিতে অবশ্যই সক্ষম। যদি সেই পোতারোহীগণ কেবল সেই আলোক দ্বারা বাঁচিতে চাহে, তাহাদিগের ইচ্ছা যজ্ঞপ বিফল হইবে, তজ্জপ নিরাশার মধ্যে আশাজ্যোতিঃপ্রাপ্ত-ব্যক্তি কেবল আশার উপর নির্ভর করিয়া জীবনপথে অগ্র-সর হইতে চেষ্টা করিলে তাহারও কামনা ব্যর্থ হইবে।

নদীবক্ষে ছিদ্র-নিবন্ধন অর্গবযান জলমগ্ন হইতে আরম্ভ হইলে, অর্গবযানের জলনিঃসরণ এবং তৎসঙ্গে ভগবানের আশীর্বাদ-প্রার্থনা এই উভয়েই তরণীর রক্ষার সম্ভাবনা। সংসার-সমুদ্রে আশা ও হৃদয়ের উদ্যম এই উভয়েই মানবের রক্ষা। এই উদ্যম-সহগামিনী আশা ঈশ্বর হইতে আগত হয়। সেই আশাতে হৃদয়কে দৃঢ় ও বলীয়ান করিলে জীবন-তরণী নিরাপদে চলিয়া যাইবে। যাহারা কেবল আশার উপর নির্ভর করিয়া নিরুদ্যম থাকে, তাহাদিগের

পক্ষে উৎকট রোগাক্রান্ত ব্যক্তির ঔষধ সেবন বিনা কেবল প্রকৃতির সহায়তায় প্রাণ রক্ষার অস্বাভাবিক আকাঙ্ক্ষামাত্র। প্রকৃত জ্ঞানবান্ ব্যক্তি প্রার্থনা এবং উদ্যম উভয়ই অবলম্বন করিয়া আপনার ঈপ্সিত কার্য সাধন করেন।

আশাই সংসারের মোহ স্বরূপ, উক্ত হইয়াছে। পুনশ্চ, এই আশাই আবার সংসারের প্রাণ। হলাহলে প্রাণনাশ, আবার এই হলাহলে প্রাণরক্ষা উভয়ই প্রত্যক্ষের বিষয়। ব্যবহারানুসারেই ভিন্ন ভিন্ন ফল। ইহাতে ব্যবস্থানভি-জ্ঞেরই বিপদ। মহাত্মাদিগের চারিদিকে কুজ্বাটিকা ও অন্ধকার; কেবল আশাই বিদ্যালোকের আয় তাঁহাদিগের অন্তরে স্ফূর্তি পাইতে থাকে। তাহাতেই তাঁহারা ভীমবলে পরাক্রমী হইয়া সংসার-বিজয়ের চেষ্টা করেন। তাঁহাদিগের নিরাশা নাই। উদ্যম-বিরহিতদিগেরই নিরাশা। ব্রহ্মলোক হৃদয়ে স্ফূরিত হইলে তাহা যদি সূক্ষ্মময়ে ধারণ করিয়া তদ্বারা স্বীয় কার্য সাধিত করিতে না পার, তাহা তোমারই অজ্ঞানতা-জনিত-দোষ। পরে নিরাশা দ্বারা আক্রান্ত হইয়া স্বীয় বিনাশের সম্ভাবনা দেখিলে আক্ষেপ বৃথা।

জীবনকে যথার্থ উন্নত করিবার ইচ্ছা থাকিলে কখনও হৃদয়কে নিরাশাগ্রস্ত হইতে দিবে না। অপিচ, ছুরাশায়ও হৃদয় পূর্ণ করিবে না। ছুরাশাই আশা-মরীচিকা। ইহাতেই হুঃখ। সংসার-মরুভূমি-বিচরণে আশা ছুরাশা সহজে নির্বীচন করিতে পারিবে। কোন সময়ে মরীচিকা দ্বারা প্রতারণিত হইলেও, তোমার তথায় জ্ঞানবৃদ্ধি ভিন্ন বিনাশ নাই।

সমস্ত আশা ঈশ্বরের উপর স্থাপন করিবে। তাহাতে তোমার মঙ্গল সর্বতঃ সাধিত হইবে।

### ৩৩। কল্পনা।

অন্তরে অন্তরে সকলেই রাজা হইয়া থাকে। তবে সকলে এলানেকার না হইতে পারে। বাস্তবিক, কল্পনার আনন্দ আছে। ইহা মোহের সহচরী, এবং ইহাই সময়ে মানবের হিতকরী। যখন মনুষ্য নিজাবস্থায় অসুখ অনুভব করিয়া অসন্তোষ ও বিষণ্ণতাকে আলিঙ্গন করে, তৎকালে কল্পনাই ঐ দুইয়ের বিনাশের জ্ঞাতাহার নিকটে উপস্থিত হয়।

কল্পনা স্বাভাবিক। তুমি ধনী নহ; কিন্তু ধনের চাক্চিক্যে বিভূষিত হইয়া বসিয়া আছ। জ্ঞানীতে তাহার পর আর মোহ উপস্থিত হয় না; স্মরণে তিনি এলানেকারে দুর্গতি হইতে রক্ষা পান। যিনি ধীমান্, তিনি সেই কল্পনা-চূড়ায় আরোহণ করিয়া নিজ সম্ভবপর ভাবী অবস্থা দর্শন করেন, এবং সেই অবস্থা প্রাপণের উপায় চিন্তনে প্রবৃত্ত হন। হয় ত সময়ে তাঁহার কল্পনার অবস্থা সত্যের অবস্থারূপে প্রকাশিত হয়।

কল্পনা বহুদূরের সামগ্রীকে অতি নিকটস্থরূপে প্রতিভাত করে। অজ্ঞান শিশুই গগনস্থিত চন্দ্র দর্শনে তাহাকে ধরিবার উদ্যম করিবে; কিন্তু জ্ঞানী-ব্যক্তি চন্দ্রালোক সম্ভোগ করেন এবং স্বায়ত্ত বস্তু ধারণেই যত্নবান্ হইয়েন। মহাজনদিগের



নিকট কল্পনা বিশ্বাসাকারে পরিণত হয়। বাস্তবিকই ভগবানে সমাহিত-চিত্ত ব্যক্তিগণের কল্পনাই বিশ্বাস। ধর্ম-প্রবর্তক বা সমাজ-সংস্কারক মহাজনগণ ঐ বিশ্বাস-নেত্রে সহস্র বৎসরান্তরের অবস্থা বর্তমান কালে দর্শন করিয়া তদনুযায়ী কার্যে প্রবৃত্ত হইয়েন, এবং তাহা বর্তমানে উপস্থিত করণের জন্ত প্রাণপণে প্রয়াস পান। তাঁহারা আপনাদিগের জীবন সেই দূরবর্তী জীবনের আদর্শ করেন। কল্পনাই তাদৃশ মহাজনগণের বিশ্বাস, এবং সেই বিশ্বাসই তাঁহাদিগের জীবন।

কল্পনা, বিশ্বাসে পরিণত করিতে না পারিলে তাহা অসত্যই রহিয়া যাইবে। জীবনের পবিত্রতায় কল্পনার সত্যতা সাধিত হইবে। জীবনকে উন্নত করিলে তোমার আকাশ-কুসুমোৎপাটনের ভণ্ডোদ্যম আর রহিবে না। ইহার দ্বারাও তুমি আর প্রচালিত হইবে না।

অন্ধকারেই প্রেতের দৌরাণ্ড্য। তমসাচ্ছন্ন হৃদয়-মধ্যেই কল্পনা-কুহকিনীর মায়িক ক্রিয়া। হৃদয়কে প্রকৃত জ্ঞানালোক দ্বারা অন্ধকার-বিরহিত করিতে পারিলেই, প্রেত ও মিথ্যা কল্পনা একেবারে বিদূরিত হইবে। এরূপ অবস্থায় জানী যেমন প্রেতের শব্দে ভীত নহেন, তেমনি তৎকালে মায়িক কল্পনা দ্বারাও তাঁহার লক্ষ্য বিপর্যয়ের সম্ভাবনা নাই। এক সত্য লক্ষ্য থাকিলেই তোমার কল্পনা সংস্কৃত হইবে; কেবল সংস্কৃত নহে, তদবস্থায় মিথ্যা কল্পনা তোমার হৃদয়ে উদ্ভূত হইবার আর অবকাশও পাইবে না। ঐ অবস্থায় আত্ম-পরিবর্তনে তুমিই আপনি বিস্মিত ও চমকিত হইবে।

চিত্তসন্তোষ উৎপাদন, কল্পনা-সংস্কারের অগ্রতর উপায় । আত্মসন্তোষ হৃদয়ের এক অঙ্গীভূত করিতে পারিলে মিথ্যা কল্পনা দ্বারা তুমি আলোড়িত হইবে না । এই আত্মসন্তোষ শিক্ষা কঠিন ব্যাপার নহে । ঐশ্বরিক তাবৎকার্যেরমাঙ্গলিকত্বের উপর তোমার নির্ভর থাকিলেই, আত্মসন্তোষ তোমার স্বভাব-সিদ্ধ হইবে । সে অবস্থায় কল্পনা দ্বারা ধৈর্য্যচ্যুতির কোন সম্ভাবনা থাকিবে না ।

### ৩৪ । যৌবন ও বার্ক্য ।

আত্ম সুপক্ক হইলেই স্মৃতিষ্ট, এবং আচার মঞ্জিলেই সুস্বাদু । বাস্তবিক, মনুষ্য বয়োবৃদ্ধ হইলেই তাহার জীবন প্রকৃত শ্রী-সম্পন্ন হইয়া থাকে । যৌবনের চাক্চিক্য বসন্তাগমে নবপল্লবিত বৃক্ষের চাক্চিক্যমাত্র ; কিন্তু সেই বৃক্ষ যখন “ ফলভরে অবনত ” তখনই তাহার প্রকৃত স্নন্দরতা । যৌবনের কার্যের উপর মনুষ্য কচিং সম্পূর্ণ নির্ভর স্থাপন করিতে পারে । তাহার ক্রিয়া সফরীমৎশ্চের ক্রিয়াবৎ সর্বদা অস্থির । বার্ক্যের ক্রিয়া গভীর সলিলে রোহিতমৎশ্চের ক্রিয়াবৎ স্থির ও অচঞ্চল । বর্ষার প্রাক্কালাই ভেকের কলরব, পূর্ণবর্ষায় যেমন তাহার নিবৃত্তি হয়, সেইরূপ যৌবনের অবসানেই জীবন কোলাহলশূন্য হয় । বৃদ্ধ সর্বদাই দূর-দর্শী । তাঁহার অবস্থা পর্বতশৃঙ্গারূঢ় দর্শকের অবস্থা । যৌবনের দর্শন, ক্ষুদ্র ভূতলস্থিত বামনের দর্শনের তুল্যা ; তাহার দৃষ্টির প্রথরতা থাকিলেও তাহা সেই ভূমির চতুষ্পার্শ্বেই আবদ্ধ ।

বুদ্ধ সেই ভূমির চতুর্দিক নিরীক্ষণ করিলেন, এবং পূর্ব পশ্চাৎ দূরস্থিত সমস্তই অবলোকন করিলেন। স্তত্রাং তাঁহার কথা সর্বদাই জ্ঞানের কথা। নিজের বয়োবৃদ্ধ হইলেই উহার পরিচয় পাইবে। মৃদঙ্গ-করতালের শব্দে যুবকের কর্ণে তীব্র আঘাত লাগিবে, কিন্তু বৃদ্ধ তাহাতেই মাতিবেন। সময়ে যুবকও তাহাতে মাতিবে। স্পঞ্জ হইলেই কণ্টকী-কলে রস সঞ্জাত হয়। স্পঞ্জাবস্থায় যুবকেও আনন্দ-রসের আবির্ভাব হইবে। যত বয়োবৃদ্ধ হইবে, দেখিবে, যৌবনে যাহা যাহা তাচ্ছল্যীকৃত হইয়াছিল, তাহাই পরে আদরণীয় হইয়াছে।

বার্দ্ধক্যাবস্থা সর্বদা সম্মানের উপযুক্ত। তবে সকল আশ্রয় পাকিলেই স্মৃষ্টি হয় না, তথাপি নয়নরঞ্জক এবং অপক্কাপেক্ষা মিষ্ট বটে। যৌবনকালে হঠাৎ কোন কার্যে প্রবৃত্ত হইবে না। তোমার বুদ্ধির তীক্ষ্ণতা থাকিতে পারে; কিন্তু নূতন কুঠার অপেক্ষা পুরাতন কুঠারেই বৃক্ষ উত্তম ছেদিত হইয়া থাকে। তুমি জীর্ণ অস্ত্র বা জীর্ণ বস্ত্র পরিত্যাগে তৎপর হইবে; কিন্তু ঐ জীর্ণ দ্রব্যেই সংসারের অনেক উপকার সাধিত হয়। নিজে সংসার বুঝিলে ঐ জীর্ণ বস্তুর আদর বুঝিবে। যৌবনে একটা বার্ক্কোর লক্ষণ দৃষ্ট হইলে, তাহা অসময়ে উপস্থিত বলিয়া সংগোপনে বা পরিত্যাগে তুমি সতত যত্নবান্ হইয়া থাক। কিন্তু দৈহিক অবস্থা সম্বন্ধে যেরূপ আচরণ আবশ্যিক বিবেচনা কর, আন্তরিক ভাবনিচয় সম্বন্ধে কেনই বা না ঐরূপ ব্যবহার করিবে। অতএব তোমার কার্য ও বাক্যাদি সর্বদা নিজ

বয়সানুযায়িক হওয়াই কর্তব্য। কুত্রাপি অঘাচিত বা অনা-  
হুতরূপে কোন মতামত বৃদ্ধের সমক্ষে প্রকাশ করিবে না।  
এরূপ ধৃষ্টতায় যে কেবল বৃদ্ধের অবমাননা হয় তাহা নহে,  
তোমার মতের গুরুত্ব থাকিলেও তাহা অনাদৃতাবস্থায়ই  
নিষ্ফিণ্ড হইবে।

বৃদ্ধের নিকট সম্মাননাই যৌবনের পৌরুষ। যাহাতে  
সেইরূপ পুরুষকার লাভ করিতে পার, তাহারই চেষ্টা  
করিবে। বৃদ্ধ তোমার পুরুষকারের পরিচয় পাইলে তোমাকে  
উপযুক্ত আদর করিতে কখনও ক্রটি করিবেন না। পলিত-  
শিরাঃ না হইলেও, তুমি প্রকৃত জ্ঞানসম্পন্ন হইলে অবশ্যই  
সম্মানিত হইবে। যৌবনকালে বার্কক্যের সম্মান প্রাপ্ত  
হওয়া অতীব প্রশস্ত এবং তাহা সর্বদা বাঞ্ছনীয়। কিন্তু  
এইরূপে সম্মানিত হইলে, সেই সম্মান অতি সাবধানে  
রক্ষা করিবে। ঐ পদমর্যাদা স্থির রাখা নিতান্ত সহজ  
নহে। সেই অবস্থায় কোন ধৃষ্টতা তোমাতে প্রকাশ পাইলে,  
সেই ধৃষ্টতা বৃদ্ধের যৌবন-পরিচ্ছদ-পরিধান-তুল্য বিষবৎ দৃষ্ট  
হইবে।

বার্কক্য যেমন যৌবনের সম্মানের উপযুক্ত, তেমনি  
যৌবনও বার্কক্যের আদরের সামগ্রী। হর-পার্বতী-পরিণয়,  
ইহা যৌবন-বার্কক্যের আধ্যাত্মিক সংযোগ। কার্তিকেশ্ব এবং  
গণপতি অর্থাৎ বল এবং কার্য্য-সিদ্ধি এই সংযোগেরই  
রমণীয় সূফল।

## ৩৫। মৃত্যু।

মৃত্যুকে কেন আশঙ্কা করিবে অথবা তাহা কেন তোমার বিষাদের কারণ হইবে? সংসারের যোগে বিয়োগ আছে, কিন্তু মৃত্যুতে চিরযোগ সংস্থাপিত হয়। এই ভাবে যাহারা মৃত্যুকে দেখিয়াছে, তাহারা চিরসুখী। বন্ধু দেহ-বিচ্ছিন্ন হইলেন, কিন্তু তাঁহার আত্মা চিরদিন তোমার সঙ্গিকট। ইহা অতিশয় আশার কথা এবং আনন্দের ভাব। যেখানে কেবল দেহের যোগ, সেখানে দেহ দূরস্থিত হইলে তোমার মন বিষাদিত হইল। কিন্তু আত্মার যোগে বিচ্ছেদ নাই, বিষাদও নাই।

দেহ ভালবাসার সামগ্রী নহে। আত্মাই ভালবাসার বস্তু। তবে কেন প্রকৃত বস্তু ছাড়িয়া অবস্তুতে যোগ-স্থাপন করিবে? ললনা পতিহীনা হইলেন, কিন্তু তাঁহার পতির আত্মার সহিত তাঁহার যোগ থাকিলে তিনি পতি-হীনা নন। তিনি পতির সদেহাবস্থায় তদাত্মার যেক্রম সেবা করিতেন, অদেহীতে সেই আত্মার তদ্রূপ সেবা করুন, সেই আত্মা হইতে সর্বদা তাঁহার নিকট আশ্বাসবাণী আগত হইবে। শ্রদ্ধা, মাসিক বা বার্ষিক নহে, তাহা মুহূর্তের কার্য। তদবস্থায় জীবনেও তাদৃশ আনন্দ লাভ হয়। মাতা বা পিতা, পুত্রকে ইহলোকে ছাড়িয়া চলিয়া গেলেন; কিন্তু পুত্র, জনক-জননীর জীবমানে তাঁহাদিগের যেক্রম আশীর্বাদ প্রাপ্ত হইত, নিত্যশ্রদ্ধে সে সেই আশীর্বাদ হইতে কখনও বঞ্চিত হইবে না।

সংসারে যাহাকে শত্রু বিবেচনা করিতে, তাহার মৃত্যু হইল। তুমি তাহার শত্রুতাতে আর ক্লিষ্ট হইলে না। তখন তোমার মন ক্রমশঃ তাহার গুণের অন্বেষণ করিতে লাগিল। এই অন্বেষণকাল সুখের কাল। সেই সুযোগে সেই আত্মার আদর করিতে পারিলে, সেই আত্মা তোমার বান্ধবরূপে প্রতিষ্ঠিত হইবে। সেই শুভযোগ হারাইলে একটা আত্মার আত্মীয়তা হারাইলে। যম, ধর্মরাজ নামে আখ্যাত হইয়াছেন। বাস্তবিক, মৃত্যু হইতেই প্রকৃত ধর্মের আরম্ভ। তুমি এই ধর্মযোগে জীবনে আরম্ভ করিলে, সহস্রাঙ্গী তোমার সহযোগী হইবেন। সংসারে তুমি একটা বন্ধুর সহানুভূতির জন্ত মুখাপেক্ষা করিয়া থাকিবে; হয় ত ইচ্ছামত সেই সহানুভূতিও তুমি প্রাপ্ত হইবে না। কিন্তু আত্মযোগ অর্থাৎ আত্মাসহ আত্মার যোগ অভ্যাস করিলে, সহানুভূতির জন্য তোমার আক্ষেপ থাকিবে না। এই যোগাভ্যাস অতি সহজ ব্যাপার, এবং ইহা সকলেরই স্বায়ত্ত্ব। জীবনে ইহা অমুষ্টিত হইলেই ইহার ফল অমুভূত হইবে। এই আত্মযোগবলে মহাত্মারা চিরদিন তাঁহাদিগের সহচর-বর্গের সহিত বর্তমান আছেন বলিয়া প্রকাশ করিয়াছেন। এ কথা মিথ্যা নহে। তাঁহারা নিজ জীবনে যাহা দর্শন করিয়াছেন, তাহাই অপরের নিকট প্রচার করিয়াছেন। যাহা তাঁহাদিগের পক্ষে সাধ্য, প্রত্যেক মানবের পক্ষেও তাহা সাধ্য হইবে।

তুমি পরলোকগত বন্ধুর স্মরণার্থ কীর্তিস্তম্ভ প্রস্তুত করিলে। হৃদয়ে কীর্তিস্তম্ভ প্রস্তুত কর, প্রতি মুহূর্ত্তে তিনি তোমার

স্বরগীয় থাকিবেন। নির্বাণ-মুক্তির অর্থ নাম এই আত্মার আত্মায় মুক্তি। একের মুক্তি, তৎসহ অপরেরও মুক্তি। স্বর্গরাজ্যেও এই মুক্তি। আত্মার বিয়োগ বা বিচ্ছিন্নাবস্থায়ই সংসারের নরক। সংসারে আত্মযোগ অধিষ্ঠিত হইলে সংসারই স্বর্গ হইবে। যাহারা পৃথিবীতে স্বর্গরাজ্য সংস্থাপিত করিতে আসিয়াছিলেন, তাঁহারা এই স্বর্গরাজ্যেরই কামনা করিয়াছিলেন, এবং কালে ঐ স্বর্গরাজ্য-সংস্থাপনের সম্ভব-পরতা তাঁহারা বিশ্বাস-নেত্রে দর্শন করিয়াছিলেন। কবে মনুষ্য সেই ঈশ্বরিত আত্মযোগ শিক্ষা করিবে এবং পৃথী স্বর্গরাজ্যে পরিণত হইবে! ধন্য সেই স্বর্গরাজ্য, যেখানে যোগে বিয়োগ নাই, এবং মৃত্যুর নামই চিরযোগের অবস্থা!

### ৩৬। আত্মগরিমা ।

ইহা অতি সামান্য হইলেও যে মনুষ্যে ইহা প্রকাশিত হয়, সে ফলিত কদলীবৃক্ষতুল্য; ফল প্রসবেই বৃক্ষের বিনাশ নিকটবর্তী। আত্ম-গরিমা যে কেবল আপনাকে নষ্ট করে তাহা নহে, তদ্বারা সেই গরিমাকারীর সম্বন্ধে সংস্পৃষ্ট ব্যক্তি-গণও নষ্ট হয়।

সারবিহীন ব্যক্তির আত্মগরিমা নিশ্চয়ই তাহার বিনাশের কারণ। সে সকলেরই কুদৃষ্টিতে পড়িবে; স্তত্রাং সকলের নিকট সে হেয় হইবে। তাহার জীবন চির-অশান্তিতেই অবসান হইবে। যাহার কিছু অন্তঃসার আছে, তাহার আত্মগরিমা হঠাৎ তাহার অধঃপতনের হেতু না হইলেও,

তাহার অবস্থা আখ্যানোল্লিখিত রাজা হরিশ্চন্দ্রের অবস্থা সদৃশই হইয়া থাকে। তাহার অবস্থিতি না দেবলোকে, না মনুস্যলোকে! দেবতা এবং মনুস্য উভয়েরই সহানুভূতি হইতে সে বঞ্চিত হয়।

লোকে ধনের গরিমা করিয়া থাকে। কিন্তু বাস্তবিক গরিমা কোথায়? হয় ত কেহ রৌপ্য বা স্বর্ণপাত্রে হৃদ্ধ পান করিয়া পুষ্টিকায় হইয়াছেন, এবং বহুমূল্য কোমল শয্যাশয়ন করিয়া বঞ্চিত হইয়াছেন। কিন্তু তিনি কিয়দূর পশ্চাৎ-দৃষ্টি নিক্ষেপ করুন, দেখিবেন যে তাঁহার পূর্ব-পুরুষ সাধারণ মানবের মতই বঞ্চিত ও পরিপুষ্ট হইয়াছিলেন। সময়ের পরিবর্তনে তাঁহার নিজ সম্বন্ধে অনেক নূতন হইয়া থাকিবে। কিন্তু প্রকৃত মূল দৃষ্টি করিলে প্রতীয়মান হইবে যে নূতন এবং পুরাতনে বিশেষ প্রভেদ নাই। চীরথণ্ডই সদ্যোজাত বা হৃদ্ধপোষ্য শিশুর উপযুক্ত বস্ত্র। তৎকালে তাহাকে কেহ পূর্ণ কিংখাপবস্ত্র প্রদান করিলে সেই ব্যক্তিই ক্ষুদ্রবোধরূপে পরিচিত হইবে। শৈশবে ধনীর অবস্থা এবং সাধারণ মানবের অবস্থা একই। সর্ব-পরিণামেও উভয়ের অবস্থা ঐরূপ। সাদী বলিয়াছেন, “যখন প্রাণবায়ু পলায়নের চেষ্টা করে, মৃত্যু, তক্তার উপরই বা কি, আর মৃত্তিকার উপরই বা কি?” পালঙ্কোপরি মৃত্যু হইলেও শেষে একভঙ্গিই মানবদেহ পরিণত হইবে। ঐ অবস্থাই সাধারণ মনুষ্যের অবস্থা। স্মৃতরাং ধনগরিমা নিতান্ত অর্থশূন্য।

বিদ্যা বা বুদ্ধির গরিমাও তাদৃশ। যে শিক্ষা বা জ্ঞানলাভ করিয়াছে, তাহা অপরের সঙ্গে তুলনায় রেণুবৎ প্রতীয়মান



হইবে। জ্ঞানীগণ অনেক শিক্ষার পর আপনাদিগকে অতি ক্ষুদ্রজ্ঞানী বা অজ্ঞানীরূপেই দর্শন করেন। সেইরূপ জ্ঞান লাভ কর, তোমারও তাদৃশ ক্ষুদ্র জ্ঞান জন্মিবে। চরমে ঐ জ্ঞান হইতে তোমার সদজ্ঞান উপজাত হইবে। সমুদ্র সলিল সহ সন্মিলিত হইলে সমস্ত সলিলই ক্ষুদ্র। বিশ্বাত্মার সহিত তোমার আত্মবোগ স্থাপন হইলে, ক্ষুদ্রজ্ঞান অবশ্য-স্ভাবী। এই জ্ঞানেই প্রকৃত স্নেহ, এবং পরিণামে মুক্তি। কিন্তু এতাদৃশ জ্ঞানীর আত্মাও গরিমামূঢ় নহে। তাঁহার ক্ষুদ্রজ্ঞানই তাঁহার গরিমা; তাঁহার জ্ঞান সাধারণ জ্ঞান হইতে পৃথক, ইহাই তাঁহার গরিমা। এই জ্ঞানেই তিনি সাধারণের অহংজ্ঞান দর্শনে ব্যাকুলিত হন। তাঁহার জীবন পর সেবার জন্মই চিরবিব্রত। বাস্তবিক, নিজের ক্ষুদ্রজ্ঞান না জন্মিলে মনুষ্য প্রকৃত সেবক হইতে পারে না। সেবকেরাই আত্মগরিমা-বিরহিত। তাহারাই জীবনে আত্ম প্রসাদ এবং জীবনান্তে জগতের চির-ধন্যবাদ প্রাপ্ত হইয়া থাকে। বাহারা ঐরূপ সেবকের দ্বারা সেবিত, তাহারাও চিরধন্য।

### ৩৭। পরিমিত ব্যয়িতা ।

কথিত আছে, “শস্তার তিন অবস্থা”। বাস্তবিক দ্রব্যের সুলভতাই উহার অনিয়মিত ব্যবহারাদির মূল কারণ। যাহারা স্বর্ণপাত্রে হৃৎপান করিয়া পরিপুষ্ট হইয়াছেন, তাঁহারা স্বভাবতঃই সামগ্রীর সম্মাননা অতি অল্প

করিয়া থাকেন। পরিমিত ব্যয়ে কোন পাপ নাই বা উহা লজ্জার বিষয় নহে। ধনের অপব্যয়ে তুমি ধনী নাম পাইতে পার না; উহার সদ্যবহারেই তোমার যশঃ নিশ্চয়।

যে স্থানে দ্রব্য সুলভ, সেই স্থানে দ্রব্যের ব্যবহার-জ্ঞান কম। যেখানে অল্প মূল্যে অধিক প্রাপ্ত হওয়া যায়, সেখানে ব্যয়ও অধিক। সময়ে সময়ে প্রত্যেক স্থানে কোন না কোন দ্রব্য অপেক্ষাকৃত সুলভ হয়। তুমি ভাবিবে তথায় সুলভতায় তোমার বিত্ত রক্ষিত হইল; কিন্তু আয় ব্যয় মিলাইলে, ব্যয়েরই আধিক্য দেখিতে পাইবে।

মহার্ধ্যকালেই দ্রব্যের ব্যবহারের দিকে সংসারীর দৃষ্টি পড়িয়া থাকে। সুলভ অবস্থায় সে দৃষ্টি অতীব অল্প। কিন্তু ঐরূপ দৃষ্টিরই নিয়ত প্রয়োজন। পুনশ্চ, এতদ্ সম্বন্ধে তুমি যেন একেবারে উত্তর কেন্দ্র হইতে দক্ষিণ কেন্দ্রে গমন না কর। পরিমিতব্যয়ী হইতে গিয়া যেন এককালে রূপণ-স্বভাব-বিশিষ্ট হইও না। ব্যয়ের সমষ্টির দিকে দৃষ্টি থাকিলে এই কলঙ্ক হইতে রক্ষা পাইবে। পরন্তু ব্যয়ের ন্যূনতা উৎপাদন করিবার আবশ্যক হইলে, দ্রব্যেরও সমষ্টির প্রতি দৃষ্টির প্রয়োজন।

নিজ ব্যয়ের তালিকা লইতে কখনও লজ্জা বোধ করিবে না; অথবা নিজ ব্যয় স্বীয় দৃষ্টির অধীন রাখা, নীচতা মনে করিবে না। যাহারা অপরিমিত-ব্যয়ী, তাহারা আপনাদিগের ব্যয়ের প্রতি দৃষ্টি নিক্ষেপ করিতে ভীত। সেই জন্ত কার্ণ্যের নীচতা অথবা সময়ের অপ্রচুরতার ভাণ

করিয়। নিজ ব্যয় সম্বন্ধীয় বিষয় হইতে আপনাদিগকে উদাসীন রাখে।

নিজের হিসাব বা আয় ব্যয় মিলাইতে সময় অপব্যয় মনে করিবে না। হয় ত কেহ বলিবে, এক পয়সা মিলাইতে তিন পয়সার তৈল ব্যয় অথবা চারি পয়সার পরিশ্রম ব্যয় অনর্থক। কিন্তু ইহা বাস্তবিক অপব্যয় নহে। ইহা অজ্ঞানীর কথামাত্র। যেখানে এক পয়সার হিসাবে অমিল আছে, সেখানে দশ টাকার একটা অমিল থাকা অসম্ভব নহে। হয় ত সে স্থলে দশ টাকা ব্যয়ের একটা হিসাব ভ্রমতঃ পরিত্যক্ত হইয়াছে। যদি ঐরূপ ভ্রমও না ঘটয়া থাকে, ইহা নিশ্চয় জানিবে যে, তোমার ভ্রম সংশোধনের চেষ্টা থাকিলে এই অভ্যাসের দ্বারা তুমি ক্রমশঃ কন্দর্ভ এবং বিষয়জ্ঞান-যুক্ত হইবে, এবং তোমার অধীনস্থ লোকও তোমার সদৃশ হইবে; অথবা তাহারা কখনও তোমার হিসাবে গোলযোগ করিতে সাহসান্বিত হইবে না। রাজকোষের একটা পয়সার হিসাবের অমিল ঘটিলে, তাহাতে কত পয়সা ব্যয় হইয়া সেই ভ্রম সংশোধিত হয়। ইহা রাজবুদ্ধি। অতএব তুমি কেন তাদৃশ ভ্রম সংশোধনে লজ্জিত হইবে?

জ্ঞানী ব্যক্তি চারিদিকেই দৃষ্টি রাখেন। অথচ সময়েরও অপব্যবহার করেন না। সময় ও ব্যয় উভয়দিকে দৃষ্টি রাখিয়া কার্য করিবে। পরিমিত-ব্যয়িতা সহজেই তোমার স্বভাবের বিষয় হইবে।



## ৩৮। কুদৃষ্টি।

সকল জাতিমধ্যে প্রেত বা সয়তানের উপদ্রবের কথা বর্ণিত আছে। মনুষ্য-সমাজে কুদৃষ্টি সেই প্রেত বা সয়তান। বালকের উপর প্রেতের আধিপত্য অধিক, এই জনাই তাহাকে কুনজর হইতে রক্ষা করিবার প্রথা প্রচলিত। কিন্তু কুদর্শন হইতে তাহাকে রক্ষা করিবার যত্ন কোথায়? প্রেত কোমলাস্তঃকরণে প্রবেশ করিলে সে যে অধিকার পরিত্যাগ করে না, এবং সেই অধিকার চ্যুত করাও যে দুর্লভ, তাহা কয় জনে জানে।

সংসারের মধ্যে প্রথম প্রেত নীচ-প্রকৃতির পশ্বাদি। যীশুখ্রীষ্ট প্রেতকে শূকরের দলমধ্যে প্রবেশিত করিয়া দিয়াছিলেন। প্রকৃতপক্ষে, শূকরই প্রেতের এক অধিবাস-স্থল। শূকর-পালন তাই নিষিদ্ধ। কিন্তু মেঘ বা ছাগপালন কি নিষিদ্ধ নহে? কথিত আছে যে, গৃহমধ্যে নীচ প্রকৃতির মূর্ত্তিমান্ চিহ্ন স্বরূপ ঐ জঘন্য পশুদিগকে স্থান দিলে, সেই সংসারে শনির দৃষ্টি হয়। বাস্তবিক শনি কেন, তৎসঙ্গে রবিস্বতের দৃষ্টি নিশ্চয়ই আরম্ভ হইয়া থাকে। কতই কোমলমতি বালক ঐ পশ্বাদির ব্যবহার দর্শনে নষ্ট হয়! মানব-সমাজ হইতে উহাদের দূরস্থ থাকাই বিধেয়।

কুকুট হংসাদি ও প্রেতাধিকৃত জন্তু। সেই জন্তু শাস্ত্র-কারেরা প্রকৃত হিন্দু কর্তৃক উহাদিগের পালন নিবেদন করিয়া গিয়াছেন। যে সকল জন্তু বা পশুর ব্যবহার কুৎসিত, তাহাদিগের স্পর্শ পর্য্যন্তও নিষিদ্ধ হইয়াছে। ঐ নিবেদন

অবশ্যই সম্মাননার উপযুক্ত। ক্ষণিক উপকারের জন্তু যাহাতে জীবন পর্য্যন্ত নষ্ট হইতেছে, তাহা অবশ্যই পরিহার্য্য। আহা-রানুসারে মানব-প্রকৃতির গঠনও তাদৃশ হইয়া থাকে; ইহা যদি সত্য হয়, কুংসিত পশ্বাদির মাংস আহারে কেনই বা তোমার লালসা জন্মিবে। বিশেষতঃ তাহাতে বালকদিগের লালসা কদাচ তুমি বৃদ্ধি করিবে না। যাহা তোমার আহার, তাহা বালকের আহার নহে। কখনও স্লেচ্ছ ব্যবহারে কোমল জীবন কলুষিত করিবে না।

পৃথিবীতে প্রেতাধিকৃত পশ্বাদিরই বল্যোপহারের পদ্ধতি প্রচলিত আছে। যাহারা বলির বিধি সংসারে প্রথম প্রতি-ষ্ঠিত করেন, তাঁহারা তাহা বীরত্ব প্রকাশের জন্তু অনুষ্ঠিত করেন নাই। যদি তাহাই করিতেন, অজাদির পরিবর্তে ব্যাঘ্র-গণ্ডার প্রভৃতিরই বলির বিধি প্রচলিত হইত। অল্প পক্ষে, আহারের জন্যও ঐ বলির প্রথা প্রচলিত হয় নাই। ঐ উদ্দেশ্য সাধনের অভিপ্রায় থাকিলে মহিষ বলি বা অশ্বমেধের বিধি অনুষ্ঠিত হইত না। কিন্তু গৃহবাসী অথচ প্রেতাধিকৃত পশ্বাদিরই বলির বিধি দেখিতে পাওয়া যায়। বাস্তবিক উহারাই বলির উপযুক্ত, এবং উহাদিগের বলির ব্যবস্থা সঙ্গত ভিন্ন অসঙ্গত নহে। মহর্বিগণ মানব-হৃদয়ের নিকৃষ্ট পাশব-প্রবৃত্তির মুর্ত্তিমান পশুদিগকে বিনাশ করিয়া ঐ বলির দ্বারা পাশব-প্রবৃত্তি-বিনাশের প্রত্যক্ষতা দেখাইয়া গিয়াছেন। ঐরূপ বলির দ্বারা মনুষ্য নিঃসন্দেহ পরা মুক্তি লাভে সমর্থ হয়।

এই পৃথিবীতে যেমন প্রেতাধিকৃত পশ্বাদি আছে, তদ্রূপ

প্রেতাধিকৃত মনুষ্যও আছে। প্রেতাধিকৃত পশ্বাদির দেব-  
সন্নিহিত প্রেতদিগের সন্তোষার্থে বল্যোপহার হইয়া থাকে।  
সেই প্রেতাধিকৃত মনুষ্য নরকের উপহারের জন্য প্রস্তুত  
হয়। কুভাব-ভঙ্গী-প্রদর্শন দ্বারা কেহ যেন বালকের হৃদয়কে  
কলুষিত না করে। সে নিজেই ত নরকের কাঁট, আবার  
কাঁট-বংশ বৃদ্ধি করিবার প্রয়োজন কি ?

সর্বদা আপনার জীবনে পবিত্রভাব প্রকাশমান রাখিবে।  
দেহে বা পরিচ্ছদে কখন কুভাবোত্তেজক কোনরূপ চিহ্ন  
ধারণ করিবে না, বা আসিতে দিবে না। পুনশ্চ, যেমন  
দেহকে বিশুদ্ধভাবে সজ্জিত করিবে, নিজ গৃহকেও তদ্রূপ  
সজ্জিত করিবে। তোমার গৃহ বিলাস-কানন নহে। সর্বদা  
স্থান ও কালের বিবেচনা করিবে। কুৎসিত প্রতিকৃতি  
সংসার হইতে দূরে রাখিবে। প্রতিকৃতি আলেক্ষ্য বা বর্ণনা  
উভয়বিধ হইতে পারে। ছুইটীকেই দূর করিয়া দিবে।  
সংসারকে যদি স্মৃথের আগার করিতে চাহ, সন্তানদিগকে  
যদি পবিত্র করিতে অভিলাষ কর, অথবা তোমার গৃহকে  
যদি গোলাপের উপবন করিবার মানস থাকে, কণ্টকগুলিকে  
তথা হইতে অগ্রে উৎপাটন কর এবং তথায় ঐ কণ্টকোদ্-  
গমের সম্ভব-পরতাকেও একেবারে বিনষ্ট কর, দেখিবে  
সমস্তই তোমার আয়ত্ত হইয়াছে, এবং তোমারই গৃহ লক্ষ্মীর  
আবাসস্থল হইয়াছে। কুদৃষ্টি হইতে আপনাকে এবং অপরকে  
রক্ষা কর, পবিত্রতা লাভ করিবে, এবং তৎসঙ্গে ঈশ্বরের  
প্রসন্নতা লাভ করিয়া সুখী হইবে।

## ৩৯। বৈবয়িক অধীনতা\*।

মানবাত্মা স্বাধীন আত্মা; সুতরাং পরাধীন হইতে চাহে না। পরাধীনতা তাহার নিকট কষ্টের সামগ্রী। কিন্তু মানুষ স্বাধীন কখন? নিয়মের অধীনতাই স্বাধীনতা। অগ্নি-ক্ষুলিঙ্গে হস্ত প্রদান করিলে অবশুই নিপীড়িত হইবে। অগ্নির দাহিকা-শক্তি-জ্ঞান এবং তৎজ্ঞানের অধীনতাই তোমাকে অগ্নি-দাহন হইতে রক্ষা করিবে। নিয়মের বিরুদ্ধে গমন তোমার স্বাধীনতা নহে, তাহা স্বেচ্ছাচারিতা। সেই স্বেচ্ছাচারিতাই মানুষের বিনাশের কারণ।

যৌবনকালে কাহারও অধীন হইব না, এই ইচ্ছাই সতত প্রবল। সে ইচ্ছা স্বেচ্ছাচারিতারূপে যুবকের চক্ষে প্রতিভাত হয় না; সেই অনভিজ্ঞতাতেই তাহার অনেক বিপদ ঘটয়া থাকে। তোমার গুরু অপেক্ষা তোমার বুদ্ধির আধিক্য বা তীক্ষ্ণতা থাকিতে পারে, কিন্তু তজ্জন্য তুমি তাঁহাকে তাচ্ছল্য অথবা অবমাননা করিবে না। যিনি গুরু, তিনি শ্রেষ্ঠ ও মাননীয়। তিনি তোমার এক দিনের বা একটা বিষয়মাত্রের উপদেষ্টা হইয়া থাকিলেও, তিনি তোমার চির-সম্মানের উপযুক্ত। “গুরু-মারা বিদ্যার” ভীষণতা তোমার নিজ বয়োবৃদ্ধির সহিতই বৃদ্ধিতে পারিবে। এক দিন তুমি স্বীয় গুরুকে আঘাত করিবে, অন্য দিন তুমিও তদ্রূপ আপন শিষ্য কর্তৃক আহত হইবে। যাহা নিজে পাইতে

ইচ্ছা করিবে না, কখনও অপরকে তব্যবহার প্রদানে আপনাকে কলঙ্কিত করিবে না।

কৰ্ম্মস্থানে তোমার একজন শ্রেষ্ঠ আছেন। হয় ত তিনি তোমার মত কৰ্ম্মপটু নন, অথবা তোমার বুদ্ধিতেই তাঁহাকে তুমি সেইরূপ হির করিয়াছ। তাঁহার কর্তৃত্ব তোমার পক্ষে বিষবৎ বোধ হইবে। তজ্জন্য তুমি তাঁহাকে অপদস্থ অথবা একেবারে অপসারিত করিবার চেষ্টা করিবে, এবং হয় ত তোমার সেই চেষ্টাও সফল হইবে। কিন্তু তোমার তাহাতে কি লাভ হইল? ভেকদিগের কাঠরাজ্যস্থলে গৃধরাজ-প্রাপ্তিতে তাহাদিগের যাদৃশ দশা হইয়াছিল, তোমার পক্ষে তাহাই ঘটিতে পারে। তখন আর ক্ষোভের সীমা থাকিবে না।

সকল শ্রেষ্ঠে ঈশ্বরের যে আপেক্ষিক বর্তমানতার আধিক্য, ইহা স্মরণ রাখিবে। যিনি তোমার শ্রেষ্ঠ, স্বয়ং ঈশ্বর তাঁহাকে অনুান সেই সময়ের জন্য সেই শ্রেষ্ঠত্ব-পদে অধিষ্ঠিত করিয়াছেন। তুমি কেন সেই পদের অমর্যাদা করিবে। অবমাননা করিলে, তুমি যে কেবল সেই মাল্লুষের অমর্যাদা করিলে তাহা নহে, তদ্বারা ঈশ্বরেরও অসম্মাননা করিলে। এক কার্যে লৌকিক ও নৈতিক উভয়বিধ পাপই সংঘটিত হইল।

নিয়মাবধীনতাই জীবনের সৌন্দর্য্য। ঐ অধীনতাই তোমার শ্রীবৃদ্ধি হইবে। এবং তোমার অধীনস্থগণও তোমার নিকট শিক্ষা লাভ করিয়া স্বসদৃশ ব্যবহারে আপনাদিগকে উন্নতিশালী করিবে। অধীন বা স্বাধীনভাবে বিচরণের



বিতর্ক যখনই মনোমধ্যে উপস্থিত হইবে, যাহার সম্বন্ধে ঐরূপ আচরণে প্রবৃত্ত, তৎস্থলে আপনাকে কল্পনা দ্বারা অধিষ্ঠিত করিলে, প্রকৃত ন্যায়পথ নির্বাচন করিয়া লইতে পারিবে।

“যে রূপ ব্যবহার চাহ, অস্ত্রের প্রতি তদ্রূপ ব্যবহার করিবে” ইহা তোমার জীবন-নিয়ামক হইলে, নিয়তই তুমি প্রকৃত পথে চলিতে পারিবে।



### ৪০। মায়া ।

যমকীট ভূমধ্য হইতে উঠিল; কিন্তু তাহার গাত্রে ধূলি বা মৃত্তিকা আদৌ দৃশ্যমান নহে। প্রকৃত সংসারী বা সংসার-বিরাগী ঠিক ঐ কীট সদৃশ। সংসারে লিপ্ত অথচ নির্লিপ্ত। দৃশ্যমানে মায়াশূন্য; কিন্তু কথিত কীটের গাত্রে যেমন ধূলিকণা অবশ্য সংলগ্ন থাকে, সেইরূপ তাঁহারও মায়া আছে, কিন্তু স্থূল দৃষ্টিতে তাহা পরিলক্ষিত হইবার বিষয় নহে।

মায়া যাহার অধিক, হুঃখ তাহার অধিক। কিন্তু সংসার-রক্ষণে মায়াও আবশ্যিক। সে মায়া সংসার-বিরাগীর মায়া। তদ্রূপ মায়িক হইলে, তুমিই বুঝিবে তোমার মায়া কি। তদবস্থায় অপরের মায়া দ্বারা তুমি আক্রান্ত হইবে না। অধিক মায়াযুক্ত ব্যক্তি আপনার কার্যের বিঘ্ন উপস্থিত করে, এবং অপরেরও বিঘ্নের কারণ হয়।

মায়িক! তুমি হয় ত ভ্রাতার মায়া ছেদন করিয়া

অগ্রত্ব ইচ্ছানুরূপ গমন করিতে সক্ষম, কিন্তু পুত্রের মায়াতে তুমি আবদ্ধ হইবে। হয় ত ভ্রাতাকে তুমি বিন্দু পরিমাণ স্নেহও করিবে না, কিন্তু পুত্রের জগ্ন প্রাণ পর্য্যন্ত উৎসর্গ করিতে কুণ্ঠিত হইবে না। তুলনা করিবে, ভ্রাতা অপেক্ষা পুত্র বড়। কিন্তু ঐ তুলনা কল্পনাও কদাচ করিও না। যদি কর, বুঝিবে যে আত্মজ অপেক্ষা সহোদর কম স্নেহের পাত্র নহে। কারণ আত্মজ তোমার ঔরসজাত হইলেও অপরের গর্ভজাত; কিন্তু তোমার সহোদর ও তুমি এক জনক-জননী হইতে জাত, এবং একই মাতার মধুর স্তনে লালিত ও পালিত। অতএব তোমার স্নেহের ইতর বিশেষ কেন হইবে; এবং মায়ারও তারতম্য কেন ঘটবে?

তুলনা দ্বারা সংসার নষ্ট হয়। ঈশ্বর যাহাদিগকে তোমার অধীনে সংস্থাপন করিয়াছেন, সকলেই তোমার স্নেহাকাজী এবং সকলেই স্নেহ-প্রাপ্তে সমান উপযুক্ত। কল্পনা দ্বারা কাহাকে ছোট বা বড় করিবে না। সমান নেত্রে সকলকে দর্শন করিলে, তুমিই নির্লিপ্ত সংসারী হইবে। তোমারই পরিবার স্নেহের পরিবার হইবে। কাল্পনিক তুলনা দ্বারা মায়ার বৃদ্ধি হয়। একের প্রতি অথবা পক্ষপাতিত্ব, এবং অপরের প্রতি অগ্রায় উদাসীনতা উপজাত হয়। ইহা হইতেই পরিবার-মধ্যে বিশৃঙ্খলা এবং পরিণামে ঐ পরিবারের বিনাশও সংঘটিত হয়।

সংসার-পালন, কর্তব্য-পালন ও ঈশ্বরের সেবা যাহার জ্ঞান, তাহাকে মায়া আক্রমণ করিতে পারে না। সকল

অবস্থাতেই তাহার সমভাব। কর্তব্য-সাধনের জ্ঞান তিনি কাহাকেও পরিবর্দ্ধন করিবেন না। আবার, কর্তব্য দ্বারা আহৃত হইলে কাহারও মুখাপেক্ষাও করিবেন না। তাদৃশ মানব একই কর্তব্যানুরোধে সময়ে গৃহস্থ এবং সময়ে সন্ন্যাসী উভয়ই হইয়া থাকেন।

যেখানে, কর্তব্যজ্ঞান সেইখানেই পাপশূণ্যতা। হয় ত এই জ্ঞান তোমাকে কেহ কঠোর নিষ্মম বলিয়া আখ্যাত করিবে। কিন্তু তাহাতে ভীতির কারণ নাই। নিষ্মমতাই সময়ে পূর্ণমমতারূপে পরিচিত হইবে। ফলবান্ বৃক্ষকে রক্ষা করিতে হইলে আবরণ বা বেষ্টনের আবশ্যক। সর্বদা এই আবরণের দ্বারা আবৃত বা বেষ্টনের দ্বারা পরিবেষ্টিত হইয়া আপনাকে রক্ষা করিবে। যাহারা তোমার জীবন-ফল-ভোগাভিলাষী, তাহারা সেই ফলভোগে স্নেহী হইবে, এবং তুমিও ধন্য হইবে।

### ৪১। শুদ্ধাচার ও পবিত্রতা।

ইহাতে শরীর ও আত্মার উভয়েরই পুষ্টিসাধন হইয়া থাকে। দেহ ও আত্মার এমনই যোগ, যে একের পুষ্টি বা অবনতিতে অপরের পুষ্টি বা অবনতি হ্রব। ইহা যেমন সাধারণ বিশ্বাস, তেমনি ইহা প্রকৃতও বটে। কথিত আছে, লক্ষ্মীর আবাসেই পারাবতের বাস। দেহের মধ্যে ছইটী কপোত, পরামাত্মা ও জীবাত্মা। যেখানে শুদ্ধাচার, সেখানে পরমাত্মার অধিক স্ফূর্তি। জীবাত্মারও তথায় স্নেহে অব-

স্থিতি । অপবিত্রতা দর্শনে পরমান্বা অন্তর্হিত হন । স্মতরাং জীব-কপোতীরও তৎকালে তথা হইতে পলায়ন সম্ভব । দেহকে লক্ষ্মীর আবাস করিতে হইলে, শুদ্ধাচার ও পবিত্রতা তথায় সর্বদাই বিরাজমান রাখিবে ।

যাহা অপরের চক্ষে হয়, তাহা জীবনে প্রদর্শন করার প্রয়োজন কি ? হিন্দুর শুদ্ধাচারিতা চিরদিন প্রসিদ্ধ । গোলাপের আদর সর্বত্র । অথ কুমুমকে তুমি গোলাপাখ্যা প্রদান করিতে পার, কিন্তু তাহা স্বেচ্ছাচারিতা । তোমার কোন অশুচি ব্যবহারকে নিজে শুচি বোধ করাও ঐরূপ স্বেচ্ছাচারিতা । স্নবেশে বিভূষিত হইয়া মলাদি পরিত্যাগে তোমার গৌরব হইতে পারে, কিন্তু যাহার অনুকরণ করিলে, তাহার অথ পরিচ্ছন্নতা ত অনুকরণ করিতে পারিলে না । তথায় তোমার গৌরব তোমার কেবল অশুচির কারণমাত্র হইল । মলু কহিয়াছেন, মল-মূত্রাদি পরিত্যাগ-কালে মস্তক পর্যন্ত অঙ্গ বস্ত্রাবৃত করিবে । কিন্তু সেই বসন তদবসানেই পরিত্যজ্য । স্বাস্থ্যের দিকে দৃষ্টি করিলে বসনাচ্ছাদিত হইয়াই মলমূত্র-ত্যাগ বিধি । কেন না, দূষিত রেণু তোমার অঙ্গে স্পর্শ করিলে তাহা তোমার লোমকূপে প্রবেশ করিবে, এবং উহা তোমার পীড়ার কারণ হইবে । কিন্তু যে পরিচ্ছদ তুমি আহারকালেও ব্যবহার করিবে, তাহাতে দূষিত রেণু সংশ্লিষ্ট হইলে, তুমি যে কেবল অশুচি অবস্থায় আহার করিলে তাহা নহে, তদ্বারা তোমার অস্থখও জন্মিতে পারে । পরিশুদ্ধতায় তোমার পরিপাক-শক্তির তীব্রতা অক্ষুণ্ণ থাকিবে । হয় ত যৌবনে, তদ্বিকে তুমি দৃষ্টিও করিবে

না, কিন্তু বয়সে সেই পরিপাক-শক্তির হ্রাসতায় বিশেষ চিন্তাযুক্ত হইবে।

জীবনের একটি ব্যবহার শুদ্ধ করিলে আর একটি ব্যবহার তদাকারে আপনিই পরিণত হইবে। তুমি বলিবে, শুদ্ধাচার কেবল আপেক্ষিক বাক্যমাত্র। কিন্তু জীবন শুদ্ধ করিলে, আপন জীবনেই পরিশুদ্ধির মান-দণ্ড প্রাপ্ত হইবে। পুস্তকে বা লোকের নিকট তাহা শিক্ষার প্রয়োজন হইবে না। যেমন গৃহ-পরিষ্কার-করণ-কালে একটি আবর্জনা দূরীকৃত হইলে অপরগুলি স্বতঃই নয়নপথে পতিত হয়, তোমারও অন্তরের একটি আবর্জনা পরিস্কৃত হইলে, অপরগুলি ঐরূপে এক একটি করিয়া আপনিই পরিস্কৃত হইবে।

দেব-পূজা বা ব্রতানুষ্ঠানের সময় তুমি শুদ্ধাচারী হইবে। কিন্তু শুদ্ধাচার তোমার জীবনের নিত্য-ব্রত না করিলে, সাময়িক পরিশুদ্ধতা বিশেষ কার্যকর হইবে না। সংযমন তোমার জীবনের প্রতি মুহূর্তের কার্য হইলেই, পূজা বা ব্রতের প্রকৃত ফললাভে সূধী হইবে।

পবিত্রতা হৃদয়ের প্রফুল্লতা উৎপাদন করে। সে প্রফুল্লতায়, তৎসমীপবর্তী অপর সকলই প্রফুল্লভাব ধারণ করে। বৃক্ষে পুষ্প প্রফুল্লিত হইলে, তাহা যেমন সেই বৃক্ষের শোভা বর্দ্ধন করে, তেমনি তদ্বারা তৎসমীপস্থ অপর সমস্ত বস্তুও তৎশোভায় শোভিত হইয়া থাকে। পবিত্র হৃদয়ের সন্নিহিত ব্যক্তিমাতেই আনন্দ অনুভব করে, এবং সকলেই তৎসংস্পর্শ নাভের জন্মও ইচ্ছুক হয়। স্নেহাচারীর সংসর্গ তৎশ্রেণীর

লোকের নিকট প্রকাশিতঃ অনাদরের বস্তু না হইলেও অপর সকলের নিকট ঘৃণার্থ । গুণাচারের দ্বারা সম্মানলাভে কদাচ অবহেলা করিবে না ।

## ৪২ । বৈষয়িক বুদ্ধি ।

এই বুদ্ধি সাধারণ বুদ্ধি হইতে স্বতন্ত্র । অনেক সময়ে সাধারণে ইহাকে বিপরীত বুদ্ধি মনে করিয়াও ভ্রান্ত হইয়া থাকে । যখন উহা সাধারণের বোধগম্য নহে, তখন সাধারণের বিপরীত বুদ্ধিতে ঐ রূপই প্রতীয়মান হয় । পুস্তক-পাঠ, বৈষয়িক জ্ঞানোপার্জনের প্রধান উপায় হইলেও, সর্বদা পুস্তক-পাণ্ডিত্যে বৈষয়িক বুদ্ধি উপজাত হয় না । কথিত আছে, কোন ব্রাহ্মণ পুস্তক-পাণ্ডিত্য লাভ করিয়া সর্বদাই আপনার পাণ্ডিত্যালোচনায় নিযুক্ত থাকিতেন । একদা তাঁহার ব্রাহ্মণী অন্ন পাক করিতেছিলেন, এমন সময়ে তাঁহার বারি আনয়নের প্রয়োজন হইলে, তিনি ঠাকুরকে পাকশালায় বসাইয়া সন্নিকটস্থ কোন পুষ্করিণীতে জল আনয়ন জন্ত গমন করেন । যাইবার কালে ঠাকুরকে আলের দিকে দৃষ্টি রাখিতে বলিয়া যান । ইতিমধ্যে দৈবগতিকে অন্ন উৎলাইয়া চারিদিকে পড়িতে আরম্ভ হইলে, ব্রাহ্মণ মহাবিপদে পতিত হইয়া নিরুপায়ে অগ্নির স্তবে প্রবৃত্ত হইলেন । ব্রাহ্মণী আসিয়া দেখেন, ঠাকুর ধ্যানস্থ, অন্ন সমস্ত নষ্ট হইয়া যাইতেছে । ব্রাহ্মণী শশব্যস্তা হইয়া আপন কক্ষাধিষ্ঠিত কলসী হইতে অন্নপাত্রের জল নিক্ষেপ করিলেন ।

ভাব ধারণে ব্রাহ্মণের বিশ্বয়ের আর পরিসীমা রহিল না ; অমনি অগ্নিস্তোত্র সমাপন করিয়া ব্রাহ্মণীর স্তবে প্রবৃত্ত হইলেন। তিনি কি স্বয়ং লক্ষ্মী কি বারুণী, অথবা কোন দেবী, কি কোন মায়াবিনী, এই তাঁহার মনোমধ্যে মহা বিতর্ক উপস্থিত হইল। তখন ব্রাহ্মণী অন্নপাক-শাস্ত্রের ব্যাখ্যা দ্বারা ঠাকুরের বিশ্বয় ভঞ্জন করিলেন। ইহা একটা কৌতুকজনক গল্প হওয়া বিচিত্র নহে। কিন্তু ব্রাহ্মণের সহজ-বুদ্ধির ভাব সাধারণ মনুষ্য-জীবনে অনেক সময়ে দৃষ্ট হইয়া থাকে। সংসারে প্রবৃত্ত না হইলে, বিষয়-বুদ্ধির ক্ষুণ্ণি হয় না, ইহা প্রচলিত সত্য কথা। কার্য্যানুসারেই বুদ্ধির প্রার্থব্য জন্মিয়া থাকে।

রাজবুদ্ধিই প্রধান বুদ্ধি। হয় ত সাধারণে উহাকে অসরল বা নীচবুদ্ধি বলিবে। কিন্তু উহা তদ্রূপ নহে। নীচ প্রকৃতিতে নীচবুদ্ধি অবশ্যই সম্ভব। কিন্তু স্বয়ং ঈশ্বর হইতে রাজ্যভার প্রাপ্ত হইয়াছেন ইহা ষাহাদিগের জ্ঞান, তাঁহাদিগের কার্য্যে কোন অসরলতা বা ভীতির আশঙ্কা নাই। যদি তাঁহাদিগের কার্য্য অসরল বা ভয়ানক হয়, তজ্জন্ত তাঁহারা সেই ভারপ্রদাতা ঈশ্বরের নিকট চিরদিনের জন্ত দায়ী, এবং মনুষ্যের নিকটও চিরস্থগিত।

তুমি সামান্য একটা সংসারের সুশৃঙ্খলা রক্ষা করিতে কত বিদ্ব দর্শন করিয়া থাক। কেহ বা তোমাকে পক্ষ-পাতী ও নিশ্চয় ইত্যাদি আখ্যা প্রদান করিয়া থাকে, এবং কাহারও নিকট বা কিঞ্চিৎ হৃদয়বান্ বলিয়া তুমি পরিচিত হইতে পার। সকলের নিকট প্রিয় হওয়া কাহার সাধ্য ?

ঐ প্রিয়তা লাভে যাহার উদ্যম, তাহার অবস্থা আখ্যায়িকার চিত্রকারের অবস্থার সদৃশ। সকলের সম্ভাষণোৎপাদনের জগৎ যেমন চিত্র নষ্ট হইয়াছিল, চিত্রকারও পরিণামে সকলেরই অসম্ভাষণ-ভাজন হইয়াছিলেন।

দর্শনমাত্রে কোন বিষয়-সম্বন্ধে আপন মন্তব্য প্রকাশ করিবে না; অথবা তদনুকূলে কি প্রতিকূলে হঠাৎ দৃঢ়নত হইবে না। জ্যামিতি পাঠ করিয়াছ; প্রথম প্রস্তাবনা, তৎপর প্রমাণ। বিষয়-কার্যে তুমি জ্যামিতির মত প্রমাণ চাও। কিন্তু প্রস্তাবনার তোমার বিশ্বাস না থাকিলে প্রমাণ তোমার জ্ঞানলব্ধ হইবে না। বৈষয়িক-কার্য-ফল সমন্বয়-সাপেক্ষ বস্তু। মনে করিলেই ফল দৃষ্ট হইবে না। কালেই তাহা দেখিয়া চমকিত হইবে।

ধৈর্য ও স্থিরতায় বৈষয়িক প্রথরতা উৎপাদিত হয়। সরলতাতে তাহা মনোহর হয়। পুনশ্চ, পূর্ণবিকাশেই যেমন পঙ্কজের শোভা, মনুষ্যের পূর্ণ বয়সকালেই তাহার বুদ্ধি সুশ্রীসম্পন্ন হয়। ত্রি-মস্তকের নিকট যুক্তি গ্রহণ, ইহা সংপূত্রকেই সংপিতার সুপরামর্শ। এই পরামর্শাবেলায়, পুত্রের দুর্গতি অবশ্যস্তাবী। সংসারে উন্নতি লাভ করিতে হইলে বুদ্ধের বিবেচনা তুল্য আপন বিবেচনা করিবে। উন্নতি-চূড়া উচ্চ, সোপান অনেকগুলি। ধীরে ধীরে তাহাতে আরোহণ করিলেই, শিখরদেশ প্রাপ্তির সম্ভাবনা।





## ৪৩ । সামাজিক ভীতি ও সম্মাননা ।

এই দুইটী সাধারণ মনুষ্য-জীবনের প্রধান নিয়ামক । ইহারা যেমন মনুষ্যকে সংপর্থাধিষ্ঠিত রাখে, তেমনি অনেক সময়ে তাহাকে বিপথেও লইয়া যায় । যুবক উচ্চ পদাধি-  
 রুঢ় হইল, তাহার পদ-মর্যাদা-রক্ষণ-ভীতি যৌবনের প্রগল্-  
 ভতা হইতে তাহাকে রক্ষা করিবে ; অথবা অশ্রু উচ্চতর-  
 পদ-সম্মান-লালসা তাহার জীবনের শ্বৈর্যের কারণ হইবে ।  
 এইরূপ সমাজ-ভীতি বা সম্মাননা সংসারের অনিষ্টকর নহে ।  
 বরং তাহাতে সমাজের সুশৃঙ্খলাই রক্ষিত হয় ! কিন্তু যে  
 সমাজ-ভীতি মনুষ্যকে সত্য পথ হইতে বিচলিত করে,  
 তাহাই ভয়ানক, এবং তাহা হইতেই সর্বদা অবহিত হওয়া  
 কর্তব্য । বিদ্যাভ্যাস বা জ্ঞানোপার্জন বৃথা, যদি তদ্বারা  
 তোমার সত্য রক্ষার বল উপজাত না হইল । সকলেই  
 সমাজের দাস ; স্বেচ্ছাচারিতা অবশ্যই ঘৃণ্য । কিন্তু মনুষ্য  
 সমাজের দাস হইলেও স্বাধীন সেবকের পদাধিষ্ঠিত ; কুত্রাপি  
 ক্রীত-দাস নহে । সত্য-পালনে সেবকত্ব-চ্যুতির সম্ভা-  
 বনা নাই ।

তোমার চতুর্দিকস্থ সত্যের আলোক দ্বারাই নিয়ত প্রচা-  
 লিত হইবে । কেহ কোন বহু প্রাচীনকালে সংসারকে একটী  
 উজ্জল দীপালোক প্রদান করিয়া থাকিতে পারে । কিন্তু  
 তাহা অসময়ে ব্যবস্থার, দ্বারা তুমি স্বয়ং একটী অপক্লপ  
 দৃশ্যরূপে প্রতিভাত হইবে, এবং ঐরূপ না হইলেও আপনি  
 চিরদিনই একটী প্রাচীন কালের লোকই রহিয়া যাইবে ।

তাহাতে তোমার অধিক প্রতিপত্তিই বা কি ? লাভের আশাই বা কি ? যদি সাধারণ-মানিত-জ্ঞানীশ্রেষ্ঠকোন সত্য বা ব্যবস্থার অনুমোদন করেন, তুমি কেন তাহার প্রতিবাদ করিবে ? তোমার প্রতিবাদেই বা উহার ক্ষতি কি ? নিশ্চয় জানিও যে প্রচলিত ব্যবস্থানুমোদনে ভয় নাই। সময়ানুসারেই আলোকের প্রকাশ। সে আলোকের সময়োচিত যত্ন ও সম্মান না করিলে তুমিই আত্ম-প্রবঞ্চিত হইলে।

ঈশ্বরের রাজ্যে সর্বদাই দুইটা বল বা শক্তির কার্য দেখিতে পাওয়া যায়। একটা উর্দ্ধগা এবং অপরটা নিম্নগা শক্তি। সংসারে এই দুইটিরই আবশ্যক। এই শক্তিদ্বয়ের যুগপৎ কার্য দ্বারা পরিণামে কার্যের সমতাভাবই উপস্থিত হয়। কিন্তু উখানেই বিক্রমের প্রকাশ। তদ্বিপরীতপক্ষ-সমর্থনে তোমার যে কেবল বলক্ষুর্তি হইল না তাহা নহে, তুমি কালমাহাত্ম্যেরও অসম্মাননা করিলে। যে মতের তুমি পক্ষপাতী, তাহা প্রতিপোষণ করিবার অনেক স্থবির আছে। অকালে নিজের স্থবিরতা উৎপাদনের প্রয়োজন কি ?

সমাজ-ভীতি বা সম্মাননা তোমার প্রাণবধের রাক্ষসী স্বরূপ যেন না হয়। যাহা হৃদয়ের আলোকে স্থির সত্য বলিয়া জানিবে, তাহা সেই রাক্ষসীর ত্রাসে কদাচ অসত্য রূপে প্রতিপন্ন করিবে না। অসত্য তোমার আশ্রয় গ্রহণ করিতে আসিলে তাহাকে “না” বলিতে তুমি কখনও ভীত হইবে না। হৃদয়ের ঐরূপ “না” বাক্যের উদ্যম অসম্মাননা করিবে না। “না” ই অনেক সময়ে বিবেকের শব্দ, এবং বীরের বাক্য। ঐ “না” কে ইচ্ছামত অধীন বা বিনষ্ট

করিবার তোমার ক্ষমতা আছে। কিন্তু সেই ক্ষমতার পরিচালন দ্বারা কখনও যেন তুমি বিপদগ্রস্ত না হও। অনেক সময়ে তোমার প্রতিবেশীর বাক্য অনুমোদন না করিলে তোমার আশঙ্কার কারণ আছে। কিন্তু সত্যের “না” বীরের হুকুম তুল্য। তোমার প্রতিবেশীই তাহাতে স্তম্ভিত হইয়া, পরে একেবারে নিস্তব্ধ হইবে। ইহা পরীক্ষার বিষয়। সাবধানে ইহা জীবনে পরীক্ষা করিলেই সত্যের বল অনুভূত হইবে।

### ৪৪। নিয়ম বা কার্য্য-শৃঙ্খলা ।

কোন পণ্ডিত কহিয়াছেন, “কার্য্যের অর্দ্ধাংশ নিয়ম দ্বারা সংস্খািত হয়।” বস্তুতঃ যেখানে কার্য্যের শৃঙ্খলা আছে, সেখানে কার্য্যকারী দুই জন; এক নিয়ম ও অন্য মনুষ্য। অনেকে সময়ের অল্পতার জন্য আক্ষেপ করে। তাহাদের ধারণা যে ইচ্ছাসত্ত্বেও সময়ের অল্পতা হেতু তাহাদিগের কোন কোন সদনুষ্ঠান অসংস্খািত রহিয়া যায়। বালকেরা স্ব স্ব পাঠের প্রচুর সময় নষ্ট করিয়া শেষে পাঠাভ্যাসের সময় দেখিতে পায় না। বিদ্যালয়ে ভিন্ন ভিন্ন সময় নিরূপিত আছে। যাহাদিগের বাটীতেও ঐরূপ সময় নির্দ্ধারিত আছে, তাহাদিগের পাঠাভ্যাসের অথবা অপর কার্য্য সম্পাদনের সময়ের জ্ঞান কখন আক্ষেপ করিতে হয় না। বাল্যকাল হইতেই কার্য্য-শৃঙ্খলা-নির্দ্ধারণ অভ্যাস করা এবং সেই অভ্যাস, প্রতি কার্য্যে পরিণত করা অতীব

প্রয়োজন। বাল্যে বা কোমারে কার্য-শিথিলতা থাকিলে যৌবন এবং বার্দ্ধক্যে অধিকই শিথিলতা সঞ্জাত হইবে।

কার্য-নিয়ম থাকিলে, আলস্য উপস্থিত হইবার সম্ভাবনা নাই। যেমন আহাৰ্য্য বস্তুর ভোজন-পর্যায়-ক্রমে, আহাৰে রুচিরই বৃদ্ধি হয়, তেমনি কার্য-সংসাধনে নিয়মিত পদ্ধতি থাকিলে কার্যের প্রতি আস্থাই উপজাত হয়, কখনও বিতৃষ্ণা জন্মিতে পারে না। পুনশ্চ, যেমন আহাৰের নিত্য এক পদ্ধতি সত্বেও আহাৰের প্রতি অনাদর উপস্থিত হয় না, তেমনি কার্য-সম্পাদনেও একটা নির্দ্ধারিত পদ্ধতি থাকিলে তাহাতে শৈথিল্যের আশঙ্কা নাই। তবে কালতিপাতে কার্য-পদ্ধতির পরিবৰ্দ্ধন আবশ্যক হইতে পারে, তখন তাহা অবলম্বিত হইলেও উপকার। কার্য-পদ্ধতি নিত্য পরিবৰ্ত্তন করিবে না। ঐরূপ পরিবৰ্ত্তনে তোমার হৃদয়-চঞ্চলতা উপস্থিত হইবে, এবং নিয়মের প্রতি তোমার আস্থা থাকিবে না। একটা নির্দ্ধারিত নিয়মমতে চলিলে, তদ্বারাই কার্য-সাফল্যের সম্ভাবনা।

নিয়ম দ্বারা মনুষ্য পটুতা লাভ করে। এমন কি ইহা দ্বারা প্রবঞ্চকের চাতুরীতেও প্রথরতা সমুৎপাদিত হয়। সেই-রূপ চাতুরী দ্বারা সে অনেক সময়ে অপরের চক্ষু হইতে আপন অসৎকার্য্য গোপন রাখিতে পারে। তথাচ অনিয়মিত চাতুরী অপেক্ষা নিয়মিত চাতুরীতে মনুষ্যের রক্ষা আছে। কেন না তাহা নিয়মিত উপায় দ্বারাও সহজেই প্রকটীকৃত হইয়া থাকে।

নিয়ম-পালনে ভণ্ড-তপস্বীও তপস্বী হয়। সকল শাস্ত্রে ঈশ্বরারাদনার নিয়মিত পদ্ধতি আছে। ঐ পদ্ধতিতে ভণ্ড-যোগের সৃষ্টি হয় বটে, কিন্তু ঐ পদ্ধতিতেই আবার প্রকৃত মুক্তি। কবি গোবিন্দস্বিথ এক স্থলে বলিয়াছেন, “মুর্খেরা (দেব-মন্দিরে) বিজ্ঞপ করিতে আসিয়াও ঈশ্বরোপাসনা শিক্ষা করিল।” ইহা অধ্যাত্ম-জীবনের একটা প্রকৃত সত্য। সাধারণ মানবের পক্ষে ভগবন্মোচ্চারণ কয় দিন প্রকৃতরূপে ঘটে? কিন্তু ঐ নামোচ্চারণ যাহার নিত্য ব্যবহার, অন্ততঃ একদিনও ঐ নামোচ্চারণে তাহার হৃদয় উচ্ছলিত হইতে পারে। একদিনের একটা বাক্যে মনুষ্য-জীবন চিরদিনের জন্ত পরিবর্তিত হইয়াছে, ইহা ঐতিহাসিক বিষয়। “গোপাল সিংএর বেগারে”ও উপকার আছে। নিত্য নিয়মে সমস্ত কার্য্য করিবে। তাহাতে তোমার উন্নতি ধ্রুব জানিবে।

### ৪৫। ঋণ ।

সাধারণ মানুষের ঋণ গ্রহণ, কৰ্কটিকার গর্ভধারণের সহিত উপমিত হইয়াছে। কিন্তু ভূপালের ঋণগ্রহণ অগ্রবিধ কথিত হয়। অর্থাৎ তাঁহার ঋণ-বৃদ্ধি-সহ তাঁহার রাজলক্ষ্মী আরও স্থির-ভাবাপন্ন হন, এইরূপ মত প্রচলিত আছে। এ মতের সারবত্তা যাহাই হউক, ইহাতে অন্যান্য এই দোষ দৃষ্ট হয় যে ভূপালের কার্য্যালোকরণ তৎ-প্রজাগণের স্বভাব হওয়া বিচিত্র নহে। তবে উক্ত হইতে পারে যে, রাজার

কার্য্য প্রজ্ঞার অনুকরণীয় নহে। কিন্তু মনুষ্যের প্রবৃত্তি একেবারে নিবারণিত হইতে পারে না।

ঋণের প্রলোভন অল্প লোকেই এড়াইতে পারে। সাই-  
রেন\* রাক্ষসী সঙ্গীতের দ্বারা মনুষ্যকে আকৃষ্ট করিয়া, পরে  
সেই মনুষ্যের রক্ত শোষণ করিয়া তাহাকে বিনাশ করার  
কথা বর্ণিত আছে। ঋণ-গ্রহণ-স্পৃহাই সেই রাক্ষসী। এক-  
বার ইহার করকবলিত হইলে উদ্ধারের আর শক্তি নাই।  
ঋণের এমনই মোহিনীশক্তি যে, অনেক সময়ে মনুষ্য আপন  
ইচ্ছায় ইহার অধীনতা স্বীকার করে। কেহ এক সময়ে  
বলিয়াছিলেন যে, ঋণে বড়মানুষী আছে; অর্থাৎ ঋণী ব্যক্তির  
নিকট ঋণাদায় জগ্ন সর্বদা লোক গমনাগমন করে, তাহাতে  
ঐ সমস্ত লোক ঐ ঋণীর আশ্রিত বিবেচনায় কাহারও  
ভ্রান্তি জন্মিতে পারে; অতএব ঋণে আঢ্যতা প্রতিপাদন  
হইবে কল্পনায় সেই ব্যক্তি স্বচ্ছন্দতা সত্ত্বেও ঋণ করিতেন।  
ঋণের এ অদ্ভুত বিড়ম্বনাও আছে! কথিত ঋণী ব্যক্তি,  
ধনাঢ্য প্রচারিত হইবার জগ্ন আপন ভাণ্ডার হইতে যে  
একটা ভীষণ কর প্রদান করিতেছেন, তাহা তাহার জ্ঞান  
নাই। “নাতোয়ানের ছনো মালগুজারি” সর্বদাই সত্য,  
কিন্তু সক্ষমের অক্ষম ব্যক্তি তুল্য ব্যবহার অত্যন্ত আক্ষে-  
পের বিষয়। ঋণ গ্রহণ সর্বদা দূষণীয়, কিন্তু ক্ষমতা সত্ত্বে  
ঋণ করিয়া দ্রব্যাদি ক্রয় আরও গর্হিত। ঋণী ব্যক্তি যে  
কেবল আপনার অনিষ্ট করে তাহা নহে, সে সমাজের

সকলেরই অনিষ্টের কারণ। ঋণে দ্রব্য বিক্রয় হইলে তন্মূল্য অপেক্ষাকৃত অধিক হয়। অপিচ সাধারণ ব্যবসায়ী সমতা রক্ষার জন্ত প্রায়ই ঋণী এবং অঋণীর সম্বন্ধে পণ্য-সামগ্রীর একই মূল্য নির্ধারণ করে। সুতরাং ঐ অবস্থায় সকলেই ঋণীর পাপের ফলভোগী হয়।

ঋণে পাপ, ইহা সর্বশাস্ত্রসম্মত। ঋণী ব্যক্তিই অসুখী। যে ঋণ করিল, সে স্বীয় ঈশ্বর-প্রদত্ত স্বাধীনতা তদন্তমর্গের নিকট চিরদিনের জন্ত বিক্রয় করিল। অন্যান্য তাহার পক্ষে স্বাধীনতা রক্ষা সূকঠিন। ঋণাবস্থায় মৃত্যু, আরও অধিক পাপের কারণ। ঋণীর আত্মা সন্তান-সন্ততির শুভকাগনা প্রাপ্ত না হইয়া, অনেক সময়ে তাহাদিগের অভিসম্পাতই প্রাপ্ত হইয়া থাকে।

কদাচ ঋণ করিবে না। নিজের উপায়ের মধ্যেই আপন ব্যয় আবদ্ধ রাখিবে। উচ্চ চালের দ্বারা কয়েক দিবস তুমি লোকের চক্ষে ধূলি প্রদান করিতে পার বটে; কিন্তু পরিণামে সেই ধূলি প্রক্ষেপে তুমি যে কেবল আত্ম-সুখ-হারা হইয়া সংক্লিষ্ট হইবে তাহা নহে, সাধারণের নিকটও তুমি অতি হেয়রূপে প্রতীয়মান হইবে।

ঋণ, বহাজল সদৃশ। আপাততঃ তদ্বারা তোমার শুষ্ক-গার পূর্ণ হইল বটে, কিন্তু পরে তাহাতেই তোমার গৃহ-স্থিত তাবৎ দ্রব্যই ভাসিয়া যাইবে। বহাজল প্রবেশ নিবারণ জন্ত যেমন বাঁধের প্রয়োজন, ঋণ-নিবারণের জন্তও ঐরূপ বন্ধনের আবশ্যক। মিতাচার ও পরিমিত-ব্যয়িতা তোমার ঐ বন্ধন সদৃশ হইবে। এইরূপ ব্যবহারে তোমার

অভাব থাকিবে না, এবং ক্লেশও হইবে না। কোন দ্রব্যের আবশ্যক হইলে, মহাত্মা সফ্রেটাসের বাক্যটি স্মরণ করিবে। অর্থাৎ “ঐ দ্রব্য বিনা তুমি কার্য্য চালাইতে পার কি না”, এই কথাটি সর্বদা মনে করিবে। এই মন্ত্র সাধনে সিদ্ধি লাভ করিলে, তুমি কোনমতে অপব্যয়ী হইবে না; অথচ তদ্বারা তোমার রূপণতাও সঞ্জাত হইবার কোন আশঙ্কা নাই। তোমার প্রকৃত অভাবের জ্ঞান জন্মিলে, তুমি অন্ধণী ও অরূপণ হইয়া স্মৃথী হইবে।

### ৪৬। বিবাহ।

ইহা ঈশ্বর-প্রতিষ্ঠিত একটা মহদলুষ্ঠান। বিরুদ্ধবাদীগণ যে কেবল স্ব স্ব প্রকৃতির বিরোধী তাহা নহে, তাহাদিগের মত সাধারণ প্রকৃতিরই বিরুদ্ধ। প্রকৃতি ও পুরুষের মিলন, অথবা আদম ও হবার সৃষ্টি, কেবল কবির মনঃকল্পনা নহে। ইহাতেই যোগের বিধি প্রথম প্রচারিত হইয়াছে। ঈশ্বর হইতে সংভিন্ন আত্মাই মানবাত্মা, এবং তৎসহ যোগ স্থাপনেই পুনশ্চ তাহা দেবাত্মা। উদ্ধাহই ঐ যোগ স্থাপনের একমাত্র উপায়। প্রকৃতি বা স্ত্রী এবং পুরুষ, বাস্তবিক ভিন্ন নহে। এক আত্মারই ভিন্ন ভিন্ন আকার। প্রকৃত আত্মার আত্মার যোগ। নর ও নারীর উদ্ধাহে সেই যোগের প্রচার, এবং তদ্বারাই মানবের সেই যোগ-শিক্ষা।

বিবাহে শুভদৃষ্টির প্রথা প্রচলিত আছে। ইহাতেই প্রথম পরিচয়। এই দৃষ্টিতে আত্মার যোগ স্থাপন হইলে, তাহাই



শুভবিবাহ হইল। নচেৎ সেই বিবাহ ছুঃখের কারণে পরিণত হইবে। পতি-পত্নীর বিচ্ছেদ, অথবা একের প্রতি অপরের অম্নেহ, এই প্রকৃত বিবাহ বা আত্মযোগাভাবেই ঘটিয়া থাকে।

যেমন নর ও নারীর শুভদৃষ্টির কাল নিরূপিত আছে, ছুই নরের মধ্যেও ঐরূপ শুভকাল উপস্থিত হয়। সেই শুভদৃষ্টিতে যে যোগ স্থাপন হয়, তাহা ছুই নরের মধ্যে প্রণয় নামে আখ্যাত, এবং নর ও নারীর মধ্যে তাহা পরিণয় নামে অভিহিত হয়। কিন্তু লৌকিক প্রণয় বা পরিণয়, বাক্যেই অবসান হইতে পারে। প্রকৃত পরিণয়েই প্রকৃত বন্ধুত্ব। তাহা চিরদিন অখণ্ডনীয়; উহার পরাকাষ্ঠা নর-নারীর মধ্যে হর-পার্কর্তীর যোগ, এবং ছুই নরাত্মার মধ্যে হরি-হররূপে অভেদাত্মার চিরস্থিতি। রাসলীলা আর কিছুই নহে, উহা মানবাত্মার এই পরিণয়-লীলা। মানব-সমিতি চিরদিনই হইয়াছে। ভক্ত যোগীগণ সেই রাসলীলা দ্বারা আত্মার সমিতি প্রদর্শন করিয়া গিয়াছেন। ছুই আত্মার মিলন সংসারী অসম্ভব দেখে, কিন্তু তাঁহারা ঐ লীলা দ্বারা বহুর মিলন বা একীভাব প্রত্যক্ষ দেখাইয়া গিয়াছেন। যেখানে পরম সত্য সকলেরই এক লক্ষ্য, সেই-খানেই ঐরূপ মিলন সম্ভব। শ্রীকৃষ্ণ-প্রেমে ষোড়শ শত গোপিনী ব্যাকুলা। তাঁহাদিগের মধ্যে বিদেহ কোথায়? কৃষ্ণ-রাধিকা মিলনেই সকলের আগ্রহ। ইহাই আত্ম-পরমাত্মার মিলনাকাঙ্ক্ষা। রাধিকা, মানবাত্মার রূপক ব্যাখ্যা; শ্রীকৃষ্ণ পরমাত্মার স্থানীয়। কৃষ্ণ-রাধিকা-প্রেমই, জীবাত্মা ও পরমাত্মার

যোগ। মনুষ্য, এই যোগ দাম্পত্য-প্রণয়েই শিক্ষা করে। জীবন-ভাগবতের দশমস্কন্ধেই এই যোগের ব্যাখ্যা। তাহা যেমন উচ্চ ও গভীর, তেমনি আবার সকলেরই আয়াস-লভ্য। স্বীয় জীবনে মিলাইয়া পাঠ করিলে ঐ ব্যাখ্যা সহজ; নতুবা উহা চির-কঠিনই রহিয়া যায়।

সংসারের পরিণয় দেহের পরিণয়। স্মৃতাং, তাহাতে আত্মযোগের লক্ষণ কম দৃষ্ট হয়। ঐ উদ্বাহে মনুষ্য নানা-প্রকার বিভীষিকা দর্শন করে। প্রজাবুদ্ধি-ভীতি জ্ঞানীদের মস্তককেও আন্দোলিত করে। কিন্তু, তাঁহারা তৎকালে ভাবেন না যে বিনাশ, বুদ্ধির সহগামী এবং যেখানে বিনাশ নাই, সেখানে বুদ্ধিরও আবশ্যকতা আছে; অথবা তথায় বুদ্ধিতে কষ্টের সম্ভাবনা নাই। যেখানে বিনাশ বুদ্ধির সহ-গামী, সেখানে ইন্দ্রিয়-সেবা-নিরত-দৈহিক উদ্বৃত্ত ব্যক্তিগণই সেই পাপের ফলভোগী। দৈহিক পরিণয়ের স্থলে আত্মার পরিণয় অধিষ্ঠিত হইলেই তথায় মঙ্গল। জ্ঞানবুদ্ধি সহকারে এই আত্মার পরিণয় সংঘটিত হয়।

সমাজে সমানে সমানেই বিবাহ প্রচলিত। ইহা সম্ব-রক্ষার উপায় বটে, কিন্তু সময়ে উন্নতির আশা অতীব কম। সাধারণতঃ ধনী-নির্ধনীর প্রকৃত সংযোগে একের দ্বারা অপরের উন্নতি। সমাপেক্ষা অসম সংযোগেই অধিক ফলাশা। ইহা আপাততঃ শ্রুতিকটুরূপে প্রতিভাত হইতে পারে; কিন্তু, স্বগোত্র-বিবাহ-নিষিদ্ধতার মূলে ঐ অসম-সংযোগের সফল প্রাপণাশাই প্রচ্ছন্নভাবে নিহিত রহিয়াছে। পাত্র-পাত্রীর নির্বাচনে শ্রেষ্ঠত্বের পক্ষপাতিত্বও ঐ ফল কামনা

বশতঃই হইয়া থাকে। পাত্র অপেক্ষা পাত্রীর শ্রেষ্ঠত্বে অধিক কল। কারণ, পুরুষই স্ত্রীর শক্তির দ্বারা প্রচলিত হইয়া উদ্যমশীল হয়।

প্রকৃত পরিণয়ে কোন ভয় নাই। অপ্রকৃত পরিণয়ে মাহুব নিজের ক্লেশ নিজে আনয়ন করিলে, তজ্জন্তু অপরের চিন্তারও প্রয়োজন নাই। সেই মহুষ্যের পক্ষে ঈশ্বরের বিধিই, দণ্ডবিধি হইবে। সেই দণ্ডবিধি-ভীতি যাহাদিগের জীবন-নিয়ামক নহে, তাহাদিগের জীবন সংসারের সাধারণ কীট-জীবন স্বরূপেই অবসান হইবে। প্রকৃত আত্ম-যোগ শিক্ষা কর, তাহাতে সংসারে সুখী এবং দেহান্তে মোক্ষপদ প্রাপ্ত হইবে। ইহাও কঠিন শিক্ষা নহে। স্বল্প-রাসেই মহুষ্য এই জ্ঞানলাভ করিয়াছে, এবং সকলের পক্ষেও ইহা সম্ভব জানিবে।

### ৪৭। ধনের অপব্যবহার।

দ্রব্যের অপব্যবহারে যাদৃশ ক্লেশ, অভাবে তাদৃশ নহে। প্রকৃত অভাব অল্প জনেরই, কিন্তু অপব্যবহার অনেকেরই। যাহার ধন আছে, তদ্ব্যবহারানভিজ্ঞতা তাহার ক্লেশের কারণ হয়। ঐ কারণেই, আবার যাহার ধনাভাব, তাহার ধনাগমেও ক্লেশ নিবারণ হয় না। বারি অজস্রধারে গগণ হইতে নিপতিত হয়, তথাপি বারিকণ্ট অশ্রুত ব্যাপার নহে। ইহাতে অনেক সময়ে ক্লিষ্ট ব্যক্তিগণেরই দোষ, অপন্ন কাহারও নহে।

বারি ও বিত্ত একই মূল আধার হইতে আগত। উভয়-কেই সঞ্চিত রাখিতে না পারিলে, মনুষ্যের অসময়েই কষ্ট। কথিত হইতে পারে পৰ্ব্বত-বাসীদিগের বারি-সঞ্চয়ের উপায় নাই; তদ্রূপ অভাব-যুক্ত ব্যক্তির পক্ষে বিত্ত সঞ্চয়ের আশা অতীব কম। কিন্তু পৰ্ব্বত বা উপত্যকায়ই নদীর উৎপত্তি, এবং ভূমি খননেই বারি উৎপন্ন হয়। ধনও ভূগর্ভে সৰ্ব্বদাই সঞ্চিত রহিয়াছে; পরিশ্রম সহকারে তাহা উত্তোলন করিতে পারিলেই অভাব মোচন হইয়া থাকে। মনুষ্য রাজ্য-বিপ্লবদির আশঙ্কা করে। বাস্তবিক রাষ্ট্র-বিপ্লবে সাধারণের বিত্ত হানি হয় বটে, কিন্তু রাজ-পরিবর্তনে দেশ বা ভূমি কখনও পরিবর্তন হয় না। ধন-ধাত্তাদি রাজা লইয়া যাইতে পারেন, কিন্তু ভূমি তাঁহার সঙ্গে কদাচ যাইবে না। স্মরণ্য, মনুষ্যের প্রকৃত রত্ন-ভাণ্ডার সৰ্ব্বদা তাহার স্বগৃহেই রহিল। সেই ভাণ্ডার হইতে রত্ন গ্রহণ করা মনুষ্যের আশ্রয়-সাধ্য। যাহার সে আশ্রয় নাই, তাহার কষ্টও নিজ-কার্য্য-ফল। স্মরণ্য, তজ্জন্ত কাহারও আক্ষেপ হইতে পারে না।

যাহারা বিত্ত-সংগ্রহ করিতে অক্ষম, তাহাদিগের কষ্টের জন্ত যেরূপ অপর কেহ দোষী নহে, তদ্রূপ মনুষ্যের অপব্যবহার-জনিত কষ্টের জন্ত কেবল সেই মনুষ্যই দোষী।

সংসারে অপব্যবহার নানা প্রকার। বিলাস-কাননাদি প্রস্তুত, ধনের অপব্যবহার বটে, কিন্তু ইহাতেও কতিপয় ব্যক্তির উপকার আছে। যাহারা সেই বিলাস-কানন প্রস্তুত করিল, তাহাদিগের অবশ্য তদ্বারা কিছু বিত্ত সংগৃহীত

হইল। তবে সেই বিলাসীর পক্ষে তদ্বিত্ত বিলাসেই অব-  
 সান হইল। সংসারে চিরকালই অনুৎপাদক দ্রব্যের আদর  
 নাই। বক্ষ্যা-বৃক্ষ গৃহীর অমঙ্গল। গৃহী তাহা উৎপাটন বা  
 বিনাশ করিয়া থাকেন। ইহা কুসংস্কার হইলেও সুসংস্কার ;  
 কারণ, যাহাতে ফল প্রসূত হইল না, তাহার রক্ষণ অবশ্যই  
 নিষ্প্রয়োজন। কিন্তু আক্ষেপ এই সংসারে অনেকগুলি  
 বক্ষ্যাবৃক্ষ আছে ; অল্প লোকেরই তৎপ্রতি দৃষ্টি নিপতিত  
 হয়। ব্যভিচারিণী-পোষণ যে একটা প্রধান বক্ষ্যা-বৃক্ষের পুষ্টি-  
 সাধন, ইহা কয়জন ভাবে ? জল নিক্ষেপে ধনের যাদৃশ অপ-  
 ব্যবহার, ব্যভিচারে ধনব্যয়ও তাদৃশ। যাহা ব্যয়িত হইল,  
 তাহাতে ব্যভিচারিণীর সাময়িক উপকার ভিন্ন কিছুই হইল  
 না। ধন, ধনের প্রসবিতা। ব্যভিচারিণীকে বিলাসী যাহা  
 অর্পণ করিল, সেই ব্যবসায় তাহার কোনই লাভাশা নাই।  
 ধনের উৎপাদিকাশক্তিকে সে নিজেই নষ্ট করিল। যদি  
 ধনের দ্বারা তোমার নিজ মঙ্গল সাধিত না হয়, তোমার  
 বুদ্ধির গৌরব কোথায় ? আত্মহস্তার যেরূপ হৃদশা, ধনাপ-  
 ব্যবহারী ব্যক্তিরও তাদৃশ ছর্গতি। তুমি সংসারের এবং  
 ভগবানের নিকট যুগপৎ অপরাধী হইলে। যাহাতে উভয়ের  
 আশীর্বাদ লাভ করিতে পার, তজ্জগুই সর্বদা চেষ্টিত হইবে।



### ৪৮। ঈশ্বরের অস্তিত্ব।

মনুষ্য ঈশ্বরাস্তিত্বের প্রমাণ অনুসন্ধান করে। গ্রন্থেও  
 প্রমাণ লিপিবদ্ধ হয়। মনুষ্য তাহা পাঠ করে। কিন্তু ঐ

প্রমাণে কয় জন সন্তুষ্ট ? চিনি বা ছুঁকের আশ্বাদ কি পুস্তক-পাঠে বা বর্ণনায় প্রাপ্ত হওয়া যায় ? নিজ জীবনে তাহা আশ্বাদ করিলেই মনুষ্য অভিজ্ঞতা লাভ করে। ঈশ্বর-স্তিত্বের কি প্রমাণ চাহিবে ? স্বজীবন-ঘটনাবলী পাঠ কর ; দেখিবে, চারিদিকেই গণিত-বিজ্ঞানের মিল। এ অভাবনীয় মিলন কি আপনি সংঘটিত হইল ? জগতের অমঙ্গল ঘটনায় মনুষ্য স্তম্ভিত হইল ; অনৈসর্গিক ব্যাপার বলিয়া তাহা উল্লিখিত হইল। কেহ বা তাহাতে ঈশ্বরের অস্তিত্ব পর্য্যন্ত অস্বীকার করিল। ক্ষুদ্র মনুষ্য সামান্য সংসার-বিজ্ঞানে নিজ অনভিজ্ঞতা স্বীকার না করিয়া বিজ্ঞানেরই ভুল ধরিল। বাদ্যযন্ত্র বাজাইতে জানিলেই তাহা হইতে তান-লয়যুক্ত সূস্বর নিঃসৃত হয়। তানপুরার ব্যবহার যে পরিজ্ঞাত নহে, তাহার নিকট উহা কেবল পরিত্যাগোপযোগী অলাবু ও কাঠখণ্ড মাত্র। তবে ব্যবহার-পরিজ্ঞতা-লাভ করাও ছুঃসাধ্য নহে। উহা সামান্য সাধনের বিষয়। তানপুরার একটা গং বাহির করিতে পারিলেই, উহার তারে তারে, পরদায় পরদায়, মনোহারিত্ব দর্শন করিবে।

মনুষ্যজীবনও একটা তানপুরাযন্ত্র। ইহার সুরে সুরে মিল। ঠিক স্থান ধরিয়া বাদ্য আরম্ভ কর, দেহালাবু-মধ্য হইতেই সূক্ষ্মীত নির্গত হইবে। ক্রমশঃ ঐ সঙ্গীতে ব্যুৎপত্তি জন্মিলে যন্ত্র-নির্মাতার গুণ সহজেই তোমার নিকট প্রকাশিত হইবে। ভগবানের অস্তিত্ব কি প্রমাণে জানিতে হয় ? প্রমাণে স্থিরীকৃত করিতে হইলে অগস্ত্য-মুনির ক্ষমতা প্রাপ্ত হওয়ার প্রয়োজন। গওঁষে সমুদ্র-শোষণ করিতে পারিলে,

ঈশ্বরাস্তিত্বেরও প্রমাণ নিঃশেষিত করিতে পারিবে। কিন্তু জাহ্নবী এক জহ্নুমুনির উদরস্থ হইয়াছেন নাই। তাহা পুনশ্চ সেই উদর হইতে নিঃসৃত হইয়া সাধারণের সম্পত্তি হইয়াছেন। ঈশ্বরাস্তিত্ব আয়ত্ত করাও সাধারণের ক্ষমতার অধীন। গঙ্গাজলের মহিমা তৎসলিল-সেবিগণই পরিজ্ঞাত। ঈশ্বরকে হৃদয়ে ধারণ কর, তাঁহার মহিমা আপনিই তোমার নিকট প্রকাশিত হইবে। ইহাতে পাণ্ডিত্যের প্রয়োজন নাই। সরলাস্তঃকরণে এবং পূর্ণ-বিশ্বাসের সহিত ভগবল্লীলা আপন জীবনে দর্শন কর, ভগবৎরূপা প্রাপ্ত হইয়া সুখী হইবে। ঈশ্বরের রাজ্যে অমঙ্গল যুচিয়া যাইবে। তথায় নাস্তিকতার স্থান নাই। শিব-প্রদেশে সমস্ত শিবময় দর্শন করিয়া চরিতার্থ হইবে।

আপন জীবনে ভগবল্লীলা দর্শন করিতে পারিলেই অপর জীবনে এবং তৎসহ সমস্ত জগতে ঐ লীলা দর্শন করিবে। স্বজীবনে মহাভারতগ্রন্থের রচনা হইবে। ঐ গ্রন্থের পরিসমাপ্তি স্বর্গারোহণ। সকলের জীবনও ঐ স্বর্গারোহণে পরিসমাপ্ত হইবে।

### ৪৯। ধনসঞ্চয় ।

মহুঘোর ধনসঞ্চয় অজাগরের ভোজন সদৃশ ; ইহা তাহার আবশ্যক হইলেও সে উহাতে আত্মবশ্ততা হারাইয়া থাকে। অথবা ইহা মোদকের মিষ্টান্ন-পাক সদৃশ ; পাক প্রস্তুতই পাচকের রুচি পূর্ণ হইল, পরে মিষ্টান্ন যাহাদিগের উপভোগ্য,

তাহারাই তাহা ভোগ করিল। বিত্তসঞ্চয় করিয়া তাহা দায়াদের জন্য রাখিয়া যাইতে পারিলে মন্দ নহে। তাহাতে পরলোকগত আত্মা প্রকৃত শ্রদ্ধা প্রাপ্ত না হইলেও অবশ্য লৌকিক শ্রদ্ধাভোগীও হইয়া থাকেন। সময়ে ইহাতে তৎ-প্রতি দায়াদগণের প্রকৃত শ্রদ্ধাও উপজাত হইতে পারে। কিন্তু ঐরূপ শ্রদ্ধালোভে ধনসঞ্চয় গরীয়ান্ নহে। সঞ্চিত বিত্ত রাখিয়া গেলে, দায়াদগণ তাহা পাইয়া হর্ষিত হইল। কিন্তু সে হর্ষ ছিন্ন-মস্তক-দর্শনে শোণিত-পিপাসু কবন্ধের আনন্দ সদৃশ। পিতার অসতুপায়ার্জিত ধনের উত্তরাধিকারী হইলে পুত্র ধন্য হইল বটে, কিন্তু তাহাতে পিতার নরক-যন্ত্রণা শেষ হইল না। পিতার প্রেতবোধে পুত্রই ধন্য হইল। ঐ ধন্যতা বাঞ্ছনীয় নহে। বিত্ত আর বল, আপনি আসিলেই তাহা আদরের সামগ্রী। যেমন নর-শোণিত পান দ্বারা রাক্ষসের তুল্য বল প্রাপ্ত হওয়া প্রকৃত হইলেও, ঐ শোণিত-পানেচ্ছা অতি গর্হিত, অবৈধ ধনসঞ্চয়ও তদ্রূপ নিন্দনীয়। একই ছুর্গতিনাশিনীর আরাধনায় সংসারী যেরূপ লক্ষ্মী গণপতি প্রভৃতিকেও প্রাপ্ত হইয়া থাকে, সেইরূপ ভগবৎপূজায় তুমি একাগ্রমনু হইলে সকলই প্রাপ্ত হইবে। তৎকালে লক্ষ্মী তোমার গৃহোপগতা হইলে তিনি ত্যজনীয় নাহেন। ত্যাগেই ঈশ্বর-প্রসন্নতা হইতে বঞ্চিত হইবে।

পার্থিব বিত্ত-সংগ্রহ সকলের পক্ষে সম্ভব নহে। উহাতে সর্ব্বদা অনেক বিঘ্ন। ঈশ্বরানুকম্পার উপর একান্ত নির্ভর করিলে আত্ম-সন্তোষ লাভেই সুখী হইবে। আত্ম-সন্তুষ্টি-চিত্ত ব্যক্তির বিভ্রাভাবেও অসুখ নাই। সেই কারণে প্রকৃত



উদাসীন ধনমুষ্টিকে ধূলিমুষ্টি জ্ঞান করিতেও সক্ষম । পুনশ্চ, ঐরূপ ব্যক্তিরই আবার ঔদাসীন্য-বাছমন্ত্রে তাহারই হস্তে অনেক সময়ে ধূলিমুষ্টিই ধনমুষ্টির আকারে পরিবর্তিত হয় ।

পাথিব বিত্ত সঞ্চয় হইল না, তাহাতে ক্ষতি কি ? জীবন রত্ন লাভ করিতে যত্নবান্ হও, বিত্ত অপেক্ষাও অমূল্য রত্ন প্রাপ্ত হইবে । দায়াদগণও তাহাতে প্রকৃত ধন-বস্ত হইবে । “বিত্ত সঞ্চয় হইল না, জীবনলীলা শেষ প্রায় ” ইহা সংসারীর বিলাপ । বৈরাগীও গাইল “জীবন-তরি ভাটায় বই আর উজায় না”, ইহাও প্রকৃত বৈরাগীর গীতি নহে । একের সম্পূর্ণ নিরাশা; দ্বিতীয়ের আশা সত্ত্বেও নিরাশা প্রাপ্তি । ইহাতে উভয়েরই দোষ । সংসারী সং-জীবন, এবং বৈরাগী জীবনোদ্যম রাখিয়া যাইতে পারিলেই ভবিষ্যৎ বংশীয়গণ সুখী হইবে । তরি বাহিলেই উজাইবে, তবে নিরুৎসাহ কেন ? তোমার বিত্ত সঞ্চয় না হইলে সন্দৃষ্টান্ত এবং বৈরাগীর উদ্যম দেখাইয়া যাও, তোমার সন্তান-সন্ততিগণ ঐ ধনঘরের অধিকারী হইতে পারিলেই যেমন তুমি সুখী, তেমনি তাহারাও সুখী হইবে ।

সংসারীর তৃতীয় ধন, জীবন-পঞ্জিকা-সঙ্কলন । পাথিব-বিভব-সঞ্চয়ে সকলের ক্ষমতা নাই, কিন্তু এই জীবন-পঞ্জিকা-সঙ্কলন কাহারও অসাধ্য নহে । এই পঞ্জিকা-সঙ্কলনে সংসারীর আপন জীবনে যেমন নিজ ক্রমোন্নতি হইবে, তাহার অবর্তমানে তাহার সন্তান-সন্ততিরও তাহাতে বিশেষ উপকার উপজাত হইবে । পঞ্জিকায়ই শুভাশুভ নির্দাচন হয় । এই জীবন-পঞ্জিকায় ভবিষ্যৎ বংশাবলী আপনাদিগের শুভা-

শুভ দর্শনে স্মৃথী হইবে। নিত্য এই জীবন-পঞ্জিকা-সঙ্কলন কর, সংজীবন লাভ হইবে এবং তাহাতে উদ্যমশীলতাও অভিজাত হইবে। এই তিনে যেমন নিজের উপকার ; ভবিষ্যতেরও তাহাতে প্রকৃত উপকার সাধিত হইবে।

### ৫০। পিতা-মাতা এবং সন্তান-সন্ততি।

সংসারের এমন কোন্ সামগ্রীর অভাবে সসাগরাধিপ সম্রাট এবং অতি দীন দরিদ্র বৃক্ষ-তল-বাসী ভিক্ষুক সমান কাতর ও দুঃখিতমনা। পৃথিবীতে মাতৃস্নেহ যে জীবনে সম্ভোগ করিয়াছে, সেই সে সামগ্রীর বিষয় পরিজ্ঞাত। এই বস্তুটা হারাইয়া কাহার না হৃদয়, প্রবাসেই হউক আর স্বগৃহেই হউক কোন না কোন সময়ে যেন কি একটা অভাবনীয় অভাবের জন্য কাতর হইয়াছে! অনেক সময়ে অজ্ঞান-বালকের মত সে হৃদয় সেই অভাবের নির্দেশ করিতে পারে না। কিন্তু আবার কখনও বা জ্ঞান-ফুরণে সে হৃদয় সেই অভাবটা জানিয়া পরে নির্জনে অশ্রু বিসর্জনে শান্তি উপভোগ করিয়াছে। মাতার স্বর্গীয় স্নেহ স্বরণে যেমন প্রাণ আকুলিত হয়, তচ্চিত্তনেই আবার শান্তি স্বভাবতঃই হৃদয়ে উদ্ভূত হইয়া থাকে। কেন যে ঐ সময়ে ঐরূপ শান্তি উপস্থিত হয়, তাহা সাধারণ মনুষ্য বুঝে না; সে শান্তি উপভোগ করিয়াই ছুঃখাবসান করিল, কারণের কেন সে অনুসন্ধান করিবে। মাতার আত্মা তাহা জানেন; তজ্জন্য তিনি পুত্রের অপরাধ গ্রহণ করেন না। পুত্রকে

কাতর দেখিলেই তাহার নিকট তাঁহার সাঙ্ঘনা আপনিই উপস্থিত হয়। সেই জন্য দুঃখ-বিপদকালে মনুষ্যের অজ্ঞাত-সারেই তৎসমীপে ভগবদাশ্বাসবাণী স্বতঃই উপনীত হয়। মনুষ্য তাহাতেই শাস্তি অনুভব করে। ঈশ্বর তৎকালে মাতৃরূপে মনুষ্য-হৃদয়ে আবিভূত হন। কিন্তু তাহাকে পিতারূপেও অন্তরে ধারণা করা মনুষ্যের একান্ত প্রয়োজন। মাতার সাঙ্ঘনা-বাক্যে হৃদয়ভার কমিল বটে, কিন্তু পিতৃ-বলেই মনুষ্য বলীয়ান্। মাতা এবং পিতার প্রতি যে পুত্রের যুগপৎ ভক্তি এবং শ্রদ্ধা, সেই পুত্রই সংপুত্র এবং চিরসুখী। ঈশ্বরকে তুমি হৃদয়ে নিত্য পিতা এবং মাতা-রূপে ধারণ করিতে পারিলে, সংসার কখনও তোমার নিকট অরণ্যবৎ প্রতীয়মান হইবে না। তুমি স্বয়ং দেবাত্মজ এই জ্ঞান তোমার জন্মিলে, সকলকেই তুমি দেবসন্তানরূপে দর্শন করিয়া কৃতার্থ হইবে, এবং সকলের সহানুভূতিও তোমার প্রতি অবাচিতরূপে প্রবাহিত হইবে। এই অবস্থায় উপনীত হওয়া সহজ। তবে মনুষ্য কেন এই সুখ হইতে বঞ্চিত? সে পিতা-মাতা হইতে বিচ্ছিন্ন বলিয়াই তাহার এই দুর্গতি। দেবাত্মজ যীশু বলিয়াছেন যে, ভ্রাতৃসহ সন্মিলিত হইতে না পারিলে পিতার সহিত সন্মিলিত হওয়া অসম্ভব। ইহাই যোগের মূলমন্ত্র। পিতা-মাতা হইতে বিচ্ছিন্নতা উপস্থিত হইলে, ভ্রাতৃসহ যোগ স্থাপনেই সেই অপরাধ মার্জিত হয়। ব্রহ্মপুত্রাবগাহনে পরশুরামের মাতৃহত্যাপরাধ বিনষ্ট হইয়াছিল। প্রত্যেক মানবই পরশুরাম। পুত্র, পিতা-মাতার বিরুদ্ধে শতাপরাধী। ভাই-ভগিনীদিগের মধ্যে প্রেম ও

মিলিতভাবে দর্শনেই পিতা-মাতার আনন্দ । অবাধ্য পুত্রের প্রতি তাঁহাদিগের ক্ষোভের কারণ থাকিলেও তাঁহারা সেই সন্তানের প্রেম দর্শনেই সুখী ; সুতরাং তাহার অপরাধ স্বতঃই মার্জিত হইল । ঈশ্বরের বিরুদ্ধে মনুষ্যের কৃতাপ-রাধও ঐরূপে মার্জিত হয় । ব্রহ্মপুত্রে অবগাহনই ব্রহ্ম-সন্তানসহ পূর্ণ সম্মিলন । ইহাই মানবের মাতা-পিতৃ-হত্যাপ-রাধের একমাত্র প্রায়শ্চিত্ত ।

“আত্মা বৈ জায়তে পুত্রঃ” ইহা যেমন প্রাকৃতিক, তেমনি আধ্যাত্মিক সত্য । পুত্ররূপে পিতা জন্ম গ্রহণ করিলে, পিতা ও পুত্রের স্বতন্ত্র স্থায়িত্ব উপজাত হয় । পুনশ্চ, পুত্রের আত্মযোগবলে যখন তাহার পুত্রত্ব তিরোহিত হয়, তখনই পিতা পুত্রের পূর্ণ একত্ব সঙ্গাত হয় । ইহাই পুত্রের “সোহং” জ্ঞান । ভ্রাতৃসহ পূর্ণযোগ স্থাপনেই এই পিতৃযোগ সংসাধিত হয় । ঐ পিতৃযোগই মানবের নির্বাণ-মুক্তি ।

সংসারী মনুষ্য জ্ঞাতি অথবা সহোদরকেও পরিবর্জন করিয়া পিতৃশ্রদ্ধ অথবা পিতৃতর্পণে ব্রতী হয় । ইহা বৃক্ষের শাখা ছেদন করিয়া বৃক্ষের মস্তকে জলসিঞ্চন সদৃশ । শাখা না থাকিলে বৃক্ষের শোভা কোথায়, অথবা সেই বৃক্ষের নিকট তোমার ফল-প্রত্যাশাও বৃথা । ভ্রাতা-ভগিনী সহ চিরস্নেহযোগে যুক্ত হইলেই তুমি চিরদিন পিতা-মাতার আশীর্বাদ প্রাপ্ত হইবে, নতুবা অশাস্তিতেই তোমার দিন অবসান হইবে । জনক-জননীর আশীর্বাদ তুল্য সংসারে আর কি আছে ? তাঁহাদিগের আশীর্বচনই “অমোঘাঃ ব্রাহ্মণাশিষঃ” ।

স্বয়ং ব্রহ্মই তাঁহাদিগের মুখ হইতে সেই আশীর্কচন নিঃসৃত করেন। তজ্জন্মই উহার ফল অব্যর্থ। সময় থাকিতে প্রকৃত দ্রব্যের সম্মাননা শিক্ষা করিবে, নচেৎ তাহা চলিয়া গেলে আক্ষেপের আর পরিসীমা থাকিবে না। পিতা-মাতার তুল্য পরম উপকারী বন্ধু সংসারে আর কে আছেন? অতএব সর্বদা সর্বাণ্ডঃকরণে তাঁহাদিগের সেবা করিবে। ইহাতে যেমন তাঁহাদিগের আশীর্কাদ, ঈশ্বরেরও আশীর্কাদ প্রাপ্ত হইয়া তুমি সর্বতোভাবে সুখী হইবে।

### ৫১। সত্য ।

সংসারে এমন কি আছে, যাহা চিরদিন নূতন, অথচ চিরদিন পুরাতন; যাহার বর্ণের কোন পরিবর্তন নাই, অথচ নূতন রঙে অনুরঞ্জিত হইয়া না আসিলে সহজে গৃহীত হয় না; যাহা চিরদিন আদৃত, অথচ অনাদৃত; এবং যাহাকে পাইবার জন্ম বিবাদ, অথচ পাইলেও বিবাদ নিরস্ত হয় না? সত্যই সেই সামগ্রী, যাহারা তাহা চান, তাঁহাদিগের নিকট উহা যেমন পুনঃ পুনঃ নূতন ভাবে উপস্থিত হয়, যাহারা না চান, তাঁহাদিগের নিকটেও উহার সেই ভাবে উপস্থিতির প্রয়োজন। সাধক ঈশ্বর-তত্ত্বানুসন্ধান প্রবৃত্ত হইলে তাহার উদ্যম-বর্ধন এবং চিন্তা-বিনোদন জন্ম তৎসমীপে যেক্রম ভগবৎবাণী নিত্য নূতন আকারে উপস্থিত হয়, ভোগবিলাসী সংসারী নূতনই না পাইলে সত্য গ্রহণে সঙ্কুচিত হয় বলিয়া তাহার নিকটেও সেইরূপ ঐ বাণী

সাধক-হৃদয়-বিনির্গত নূতন আকারে উপস্থিত হইয়া  
 এক। সেই এক সত্যে, গৃহী এবং সন্ন্যাসী উভয়ে  
 বিশ্বাস হন।

নূতন সত্য বা নূতন বাণীর আবির্ভাব হইলে সংসারি-  
 গণ মহা কোলাহল করে। কেহ বলে “উহা আমাদের  
 সত্য, অপরের মুখে উহা অপহৃত ধন মাত্র”। কেহ বা  
 তজ্জন্মই ঐ সত্যের অবমাননা করিতেও কুণ্ঠিত হয় না।  
 এই কোলাহলে অনেক সময়ে নানা অনর্থ উপস্থিত হয়।  
 এই কোলাহলে ভ্রাতৃ-বিরোধ এবং সংসার বিপ্লবও সংঘটিত  
 হয়। কিন্তু ভ্রাতৃ মনুষ্য বুঝে না যে যাহা সত্য, তাহা  
 ভগবদ্বাণী, উভয়ই এক। কেবল কালের প্রয়োজনীয়তানুসারে  
 সেই এক সত্য ভিন্ন ভিন্ন আকার ধারণ করে। সত্যের  
 নূতন পরিচ্ছদই সত্যের নূতনত্ব। পুরুষোত্তম এক, তবে  
 সময়ে সময়ে সেবকদিগের চিত্তরঞ্জন জন্ম প্রকাশ্যতঃ নূতন  
 কলেবর মাত্র ধারণ করেন। যুগে যুগে সাধক মহাপুরুষগণ  
 সত্যকে নূতন পরিচ্ছদে বিভূষিত করিয়া তাহা জনসমাজের  
 সমক্ষে উপস্থাপিত করেন। সূচতুর সংসারী তাহা গ্রহণ  
 করিয়া কৃতার্থ হয়। আর অজ্ঞানী ব্যক্তি ভগবৎ-রূপা  
 প্রদত্তধন সম্মুখে প্রক্ষিপ্ত হইলেও তৎকালে ইচ্ছাক্ত হইয়া  
 কেবল সেই সত্যধনকেই এড়াইবার জন্ম চক্ষু মুদিত করিয়া  
 চলিয়া যায়। এই প্রকার ব্যক্তিই স্বয়মুপস্থিতা লক্ষ্মীকে  
 উপেক্ষা করিয়া চিরতুঃখে নিমগ্ন থাকে।

ভগবানের সাকারত্ব এবং নিরাকারত্ব লইয়া আজও  
 পৃথিবীতে মহা হলস্থল। কিন্তু বিতণ্ডা কেন? “সাকার”ও

মনুষ্য-বাক্য এবং “নিরাকার”ও মনুষ্য-বাক্য। যদি তুমি প্রকৃত সাধক হও, সাকারে এবং নিরাকারে তোমার নিকট ত কোন প্রভেদ নাই। আর যদি তোমার সাধনা অতোহধিক উচ্চ না হইয়া থাকে, তোমার নিকট “সাকার” এবং “নিরাকার” উভয়েই সমান, অর্থাৎ তুমি উভয়েরই প্রকৃতির বিষয় অনভিজ্ঞ। ভক্তগণ হৃদয়ের ভাবোচ্ছ্বাসে ঈশ্বর সম্বন্ধে অনেক গুণ-বাচক শব্দ প্রকাশ করিয়াছিলেন। আবার তাঁহারা সেই ভাবোচ্ছ্বাসে বাক্যাদি বিরহিত হইয়া পরিণামে এক ভাবেই বিহ্বল হইয়া কেবল চিন্ময়ে বিলীন হইয়াছিলেন। সেই ভক্তেরা “দুর্গা” “হরি” প্রভৃতি স্তমধুর শব্দে ঈশ্বরকে ডাকিয়াছিলেন, এবং ঐ ঐ নাম-প্রকাশিতরূপেও মোহিত হইয়াছিলেন। সেই মহাত্মাদিগের ভাবগ্রাহী হৃদয়োখিত রূপকে তোমার নিজ ঈশ্বর করিতে পারিলে তোমার বিশেষ মহত্ব, সন্দেহ নাই। কিন্তু সাধারণ মানবের সে ক্ষমতা কোথায়? সেই মহাপুরুষেরা যে উপকরণ লইয়া তাঁহাদিগের ঈশ্বরকে আঁকিয়া ছিলেন, সেই সমস্ত উপকরণ তোমাকে প্রদত্ত হইলে তুমি সেইরূপ ঈশ্বর আঁকিতে বা গঠিতে পারিবে না। তোমার সামর্থ্য এবং তাঁহাদিগের সামর্থ্য অবশ্যই স্বতন্ত্র। সাধারণ মানবের জ্ঞান প্রতিমূর্ত্তি নহে; অথবা প্রতিমূর্ত্তি সাধনের সোপান নহে। যাহারা এইরূপ মনে করিয়াছেন, তাঁহারা বৃক্ষে না উঠিয়াই তৎবৃক্ষ-ফল পাইয়াছেন মনে করিয়া ভ্রমাকুলিত হইয়াছেন। সাধনের উচ্চ শিখরে আরোহণ করিলে পর, তথায় সাধক নিজ অভীপ্সিত দেবের দর্শন পান। তথায়

তঁাহার ঈশ্বর এবং তোমার ঈশ্বর এক হইলেও স্বতন্ত্র। এই স্বাতন্ত্র্যেই আনন্দ, এবং উহাতেই মুক্তি। এইরূপে এক অর্থে প্রত্যেক মনুষ্যের ঈশ্বর স্বতন্ত্র ঈশ্বর।

ভাবোচ্ছ্বাস এবং বাক্যোচ্ছ্বাস দুই স্বতন্ত্র সামগ্রী। সাধক যাহা ভাবে একরূপ অনুভব করিয়া বিহ্বল হয়েন, তাহা হয় ত তিনি পরে বাক্য প্রকাশ করিতে অশ্লিষ প্রকটন করেন। ইহা জীবনের নিত্য ব্যাপার। ইহা কোনও সাধকের অবিত্ত নহে। দার্শনিক পণ্ডিত-প্রবর বহেম\* আপন গ্রন্থ মধ্যে একটা হৃদয়-প্রতিকৃতি বিভাসিত করিয়াছিলেন। কিন্তু তাহা তঁাহার শিষ্যগণের বোধগম্য হয় নাই। যখন তিনি মৃত্যুশয্যায় শয়ান, তখন তঁাহার শিষ্যগণ তৎসমীপে উপস্থিত হইয়া সেই প্রতিকৃতির ব্যাখ্যা জিজ্ঞাসু হইলেন। অনেকক্ষণ চিন্তার পর পণ্ডিত-প্রবর বলিলেন “আমি যখন উহা লিখিয়াছিলাম তখন বুঝিয়াছিলাম, এবং নিঃসন্দেহ সর্বজ্ঞ ঈশ্বরও উহা বুঝিয়াছিলেন; তিনি অদ্যাবধি উহা স্মরণ রাখিতে পারেন, কিন্তু আমি তাহা বিস্মৃত হইয়াছি।” বিজ্ঞবর বহেমের ইহা রহস্য বা ভ্রম বাক্য নহে। প্রত্যেক সাধকেরই এই অবস্থা উপস্থিত হইতে পারে। ভাবার অপরিষ্কৃততা হেতু তৎপ্রকটিত হৃদয়-ভাব অপরিষ্কৃত হইতে পারে; অথবা তাহা সকলের বোধ-গম্য না হইতে পারে। স্মরণ্য তাহার ব্যাখ্যা স্বতন্ত্র ব্যক্তির নিকট স্বতন্ত্র হওয়া বিচিত্র নহে। এমন মুনি নাই



যাঁহার মত পৃথিবীতে অশ্রুতরূপে ব্যাখ্যাত না হইতে পারে।  
এই জন্তই কথিত হইয়াছে:—

“ বেদাঃ বিভিন্নাঃ শ্রুতয়ো বিভিন্নাঃ  
নাসৌ মুনির্ষশ্রু মতং ন ভিন্নম্ ।  
ধর্মশ্চ তত্ত্বং নিহিতং গুহ্যায়ং  
মহাজনো যেন গতঃ সঃ পস্থা ॥ ”

মহামুনি ব্যাসদেব বেদাদি শাস্ত্রের মহত্ত্ব প্রচার করিতে গিয়া অতীব আশ্চর্য্য কথা বলিয়াছিলেন। তিনি কি কয় বেদ বা কয়খান শ্রুতি জানিতেন না, এবং জানিয়াও কি তাহাদের সমন্বয় সম্পাদন করিতে সমর্থ ছিলেন না? তবে কেন তিনি বেদ এবং শ্রুতি অপেক্ষা মহাজনদিগের আচ-  
রিত পন্থাকে শ্রেষ্ঠ বলিলেন, এবং সেই স্মসংবাদ ভগবৎ-  
পিপাসু জীবের নিকট প্রকাশ করিলেন? মহর্ষি ব্যাসদেব-  
মুখ-নিঃসৃত উপরোক্ত ঐশ্বাক্যগুলির রহস্য অতীব গভীর।  
বেদ অর্থাৎ জীবন-বেদ বা ঈশ্বর-তত্ত্বজ্ঞান, প্রতি মানব-হৃদয়ে  
প্রচারিত হয়, কিন্তু তাহা এক মূল হইতে আগত হইলেও  
মনুষ্যের গ্রহণ শক্তি অনুসারে ভিন্ন ভিন্ন প্রকার; এবং  
শ্রুতি অর্থাৎ ঈশ্বরবাণী সকলেরই কর্ণে শ্রুত হইলেও তাহা  
প্রতি মনুষ্যের ভিন্নতানুসারে ভিন্ন ভিন্ন রূপে প্রকাশিত হয়;  
মুনি বা সাধকদিগের হৃদয়েই সেই বেদের পূর্ণ প্রকাশ  
এবং তাহাদিগের কর্ণেই সেই ভগবৎবাণীর পূর্ণ আবির্ভাব।  
কিন্তু ঐরূপ হইলেও তাঁহারা যে ভাষায় সেই বেদ বা

বাণীর প্রচার করেন তাহা মানবীয়। স্মৃতরাং ভাবার খর্বতা বা অপূর্ণতা নিবন্ধন এবং কালাহুসারেও তাঁহাদিগের মত বিভিন্ন হয়। কিন্তু ধর্মের যে প্রকৃত তত্ত্ব তাহা মহাজনদিগের হৃদয় গুহাভ্যন্তরে নিহিত; অতএব সেই মহাজন অর্থাৎ ঈশ্বরে পরাভক্তিযুক্ত মহাপুরুষেরা যে পথে গমন করেন, সেই পথই পথ। বাস্তবিক তাহারা আবার কাহার প্রদর্শিত পথে গমন করিবেন? তাঁহারা নিত্য ঈশ্বর প্রদর্শিত আপন আপন পথেই গমন করেন। তাঁহাদিগের সমস্ত কার্যই ঈশ্বর প্রণোদিত, স্মৃতরাং যে পথেই তাহারা যান সেই পথই পথ। এইরূপে সাকার নিরাকারের বিতণ্ডা, মানবীয়-শব্দ-প্রচারিত মতের ভেদাভেদ, ব্যাসদেব একটা কথাতেই নিঃশেষিত করিলেন। দেবায়ুজ যীশুও আপনাকে পছন্দ-স্বরূপে নির্দেশ করিয়াছিলেন। তিনি বলিয়াছিলেন “আমিই পছন্দ।” মহামুনি ব্যাস, যাহা শত সহস্র বৎসর পূর্বে বলিয়াছিলেন, পরে মহাত্মা যীশু সেই সত্য প্রচার করেন। তবে সত্যের আকার মাত্র বিভিন্ন, কিন্তু মূল একই। উহাদিগের মধ্যে কেহই অনাদরের বস্তু নহে। সত্য বখন যে পথ দিয়া আসে, তাহাই মনুষ্যের গ্রহণীয়, এবং তাহাতেই তাহার উপকার এবং পরিণামে মুক্তি।

## ৫২। অনুরোধ ।

লোকে উপরোধে উদ্বুদ্ধল গলাধঃকরণ করিতে সমর্থ, এইরূপ কখন কেহ বিজ্ঞপচ্ছলে অপরকে বলিয়া থাকেন।

ইহা বাস্তবিক বিজ্ঞপবাক্য বটে; কিন্তু অনেক সময়ে মনুষ্য অমুরোধের বশবর্তী হইয়া উদুখল গলাধঃকরণ অপেক্ষা আরও অধিক অসম্ভব কার্যও করিয়া থাকে। ললনার অমুরোধে সংসারাসক্ত ব্যক্তি বাতুলবৎ আচরণ করিতেও কুণ্ঠিত হয় না। জ্ঞানীর জ্ঞানও তৎকালে ললনার ফুৎকারে উদ্ভীন হইয়া যায়। অজ্ঞানীর কথা ত বহুদূর। সংসারে এই অমুরোধ মূলে অনেক সময়ে নানা বিশৃঙ্খলা সংঘটিত হয়। প্রকৃত ধীমানই সৰ্বদিক বজায় রাখিয়া চলিতে পারেন।

উপরোধ অনিষ্টকর বলিয়া উহাকে কেহ একেবারে পরিবর্জন করিতে চেষ্টাশ্রিত হইতে পারে, কিন্তু উহা পরিবর্জনীয়ও নহে। অনুচিত সময়ে যেমন অমুরোধের দাস হইলে উন্মাদ-আখ্যা প্রাপ্ত হইতে হয়, তেমনি আবার উপযুক্ত সময়ে উহার সম্মাননা না করিলেও মনুষ্য “গোঁয়ার” নামে অভিহিত হয়। ঈশ্বরের রাজ্যে তাঁহারই বৈচিত্র্য প্রদর্শনের জন্ত নানা প্রকার অভাবযুক্ত ব্যক্তি অবস্থিতি করিতেছে। তোমার সহৃদয়তার উদ্ঘাটনের জন্ত অমুরোধ বশবর্তিতা-গুণ তোমার প্রকৃতিমধ্যে নিহিত হইয়াছে। ঐ প্রকৃতির এককালে বিরোধী হওয়া তোমার কর্তব্য নহে। তবে ঐ প্রকৃতি বিস্কুরিত হইতে দিবার জন্ত প্রকৃতাভাবকাশ সম্বন্ধে তোমাকে অভিজ্ঞতা লাভ করিতে হইবে। সেই প্রাজ্ঞতা-লাভও দুরূহ নহে। সত্য তোমার জীবনাশ্রয় হইলে, তুমি সত্যের সহায়তা করিতে ভ্রমাকুলিত বা বিপদগ্রস্ত হইবে না। ঐ অবস্থায় অমুরোধ-প্রার্থী তোমার দ্বারে উপস্থিত হইলে, তুমি তাহার প্রার্থনার সত্যাসত্যতা এবং তুদীয়

প্রার্থিতানুরোধের সাফল্য-সম্ভব-পরতা যুগপৎ আপনিই বুঝিতে পারিবে। তুমি সত্য-প্রেমিক হইলে, লোকও তোমার স্বভাব পরিশ্রুত হইয়া অযথানুরোধ প্রদানে তোমাকে প্রলুব্ধ করিবে না।

কাহারও নিকট কোন বিষয়ে অনুরোধের প্রার্থী হইলে, যেমন অযথা প্রার্থনা দ্বারা অনুরোধ-দাতা লজ্জিত না হন ইহা প্রার্থনাকারীর সর্বদা স্মরণ রাখা কর্তব্য, তেমনি অশ্রা-য়ানুরোধ দ্বারা অনুরুদ্ধ ব্যক্তিকে লজ্জায় নিপতিত না করেন ইহা ঐ অনুরোধকারীও সর্বদা লক্ষ্য রাখিবেন। তোমার কৃতানুরোধে একের উপকার হইতে পারে বটে, কিন্তু তথাচ উপরোধাদিকরণে বিশেষ সাবধান হইবে। হয় ত যে জন্ত তুমি উপরোধ করিতেছ তাহা ইতিপূর্বেই অন্তরূপ মীমাংসিত হইয়া গিয়াছে। অতএব দৃঢ় অনুরোধ দ্বারা কাহাকেও বাধ্য করিতে চেষ্টা করিবে না। আর যদি তাহাই কর, অনুরোধের নিষ্ফলতা দর্শনেও বিমর্ষ বা দুঃখিত হইবে না। অযথা ভাবাধীনতাই\* দুর্বল-হৃদয়ের অনিষ্ট করে। কাহাকে কোন বিষয়ে অনুরোধ করিলে বা কাহা কর্তৃক কোন বিষয়ে অনুরুদ্ধ হইলে, ঐ ভাবা-ধীনতা দ্বারা আপনি বিচঞ্চলিত হইবে না। অনুরোধের সাফল্য হইলে সর্বাগ্রে ঈশ্বরকে এবং তৎপর দাতাকে ধন্য-বাদ প্রদান করিবে; এবং কাহারও অনুরোধ রক্ষা করিতে অসমর্থ হইলে, ঈশ্বরের নিকট ক্ষমতা প্রার্থনা করিবে,

এং অমুরোধকারীর নিকট বিনীত হইবে। স্নময়ে তোমার প্রার্থনা এবং বিনয়ের স্ন-পুরস্কার দেখিলে তুমি স্মখী হইবে।

### ৫৩ । ক্ষমতা ।

পিপীলিকার পক্ষোদগম হইলে সে বিহগ তুল্য আকাশে উড্ডীন হয়; কিন্তু অনতিবিলম্বেই সে বিহগগণ কর্তৃক বিনষ্ট হইয়া আপন কীটলীলা সম্বরণ করে। মনুষ্যও যখন নিজ ক্ষমতায় স্ফীত হইয়া আপন অধিষ্ঠিত স্থান হইতে উর্দ্ধোত্থানের কু-চেষ্টা করে, তখনই তাহার বিনাশ বা অধঃপতন অবশ্যসম্ভাবী। মহাবল দস্তী, শিকার প্রভাবে মানবের নিকট সামান্য মেঘ সদৃশ বিনীত। ঐ অবস্থাই তাহার আদর, নচেৎ তাহার প্রাণ সংহারেই মনুষ্যের একমাত্র লক্ষ্য হইত। ক্ষমতাবান্ পুরুষ স্নশিক্ষার দ্বারা বিনয়াবনত হইলেই তাহার প্রকৃত সম্মাননা, নচেৎ রাক্ষসের তুল্য তাহার সংসর্গ সকলেই পরিত্যাগ করিত। লোক মধ্যে নরাধিপই অধিক ক্ষমতাবান্। কিন্তু তাঁহার সেই ক্ষমতার অপব্যবহার হইলে লোকে তাঁহাকে নরপিশাচ মধ্যে পরিগণিত করিবেক। ক্ষমতার অত্যা-ব্যবহারী প্রত্যেক ব্যক্তিই নরপিশাচ।

ভ্রাতৃসেবার জন্তই ঈশ্বর মনুষ্যকে ক্ষমতা দিয়া থাকেন। তদনুযায়ী ব্যবহারই ক্ষমতার অপব্যবহার। তুমি সামান্য বা উচ্চ-পদাধিষ্ঠিত হইয়া থাকিলে, তোমার ক্ষমতাই তোমার

আশ্রিত এবং অধীনস্থগণের শিক্ষা এবং উন্নতির জন্যই ব্যবহৃত হইবে। নচেৎ তুমি তোমার পদের নিশ্চয়ই অযোগ্য। যদি ক্ষমতার দ্বারা পরোপকার সাধিত না হয়, তোমার ক্ষমতা না থাকিলেই বা কি হইত ? নিশ্চয় জানিবে যে তোমার ক্ষমতা থাকিলে জগৎ সর্বদাই তোমার মুখাপেক্ষী। ঐ মুখাপেক্ষীদের অভাব প্রতি দৃষ্টি রাখা তোমার একান্ত কর্তব্য। অধিকাংশ পাইলেই তাহাদিগের সেবা করিতে কুণ্ঠিত হইবে না বা ক্রটি করিবে না।

ক্ষমতাবান্ ব্যক্তির অবস্থা সর্বদাই তৎসম্বন্ধে বিপজ্জনক। জগৎ অনেক সময়ে তাঁহার নিকট অতিরিক্তই আশা করিয়া থাকে। সেই অতিরিক্তাশা অপূর্ণ রহিলে জগৎ অসন্তুষ্ট হয়। ঐ অসন্তোষে ক্ষমতাবান্ ব্যক্তির বিদ্বেষ উত্তেজিত হওয়া স্বাভাবিক। তাহাতে তিনি সময়ে জগৎ ঘৃণকরূপে পরিবর্তিত হইতে পারেন। অতএব তাঁহার কর্তব্য যে তিনি যেন সন্তোষ বা অসন্তোষের দিকে দৃকপাত না করেন। সততঃ স্বীয় কর্তব্য-পালন-দিকে দৃষ্টি থাকিলেই কাহারও অসন্তোষে তৎপ্রতি তাঁহার ঘৃণা উপজাত হইবে না, এবং কাহার অসন্তোষেও সেই ব্যক্তির প্রতি তাঁহার অথবা পক্ষপাতিত্বও উপস্থিত হইবে না। ক্ষমতাবান্ ব্যক্তির ঘৃণাবৃত্তি উত্তেজিত হইলে, পরে যেমন তাঁহার ক্ষমতার অপব্যবহার হইবার সম্ভাবনা; তেমনি কাহারও প্রতি তাঁহার পক্ষপাতিত্বেও তাঁহার ক্ষমতার ঐরূপ অপব্যবহার ঘটবে।

নিজ ক্ষমতা কখন কীৰ্ত্তিত হইতে দিবে না। বিশেষ আত্মমুখে তাহা কখনও কীৰ্ত্তন করিবে না। স্বর্গোরব

কীর্তনে সময়ে যেমন নিজে অহঙ্কারে ক্ষীত হইয়া সর্বদাই আত্ম-বিনাশের হেতু উপস্থিত করিবে, তেমনি পরের নিকটও তুমি স্বীয় কীর্তিত ক্ষমতার অতিরিক্তাশার উপযুক্ত ফল-প্রদর্শনে অপারগ হইয়া ঘৃণাস্পদ হইবে। অসীম ক্ষমতাবান্ ঈশ্বর স্বয়ং প্রচ্ছন্ন থাকিয়া নিত্যকাল জগতের অসংখ্য উপকার সাধিত করিতেছেন। মহাপুরুষেরাও তদ্রূপ আচরণ করিয়া থাকেন। তোমারও ক্ষমতার কার্য অবশ্যই তদ্রূপ হইবে। যাহা কল্যা করিবে, অদ্য তাহা কাহাকে জানাইবে না; অথবা যাহা করিতে সমর্থ, তজ্জন্য অগ্রেই আশ্ফালন করিবে না। একের দ্বারা কার্যের মধুরতা নষ্ট হইবে, এবং অপর ব্যবহার দ্বারা তুমি লোকের সহানুভূতি হারা-ইয়া হয় ত বাঞ্ছিত কার্যটাই সম্পাদনে অসমর্থ হইবে।

### ৫৪ । সততা বা সরলতা ।

ইহা মনুষ্যের অক্ষয় কবচ-স্বরূপ। সংসারী ইহা বক্ষে ধারণ করিয়া সমস্ত বিপদ হইতে মুক্ত হইয়া থাকে। কথিত আছে অক্ষয় কবচ ধারণে রোগী রোগোন্মুক্ত হয়। এই সততাতেই মনুষ্যের অন্তর-রোগ বিদূরিত হয়। সরলতা বা সততা থাকিলে কোন ছুষ্ঠ রিপূর প্রাবল্য সঞ্জাত হইতে পারে না। ললনার সরলতাই তাঁহার কণ্ঠের মণিহার। পুরুষের সততা তাহার অমূল্য হৃদয়-ভূষণ। দীন দুর্বল ব্যক্তির সততা থাকিলে সে বীরতুল্য। সে যেমন অন্ত-জ্যোতিতে নিজে নিয়ত কীর্তিমান্, তেমনি অপরেও তাহার

সংসর্গ-লাভে স্বতঃই কাস্তিযুক্ত হইয়া থাকে। সে দরিদ্র হইলেও সকলের নিকট নিয়ত সমাদর প্রাপ্ত হইয়া থাকে। তাহার বশুতা স্বীকার করিতে ধনী বা বলীও লজ্জিত হয়েন না।

ব্যবসায়ীর সততাই উন্নতি। যাহারা নির্যোধ, তাহারা প্রবঞ্চনার সময়ে অধিক লাভ দৃষ্টি করিয়া ব্যবসয়ে প্রবঞ্চনা মার্গ অবলম্বন করে। কিন্তু তাহারা পাপের পূর্ণতা কালেই স্বীয় দুর্গতি বুঝিতে পারে এবং তৎকালে তাহা স্বচক্ষে দেখিতেও পায়। সততায় আপাততঃ লাভাংশ কম বটে; কিন্তু সেই লাভ বৃষ্টিবিন্দু সদৃশ, সময়েই তাহাতে গুরু কূপ পূর্ণ হইয়া থাকে। অসৎ বা চৌর্য্যবৃত্তিতে কে কোথায় প্রকৃত ধনবান্ বা সুখী হইয়াছে? ঐরূপ বৃত্তিতে কাহারও ধনসঞ্চয় হইলে তাহাতে তাহার চিরস্থায়ী কলঙ্ক-মঠই প্রস্তুত হইল। নিল্লজ্জ দস্যু গর্দভারূঢ় হইলে সে আপনাকে রাজজ্ঞানে আশ্ফালন করিলে তাহার যে গর্ক, অসদ্বৃতি-সঙ্কিত-ধনের অধিপতিও আপনাকে উচ্চ মনে করিলে তাহারও গর্ক ঠিক তাদৃশ। ভূগর্ভোখিত মলিল কখনও শুক হয় না। কেন না তাহা ঈশ্বর হইতে আগত। স্বয়ং ঈশ্বরের হস্ত হইতে যে ধন সমাগত হইবে, তাহা তোমার ধর্ম্মভাণ্ডারে চিরদিনই রহিয়া যাইবে। অন্য জলাশয় হইতে অপহৃত বারি দ্বারা কি কাহারও গৃহখাদ পূর্ণ হইতে পারে? তাহা এক সময়ে পূর্ণ হইলেও কালে অবশুই তাহা শুকাইয়া যাইবে। পরিশ্রম সহকারে খাদ গভীরতর খনন করিলেই বারি আপনিই তাহাতে উখিত



হইয়া সেই খাদ জলপূর্ণ হইলে সেই পূর্ণতা যেমন রহিয়া যাইবে, তেমনি প্রকৃত পরিশ্রম দ্বারা ক্রমশঃ অতি অল্প অল্প বিত্ত সঞ্চয় হইলেই তাহাতেই তোমার ভাণ্ডার পূর্ণ হইবে। স্বয়ং লক্ষ্মী সেই ভাণ্ডারের অধিষ্ঠাত্রী রক্ষয়িত্রী হইবেন, সুতরাং তাহা আর নিঃশেষিত হইবে না। সত-  
তায়ই তুমি রাজলক্ষ্মীকে প্রাপ্ত হইবে। তবে লক্ষ্মীর দৃষ্টি দময়-সাপেক্ষ। অধীরতায় তাঁহাকে প্রাপ্ত হওয়া যায় না। যুগপৎ ধৈর্য্য এবং সততা চির-অবলম্বনীয়। ঐ দুইকে হৃদয়ে ধারণ করিলে, নিশ্চয়ই তুমি কালে সুখী ও সমৃদ্ধিশালী হইবে। অঙ্গুলী স্ফীত হইয়া হঠাৎ তাহা কদলীবৃক্ষ হইলেও হইতে পারে। কিন্তু ঐ অবস্থা তাহার রোগের অবস্থা। ক্রমোন্নতিই সর্বদা বাঞ্ছনীয়। তাহা সততা বা সরলতাতেই সংসাধিত হইবে। দরিদ্রই হও আর ধনীই হও, জীবনকে সর্বদা সংপথে অধিষ্ঠিত রাখিবে; তাহাতে যেমন নিজে সুখী, তেমনি অপরেও তোমার সংস্পর্শে সুখী হইবে।

### ৫৫। আত্মহত্যা ।

সমস্ত এবং সর্ববিধ প্রাণীগণকে নির্য্যাতনার পরিমাণানু-  
সারে শ্রেণীবদ্ধ করিতে হইলে, আত্মঘাতী তুল্য অধিক  
ভয়ানক মুর্খ নিখিল সংসারে আর কেহই দৃষ্ট হইবে না।  
গুটাপোকা আপন নাগে আপনাই আবদ্ধ হয় বলিয়া তাহা  
নির্য্যাতন কীটমধ্যে পরিগণিত। কিন্তু ঐ কীট আপন  
প্রাচুর্য্য অস্তঃসৌন্দর্য্য জগৎকে প্রদর্শন করিবার জন্যই সে

আপন পটুকোষে আপনই আবদ্ধ হয়। সেই কোষ ছিন্ন হইয়া সে যখন পুনঃ বহির্ভূত হয়, তাহার সৌন্দর্য্যে কেনা বিমোহিত হয়? কিন্তু আত্মহস্তা মনুষ্য কীটানুকীট হইতেও অধম। কেহ বা সংসারের কাল্পনিক নির্ঘাতনে আপনাকে নিপীড়িত মনে করিয়া, এবং কেহ বা আশার আত্ম-প্রবঞ্চনায় নিজেই আপনাকে বঞ্চিতাশ করিয়া আপন দেহকে বিনষ্ট করিয়া থাকে। যে দেহের রক্ষার জন্ত কত লক্ষ লক্ষ জন কত যত্ন এবং কত চেষ্টা করিতেছে; যজ্ঞজ্ঞানিত্য এই ধরাধামে কত কোটি কোটি মুদ্রা ব্যয়িত হইতেছে; বাহার জন্ত সৃষ্টির প্রারম্ভ হইতে অদ্য পর্য্যন্ত কত বিজ্ঞানবিদ পণ্ডিত কর্তৃক কত নূতন নূতন উপায় আবিষ্কৃত হইতেছে; এবং যজ্ঞজ্ঞান স্বয়ং ঈশ্বরও মনুষ্য চেষ্টায় সাহায্য করিয়া কত কত নূতন বিদ্যা ও বিজ্ঞান মানব-সমাজে প্রকটন করিতেছেন, সেই অমূল্য নর-দেহ মূর্খ নর কর্তৃকই বিনষ্ট হইবে, ইহা অপেক্ষা আর পরিতাপের বিষয় কি আছে? জীবনে বিতৃষ্ণা জন্মিয়া থাকিলে, তাহাতে এখনও রত্ন ফলান যাইতে পারে। অন্ধারেও হীরক প্রসূত হওয়া অসম্ভব নহে। কত সংসার-হিতৈষী পণ্ডিতগণ মানব-হিতার্থেই বিজ্ঞান চর্চায় ব্রতী হইয়া কত কত উচ্চ হিমা-চল-শিরে আরোহণ করিতেছেন, অথবা কত মহচ্ছকট-জনক-কার্য্যে প্রবৃত্ত হইতেছেন; এবং তাঁহারা সেই সেই মহা-ব্রতে আপন জীবন পর্য্যন্তও উৎসর্গ করিতেছেন। এক্ষণ পর্য্যন্ত কত অনাবিকৃত প্রদেশ রহিয়াছে, যেখানে মনুষ্য প্রাণ-নাশ-ভয়ে এ পর্য্যন্ত প্রবেশ করিতে সমর্থ হয় নাই।

যাহারা আত্ম-প্রাণ-বিনষ্ট করিবার জন্ত উদ্যত, তাহারা সেই সকল প্রদেশে প্রতিষ্ঠিত হউক। যদি তথায় তাহাদিগের প্রাণ বিনষ্ট হয়, তাহাতে তাহাদিগের সঙ্কল্পই সাধিত হইল; আর যদি তাহারা তথা হইতে প্রত্যাবৃত্ত হইতে সক্ষম হয়, তাহা হইলে তাহারা মহান্ আবিষ্কারকরূপে গৃহীত হইয়া জগতের নিকট চিরস্থায়িণী প্রতিপত্তি লাভ করিতে সমর্থ হইবে। তৎপর তাহারা আপনাদিগের অপদার্থ জীবনেই রত্ন প্রসূত হইতে দেখিয়া সেই জীবনের সার্থকতা অল্পভব করিতে সমর্থ হইবে। জীবন-রত্ন বিসর্জন করিতে হইলে ভীকুর হ্রায় আত্মহত্যা কেন? স্ত্রীই হও আর পুরুষই হও, কার্যক্ষেত্রে অথবা সমর-প্রাঙ্গনে প্রাণ-দানই সাধুতা এবং বীরত্ব। তোমার প্রাণে নিজের আবশ্যিকতা না থাকিলে, অস্ত্রের তাহাতে প্রয়োজন আছে। নিঃস্বার্থ পর-সেবায় তাহা উৎসর্গ কর, তাহাতে তোমার জীবন যেমন পরের কার্যে আসিবে তাহাতেই আবার তোমারও আত্মহত্যা-কার্য সংসাধিত হইবে। প্রকৃত আত্মহত্যাই আমিত্ব-হত্যা। জীবন-নাশ হইলেই জগৎ সম্বন্ধে তোমার আমিত্ব বিনষ্ট হইল। জীবন রাখিলেও যদি এই আমিত্ব বিনাশ করিতে পারা যায়, ঐ আমিত্ব বিনাশে কেনই বা তুমি বীরত্ব দেখাইতে পরাস্থু হইবে? যদি আত্মহত্যা বীরত্ব প্রকাশক অনুমান করিয়া থাক, এই আমিত্ব-হত্যাতেই জগৎকে স্তম্ভিত করিতে চেষ্টাবান্ হও। জগৎ ঐ আত্মহত্যাতেই যেমন বিশ্বাস্বিত হইবে, তাহাতে তোমারও কামনা তেমনি যুগপৎ সংসাধিত হইবে। তদবস্থায় তোমার দেহ গুটীপোকায়

কোষ-সদৃশ দৃশ্যমানমাত্র থাকিবে, কিন্তু কোষ-বিনিঃসৃত নয়নানন্দ ও চিত্তরঞ্জক প্রজাপতি-তুল্য তোমার আত্মা মহোচ্চ আকাশেই উড্ডীন হইবে। আত্মহত্যা করিবার অভিপ্রায় হইলে, কীটের প্রাজ্ঞতার অনুবর্তী হইয়া জীবনকে সুন্দর হইতে সুন্দরতর প্রদর্শন করিতে প্রয়াসবান হও। আত্মহত্যায় ফাদর ডোমিনের\* দৃষ্টান্ত অনুসরণ কর। তোমার দ্বারা নূতনতর আত্মহত্যার আবিষ্কারে জগতের নিত্য নূতন বিশ্বয়, এবং জীবেরও তাহাতে যুগপৎ প্রকৃত উপকার সংসাধিত হইবে। তৎপর দেহান্তে জগতের আশীর্বাদ তোমার আত্মহত্যার উপযুক্ত পুরস্কার হইবে।

### ৫৬। ক্রোধ এবং ভালবাসার নিত্যযোগ ।

যে প্রশান্ত বিমান হইতে প্রাণ সস্তোষিণী বারিধারা নিপতিত হয়, সেই স্থান হইতেই আবার লোমহর্ষণ ভীম-বজ্র-নির্ঘোষও ধরাতলে সমাগত হয়। শান্তিবারি বর্ষণ এবং কুলিশ-নিপাতন এক আকাশেরই উভয়বিধ বিপরীত কার্য্য ; কিন্তু উভয় কার্য্যই স্বাভাবিক। মনুষ্য অনেক সময়ে ক্রোধের

---

Father Domein. ইনি একজন অতি দয়াবান্ রোমান্ কাথলিক সম্প্রদায়ভুক্ত পুরোহিত ছিলেন। সম্প্রতি তিনি ইহ-লোক পরিত্যাগ করিয়াছেন। তিনি আপন ইচ্ছায় কুষ্ঠরোগী-দিগের সেবা নিজ জীবন-ব্রত করিয়াছিলেন। কিন্তু, সময়ে ঐ মহাব্রতে নিজে কুষ্ঠ-রোগাক্রান্ত হইয়া আপন প্রাণ হারাইয়াছেন।

ভীষণতা দর্শনে ভাবিয়া থাকে, ঈশ্বর কেন তাহাদিগের হৃদয়ে ক্রোধ নিহিত করিয়াছেন। সে ক্রোধ-স্থিতির কারণ নির্দেশ করিতে অপারগ হইয়া ক্রোধকে নিঃশেষিত করিতে প্রয়াসযুক্ত হয়, কিন্তু তাহার অনেক চেষ্টা থাকিলেও ঐ রিপুটী এককালে বিনষ্ট হয় না? কেনই বা ঐ ভগবৎ প্রদত্ত সামগ্রীটী একেবারে বিনাশ প্রাপ্ত হইবে। ঈশ্বরের রাজ্যে কোন্ দ্রব্যেরই বা পূর্ণ বিলোপ আছে? ক্রোধ আর প্রেম দুই সহোদর, ইহা সাধারণ মানবেই বা কিরূপে বুঝিবে? ক্রোধ না থাকিলে “ভালবাসা কি” ইহা কে বুঝিত? ক্রোধ আছে বলিয়াই মানুষ সত্যকে ভালবাসিতে সমর্থ। একের প্রতি ক্রোধ এবং অন্যের প্রতি প্রেম স্বভাবতই হৃদয় হইতে প্রবাহিত হয়। গাপের প্রতি ক্রোধ জন্মিলেই সত্যের প্রতি অহুরাগ জন্মিবে। এক দিকে ঘৃণার আধিক্যই অন্য দিকে আসক্তির আধিক্য হইবে। ক্রোধই প্রেমের সহকারী।

পুনশ্চ ক্রোধই প্রেমের জীবন। যদি একেবারে, ক্রোধ-শূন্য কোন হৃদয় থাকে, তাহা অবশ্যই প্রেমশূন্য। তাহার ঔদাসীন্যতাই তাহার অপ্রেমের কার্য। যাহাকে যত ভালবাসিবে, তাহার প্রতি ক্রোধের কারণ উপস্থিত হইলে তৎ-প্রতি তত অধিক ক্রুদ্ধ হইবারই সম্ভাবনা। পিতা সন্তানের অবাধ্যতা দর্শনে অধিকই ক্রুদ্ধ হইবেন; বন্ধুও বান্ধবের অকৃতজ্ঞতায় নিতান্তই উত্তপ্ত হইয়া থাকেন। কারণ, পুত্রের প্রতি পিতার স্নেহ এবং বন্ধুর প্রতি বন্ধুর ভালবাসা অধিক বলিয়াই ঐরূপ ঘটিয়া থাকে। দাম্পত্য-প্রণয় প্রেমের উপমা

স্বরূপ উল্লিখিত হইয়া থাকে । কিন্তু দম্পতির মধ্যে প্রকৃত ভালবাসা থাকিলে, সেখানে সময়ে একের প্রতি অপরের অভিমানের আধিক্যও নিশ্চয় । যিনি শ্রীরাধিকার কৃষ্ণ-প্রেমান্বত্ততা বুঝিয়াছেন, তিনি তাঁহার অভিমানাতিশয্যের কারণও নির্ণয় করিতে পারিয়াছেন । সাধক উন্নতির সোপানে আরুঢ় হইলে, ঈশ্বরের প্রতি তাহার আবদার উপস্থিত হয় । সেই আবদার পরিপূরণ না হইলে, সময়ে সময়ে তাহার অভিমানও সজ্জাত হওয়া স্বাভাবিক । এই অভিমানে প্রকৃত প্রেমেরই বৃদ্ধি হইয়া থাকে । সেই জগু ঈশ্বরও সাধক হৃদয়ে ঐ অভিমানোদগমের অবকাশ দিয়া থাকেন । শ্রীরাধিকার মানভঞ্জনই ভগবান-কর্তৃক সাধকের আবদার বা অভিলাষ পূরণ । তাহাতেই সাধকের হৃদয়ে ক্রতজ্ঞতাসহ ঈশ্বরানুরক্তিই বৃদ্ধি হইয়া থাকে ।

মানব-দম্পতিরমধ্যেও অভিমানেই অয়ুরাগ বৃদ্ধি । একের প্রতি অপরের অভিমান উপস্থিত হইলে, তাহা প্রেম-বন্ধনের চিহ্ন-স্বরূপ জানিবে । শাস্তিবারি দ্বারা শুষ্ক ভূমি প্লাবিত হইবার অগ্রে আকাশে মেঘধ্বনি হয় । প্রেমিক-হৃদয়ের ক্রোধধ্বনিও অপরকে প্রেমে অভিষিক্ত করিবার জন্যই হইয়া থাকে । মাতার ক্রোধদৃষ্টি কেবল বাৎসল্য প্রকাশক । অবোধ পুত্রই তাহাতে সন্তুষ্ট হইবে । পিতৃ-ভৎসনায় পুত্র কখন কখন গৃহত্যাগী হইয়া থাকে । মূর্থ পুত্র ভৎসনার মধুরতা বুঝিল না, সেই জন্যই সে আপন গলদেশে আপনিই কুঠারাঘাত করিল । সে সেই ভৎসনা শিরে ধারণ করিলে, তদ্বিনিময়ে সে যে স্বর্গীয় স্নেহ প্রাপ্ত

হইত, তাহা সে বুঝিল না। পিতা তাহাকে ভালবাসেন বলিয়াই তিরস্কার করিয়াছেন। তিরস্কারের মর্শ্ব বুঝিলেই সে ভালবাসার মর্শ্ব বুঝিত। স্বর্গীয় পিতাও সময়ে সময়ে মল্লয্যকে তিরস্কার করিয়া থাকেন। সংসারী মায়ায় ভ্রান্ত হইয়া ঐ পরীক্ষাদি অনারূপ দর্শন করেন; সুতরাং, পরে তাহার হৃদয় ঈশ্বর-প্রেম-গ্রহণে অসমর্থ হয়। যিনি ক্রোধকে শাস্তির প্রস্রবণ বিবেচনা করিয়া গরল হইতেই অমৃত গ্রহণ করিতে শিক্ষা করিয়াছেন, সেই ব্যক্তিই ধন্য।

### ৫৭। সন্দেহ ।

সন্দেহযুক্ত-হৃদয়, ছিদ্রযুক্ত-তরণী-সদৃশ। সে, সময়ে আপ-নিও ডুববে এবং তৎসহ অপরকেও ডুবাইবে। নৌকা রক্ষা করিতে হইলে তচ্ছিদ্র নিরুদ্ধ করিতে হয়; তদ্রূপ হৃদয়ে সন্দেহ উদ্ভূত হইলে, তদগো উহাকে নিবারণ করিবে। তরণী-মধ্যে ছিদ্র থাকিলেও অবহিত নাবিক সেই তরণী বাহিয়া যেমন নিজ গম্যস্থানে লইয়া যাইতে সক্ষম, তোমার হৃদয়ে সন্দেহ অবস্থিতি করিলেও তুমি সতর্ক এবং সূচতুর হইলে আপন কার্য সাধন করিতে সমর্থ হইবে। হৃদয়ের অথবা সন্দেহ অতীব ভীষণ। তাহাতে আপন কার্য-কারিতা, নিজের শাস্তি এবং অপরের শাস্তি, একেবারে নষ্ট হইবে। ভূত্যের প্রতি উপযুক্ত কারণ মূলে সন্দেহ উপজাত হইলে, নিজেই অধিক অবহিত হইবে; কিন্তু, তোমার হৃদয়ের ভাব শীঘ্র তাহাকে প্রকাশিত: জানিতে দিবে না; সে তাহা

কার্যতঃ জানিতে পারিলে তাহাতে তাহার সংস্কার সাধিত হইবারই সম্ভাবনা। ঐরূপ কার্যতঃ বা প্রকারান্তরে তাহাকে উহা জানানও আবশ্যিক। অন্যথা, সে তোমাকে অলস বা নির্কোঁধ জ্ঞানে অধিকই প্রবঞ্চনা করিতে প্রবৃত্ত হইবে। পরে, প্রবঞ্চনায় সে কৃতকার্য হউক বা না হউক, সে কঠিন প্রবঞ্চনা-ব্যবসায়ী হইয়া উঠিলে, তৎপর তাহার সংস্কারের কম সম্ভাবনা। “অন্ধকে অন্ধ বলিবে না” ইহা বাল্যকালের অভ্যস্ত পাঠ। ভৃত্য বা অধীনস্থ ব্যক্তিকে প্রকাশ্যরূপে বঞ্চক বা আত্ম-সন্দেহ-প্রণোদিত-বাক্যে অভিহিত করিবে না। ঐরূপ করিলে, তাহার আনুগত্য তুমি একেবারেই বিনষ্ট করিবে। অধিক সন্দেহের কারণ উপস্থিত হইলে, তৎকালে পরস্পর হইতে বিচ্ছিন্ন হওয়াই শ্রেয়ঃ। নচেৎ উভয়েরই বিপদগ্রস্থ হইবার সম্ভাবনা। আত্মীয়-স্বজনবর্গের সম্বন্ধে একেবারেই সন্দেহোদ্ভিক্ত বাক্য উচ্চারণ করিবে না। তাহাদিগের কোন কার্য তোমার অসন্তোষ-কর প্রতীতি হইলে, তাহা তাহাদিগের অজ্ঞানতা বশতঃ হইয়াছে ইহাই মনে করিবে, এবং অন্যবিধ অল্পমান করিবার কারণ থাকিলেও তাহাদিগের কার্য অসদভিপ্রায়-প্রণোদিত বলিতে সর্বদাই কুণ্ঠিত হইবে। যেখানে আপাততঃ মিলের সম্ভাবনা নাই, তথায় তুমি আপনিই দূরে থাকিবে এবং তোমার অহিতকারীকে সদ্যবহারে পরাজিত করিতে চেষ্টা করিবে। যাহারা স্বজন, তাহারা পরিণামে ঐ সদ্যবহারেই তোমার বশীভূত বা অল্পকূল হইবেন। সহিবৃত্তা মানব-হৃদয়ের একটা মহদ্গুণ। যিনি স্বজন-কৃত



অপরাধ উপেক্ষা করিতে সক্ষম, তিনি পরিণামে নিশ্চয়ই মুখী হইবেন। স্বজনরূত-অন্তর্বেদনা স্বজনের দ্বারাই আশু উপশমিত হইয়া থাকে। অতএব আত্মীয়বর্গের উপর প্রকাশ্য দোষারোপে তাঁহাদিগের সহানুভূতি যেন কখনই হারান না হয়। সেই সহানুভূতি হারাইলে কালাতিপাতেও তোমার হৃদয়-বেদনার কখন পূর্ণ শান্তি হইবে না। স্বজন-সহানুভূতি সন্দেহের দ্বারা কদাচ বিনষ্ট করিবে না।

সন্দেহের কারণ উপস্থিত হইলে, সেই সন্দেহ নিরাকরণ জন্য অভিলাষ উপজাত হওয়া স্বাভাবিক। এই অভিলাষ সাধারণ বা অধীনস্থ ব্যক্তিগণ সম্বন্ধে পরিপূরণের চেষ্টা হইলে হানি নাই। কিন্তু, বান্ধব বা বিশ্বস্ত ব্যক্তির প্রতি হৃদয়পাক বশতঃ কোন বিষয়ে সন্দেহ উপজাত হইলে, ঐরূপ চেষ্টাই অনিষ্টের কারণ হইবে। উহাতে বন্ধু ও বিশ্বস্তজনের সহিত হৃদয়যোগ একেবারে ছিন্ন হইয়া যাইবে। বান্ধবের প্রতি সন্দেহ উপজাত হইলে, তৎকালে আত্মপ্রতি অর্থাৎ, নিজের নির্মলতা বা অভ্রান্তির প্রতি আপন সন্দেহই তোমার রক্ষা। আর আপন নির্দোষিতার প্রতি প্রকৃত সন্দেহবান্ হইলে, নিজাপরাধ এবং বন্ধুর হৃদয়লতা দর্শন করিয়া পরস্পরকে ক্ষমা করিতে সচেষ্ট হইবে। সুতরাং, তাহাতেই সন্দেহের প্রায়শ্চিত্ত সংসাধিত হইবে।

## ৫৮ । গৃহীর পাপ ।

সংসারিগণ যে রত্ন পাইবার জন্য নিত্য কত দেবতার আরাধনা করে ; বাহার জন্য তাহারা শরীর-শোণিত-তুলা অতি কষ্ট-লব্ধ-ধনও তুচ্ছ বিবেচনা করিয়া তাহা ব্যয় করিতে কিছুমাত্র কুণ্ঠিত হয় না ; অথবা, যে রত্নের জন্য তাহারা স্ব স্ব জীবনে কত দুঃসহ ক্লেশ অকাতরে প্রতিনিয়ত সহ করিয়া থাকে, তাহারা সেই রত্ন পাইয়াও পরে তাহারই জন্য অতীব মর্শ্ব-নিঃস্বীকৃত হইয়া আপন আপন শিরে মুণ্ডাঘাত করিতেও দেখিতে পাওয়া যায়। ঐ অবস্থায় তাহারা বিধাতা বা দন্ধ অদৃষ্টেরই দোষ দিয়া আপনাদিগকে নিরপরাধী স্থিরীকৃত করে। সংসারী-মানব-মায়ায় এই আশ্চর্য্য বিচিত্রতা। পুত্ররত্ন লাভ হইল, তাহার জন্মকালে কত আনন্দ জয়ধ্বনি এবং কত শঙ্খ ও মাঙ্গলিক বাদ্যাদি নিনাদিত হইল। প্রতিবেশীগণও সেই আনন্দে জয়ধ্বনি করিল। পরে সেই শিশুর শৈশবে কতই আদর, কতই যত্ন এবং কতই আনন্দোৎসব হইতে লাগিল। তৎপুত্র শিশু বালক হইল ; তদনন্তর সে কুমারাবস্থায় উপনীত হইল। পুত্র যত বয়োপ্রাপ্ত হইতেছে, সংসারী পিতা-মাতার হৃদয়ে ততই আনন্দ উথলিয়া উঠিতেছে। তাঁহারা ভাবিতেছেন তাঁহাদিগের গৃহাঙ্ককার দূরীকরণ জন্য গগণস্থিত চন্দ্র যেন নিত্য ক্রমশঃ তাহাদিগের নিকটবর্ত্তী হইতেছে, অথবা যেন তাহাদিগের সংসার-দুঃখ নিঃশেষিত করিবার জন্য সুখদিনমণি তাহাদিগের গৃহেই উদয়ান্মুখ হইতেছে ; অথবা

যেন তাহাদিগের সমস্ত সংসারাশা পরিপূরণার্থ কর্তৃকই তাহাদিগের নিকট সমানীত হইতেছে। কিন্তু হায়! সকলই যে তাঁহাদিগের মনসম্মত শূন্যাধিষ্ঠিত-দুর্গ তাঁহারা তাহা একবারও ভাবেন নাই। কোথায় পুত্র কুমারাবস্থায় উপনীত হইয়া স্কুমার হইবে, না সে একটী নূতন আকারের প্রাণী প্রস্তুত হইল, বাহ্যিক অঙ্গাদিতে মানব কিন্তু আচরণে পশুবৎ দৃষ্ট হইল। সংসারী-পিতা হর্বের স্থলে বিষাদ, হাশ্বের স্থলে ক্রন্দন, এবং আশার স্থলে পূর্ণ-নিরাশাকে অবলম্বন করিলেন। তিনি তখন পুত্রের সংস্কার চিন্তনে প্রবৃত্ত, তাহাকে কুপথ হইতে স্পথ আনিবার জন্য প্রয়াস-যুক্ত হইলেন। তজ্জন্য কতই উপায় অবলম্বন করিলেন, কিন্তু, সকলই বন্যাশ্রোতমুখে বালিবান্দ-সদৃশ ভাসিয়া গেল। পিতা শেষে পূর্ণ নিরাশায়ুক্ত হইয়া পুত্রই সংসারের পাপ এবং পুত্র-কামনাও পাপ-কামনা বলিয়া স্থির করিলেন। কিন্তু পিতা ভাবিলেন না যে, ঐ সমস্ত কিছুই পাপ নহে; সমস্তই তাঁহার আপন কার্যাগুণে পাপাকারে পরিবর্তিত হইয়াছে। তিনি পুত্রকে লালন করিয়াছেন, পিতার একটী কার্য সম্পাদন করিয়াছেন। কিন্তু, তিনি তাহার চরিত্র এবং জীবন সংগঠনে সতর্কতা অবলম্বন না করায়, তাঁহার দ্বিতীয় কর্তব্যে ক্রটি করিয়াছেন। সেই ক্রটি-হেতুই এক্ষণে পুত্রের দুর্দশা। মনুষ্যের নিজের পাপেই যে তাহার তাবৎ নষ্ট বা নষ্টোন্মুখ হয়, তাহা মনুষ্য জানিয়াও তদ্বিষয়ে মনোযোগী হয় না। গৃহীর পাপে গৃহ নষ্ট, এবং রাজার পাপেই প্রজার ক্লেশ ও রাজ্যনষ্ট ইহা গৃহী এবং রাজা

উভয়েই জানেন, কিন্তু উভয়েই সংসারের মায়াতে ভ্রান্ত হইয়া স্ব স্ব হিত প্রতি দৃষ্টিপাত করিতে বিমুখ হইয়েন। উভয়েই নিত্য ঈশ্বরশীর্ষাদ প্রার্থনা করুন, তৎপ্রাপ্তিতে তাঁহারা যেমন সুখী হইবেন, তেমনি তাহাতে গৃহীর সম্মান-স্বজন এবং রাজার অমাত্য-প্রজা প্রভৃতি সকলেই সুখী হইবে। যাহারা সংসার পালনই ঈশ্বর-সেবা জ্ঞান করেন এবং সেই সেবার পারিপাট্য লাভের জন্য নিত্য ঈশ্বরানু-গ্রহ প্রার্থনা করিয়া জীবনকে পবিত্র হইতে পবিত্রতর করিতে চেষ্টা করেন, সেই গৃহী এবং ভূপাল উভয়েই ধন্য।

### ৫৯ । পরপ্রশংসা ।

কুটিল নয়ন যেমন পরশ্রী দর্শনে কাতর, তেমনি কুটিল কর্ণ পরপ্রশংসা শ্রবণে ব্যথিত হয়। প্রবাদ আছে যে, বিভাল গৃহীকে আঁটকুড়া বা অপত্য বিহীন দেখিলেই তাহার আনন্দ। সংসারে কুটিল মনুষ্য ঐ মার্জ্জার সদৃশ। যদি সে একা থাকিয়া সমুদয়ই উপভোগ করিতে পারিত, তাহা হইলে তাহার আর আনন্দের পরিসীমা থাকিত না। কিন্তু, সংসার ত কেবল তাহার অভীক্ষা সাধন জন্য সৃষ্ট নহে। অবশ্রুই উহার নিয়ম অন্যবিধ। স্মৃতরাং, কুটিল ব্যক্তির চক্ষু-শূল বা কর্ণ-শূলের উপশম হইল না। কিন্তু, অনর্থক কাতরতা কেন? জানিবে যে, যাহাতে রোগের উৎপত্তি তাহাতেই নিবৃত্তি। যেমন, কর্ণ-মধ্যে জল প্রবেশ করিলে তাহা পুনশ্চ সলিল দ্বারাই বহির্নিষ্করণ করিতে

হয়, কাহারও প্রশংসায় তোমার কণ্ঠ ব্যথিত হইয়া থাকিলে তাহারই গুণানুবাদ শ্রবণে তোমার ঐ প্রশংসা-শ্রবণ-কাতরতা নিরাকৃত হইবে।

ব্যক্তিগ্ৰন্থ ব্যক্তির ঔষধ সেবনই তাহার রোগ মুক্তির প্রধান উপায়। সেইরূপ পরশ্রী-কাতরতা-ব্যাদি নিপীড়িত ব্যক্তিরও ঔষধ-সেবন নিতান্ত প্রয়োজন। পরের শ্রী এবং নিজের সুখ-বিত্তাদি বাহা কিছু আছে, সমস্ত ঈশ্বর হইতে আগত, এই বিবেচনায় নিজ সম্বন্ধে ভগবদ্-প্রদত্ত রূপা-নিচয়-চিন্তন এবং তজ্জন্ত ঈশ্বর প্রতি কৃতজ্ঞতা প্রকাশই পরশ্রী-কাতরতা-ব্যাদির মহৌষধ। পর-প্রশংসা-কাতরতা রোগেরও ঐ একই ঔষধ। তুমি নিজের সম্বন্ধে অবশ্যই স্নানামাকাজ্জী। ঐরূপ স্নানাম কোন বিষয়ে তোমার ভাগ্যে ঘটয়া থাকিলে, তাহার জন্য যেমন অপরে সুখী হইবে তুমি আশা কর, তেমনি অন্যেও তাহাদিগের সুখশে তোমারও সম্বল-চিত্ততায় আশা করিয়া থাকেন। তুমি তাহাতে সুখী হইলে ঈশ্বর-রাশীর্বাদই প্রাপ্ত হইবে।

পর-প্রশংসাই যে আত্ম-প্রশংসা ইহা মনুষ্য কচিৎ বুঝিয়া থাকে। চতুর ব্যক্তি তাহা বুঝিয়া তদ্বারা প্রকারান্তরে আপ-নারই যশঃ বোধিত করিয়া লয়। সজ্জনদিগের সহিত তাহার ঘনিষ্ঠতা এবং তৎপ্রতি তাঁহাদিগের অহুরাগ প্রভৃতির উল্লেখ করিয়া সে নিয়তই অপরের নিকট তাঁহাদের যশঃ বোধনা করিয়া থাকে। ইহাতে তাহার মনোগত অভিপ্রায় এই যে, সজ্জনসহ তাহার আত্মীয়তা হেতু অপরে তাহাকে ঐ প্রকৃতির লোক অহুমান করিবে। সে দৃষ্ট চতুর হইলে,

লোকে তাহাকে সদগুণাবিত বিবেচনা করিয়া প্রতারিত হইতে পারে সন্দেহ নাই; কিন্তু, তাহা হইলেও তাহার দ্বারা এই একটা উপকার সাধিত হইল যে, তদুন্নিখিত সজ্জনদিগের বশঃ তাহা কর্তৃক কয়েক জনের নিকটও ঘোষিত হইল। তাহাতে ঐ সজ্জনগণ দূরে থাকিয়াও ঐ সকল লোকদিগের নিকট আদরের পাত্র হইলেন। “ভাগ্যবানের বোঝা ভগবান্ বহন করেন” যে উক্তি আছে, তাহা এই দৃষ্টান্তেও একরূপ উৎকৃষ্টরূপে প্রমাণিত হইল। সজ্জনগণ আত্মগুণানুকীৰ্তন করেন না। তাঁহাদিগের গুণানুবাদ উল্লিখিত চতুর-ব্যক্তি বা শিষ্ট সাধুগণ কর্তৃকই কীর্তিত হইয়া থাকে। স্মরণ্য, উপযুক্ততার সম্মান স্বতঃই পৃথিবীতে অধিষ্ঠিত হয়। পরগুণানুকীৰ্তনে মনুষ্যের আত্মলাভ ভিন্ন কিছুই হয় না। যিনি সাধু, ঐ গুণানুবাদে তাঁহার জীবনে ঈশ্বর-প্রসন্নতা লাভ হইবে; এবং যে চতুর-সংসারী, ঐ গুণানুকীৰ্তনে সে নিজ-প্রশংসাই প্রকারান্তরে কীর্তন করিতে সমর্থ হইবে। অতএব সাধু হও বা চতুর-সংসারী হও, পর-প্রশংসা নিয়ত তোমার জীবনের ধর্ম করিবে। ঐ পরপ্রশংসায় কখনও কাতরতা প্রকাশ করিবে না। বরং, পর-প্রশংসা-কীর্তনে সর্বদাই উন্মুথ থাকিবে। সতের গুণানুকীৰ্তনে ক্রমশঃ আপনিও সময়ে সম্ভাব ধারণ করিয়া সুখী হইবে। কিন্তু, পর-প্রশংসা করিতে গিয়া অযথা প্রশংসা কদাচ করিবে না। কারণ, তাহা করিলে, তুমি অপরের চক্ষে কালে হেয়রূপে দৃষ্ট হইবে। সত্যের সাহায্যার্থে যতদূর প্রশংসা করা উচিত

বিবেচনা করিবে, সর্বথা ততদূরই করিবে। এবস্থিধ পর-প্রশংসায় যেমন ঈশ্বরের সেবা, তেমনি তাহাতে নিজেরও হিত যুগপৎ সাধিত হইবে।

### ৬০। কার্য্য-তৎপরতা ।

শম্বুকের প্রকৃতিগত মন্থরগতি ; কিন্তু, উহাকে দেখিলে কাহার না হৃদয়ে ঘৃণা উপজাত হয় ? উহার জঘন্ম স্থির নন্দ গমন যেমন উহার স্বাভাবিক কার্য্য, তৎপ্রতি মনুষ্য হৃদয়ের ঘৃণাও তেমনি ঐ হৃদয়ের স্বাভাবিক ভাব। শিথিল-স্বভাব বিশিষ্ট ব্যক্তি ঐ শম্বুকের অবস্থাপন্ন। সে হয় ত স্বভাবতঃ কার্য্যে অক্ষম, তজ্জন্ম তাহার কার্য্য-তৎপরতা দৃষ্ট হয় না ; কিন্তু, তথাচ তাহার দীর্ঘস্থত্রতা সর্ব-দাই ঘৃণাই। যাহারা বার্ক্ক্য বা দৌর্ব্বল্য প্রযুক্ত শিথিল-স্বভাব-বিশিষ্ট, তাহারা ক্ষমার পাত্র হইতেও পারে ; কিন্তু, তাদৃশ কারণাভাবে যাহারা দীর্ঘস্থত্রতা দোষে দোষী, তাহা-দিগের অপরাধ অক্ষমনীয়।

বিষয়-কর্ম্ম-নিযুক্ত ব্যক্তির প্রথম প্রয়োজনীয় গুণ, কার্য্য-তৎপরতা। এই গুণ তাহার না থাকিলে সে সময়ে সাধা-রণ সমীপে অকর্ম্মণ্যরূপে স্থিরীকৃত হইবে। সে বাণিজ্য-কারী বা ব্যবসায়ী হইলে লোকে তাহার সহিত ব্যবসা ও কার্য্যাদি করিতে সঙ্কুচিত হইবে। স্মতরাং, তাহার ব্যবসাদি কালে লয় প্রাপ্ত হওয়া অসম্ভব নহে। আর সে ব্যক্তি অন্ত কোন কার্য্যে নিযুক্ত থাকিলে তাহার অধীনস্থ

ব্যক্তিগণ ক্রমশঃ তাহারই স্বভাব প্রাপ্ত হইবে। পরিশেষে তাহার কার্যে এমনই বিশৃঙ্খলা উপস্থিত হইবে যে, সে নিজে কাহারও অধীনস্থ হইলে সর্বদা তাহার উপরিস্থ ব্যক্তি বা প্রভুর নিকট তিরস্কার প্রাপ্ত হইয়া অত্যন্ত ক্ষোভ-গ্রস্ত হইবে। এইরূপে সে স্বপদ-মর্যাদা সংরক্ষণে অসমর্থ হইয়া পরিণামে সম্মান-ভ্রষ্ট হওয়াই তাহার দুর্ভাগ্য ঘটবে। শিথিল-স্বভাব-যুক্ত ব্যক্তি কোন স্বাধীন ব্যবসাবলম্বী হইলে তাহার অবলম্বিত কার্য সময়ে অবশ্যই বিনাশ প্রাপ্ত হইবে।

অপরপক্ষে, যাহাদিগের কার্য-তৎপরতা আছে, তাহাদিগের অল্প বিশেষ কার্যগুণ না থাকিলেও তাহারা সময়ে তজ্জগত কর্মিষ্ঠ সজ্জাত হইবে। তাহারা ঐ একটা গুণের জগত অপরের প্রশংসা-ভাজন হইয়া থাকে। পিপীলিকা এবং শম্বুক কাহার কি করিয়া থাকে? বরং, পিপীলিকা মল্লব্যাকে দংশন করে এবং সময়ে তাহার দ্রব্যাদিও নষ্ট করে; কিন্তু, ঐ কীটের কার্য-ব্যস্ততা চিরোপমার বিষয়, এবং শম্বুকের দৃষ্টি চির ঘৃণার কারণ হইয়াছে। কার্য-তৎপর-ব্যক্তি পিপীলিকা সদৃশ। তাহার অনান ঐ গুণে অপরে বশীভূত হয়। কার্যের স্বরিৎ-সম্পাদন-হেতু তাহার সহিত কার্যাদিতে সাধারণে স্মখানুভব করে। স্মতরাং, তাহাতে যেমন তাহার নিজের শ্রীবৃদ্ধি হয়, তাহার সহিত ব্যবহারে অপরের কার্যও সময়ে শ্রীসম্পন্ন হয়। তুমি ঐরূপ স্বভাব-যুক্ত হইলে লোকে তোমার নিকট কার্যের জগত আনিয়া তৎকার্যে অকৃতকার্য হইলেও তাহারা সত্ত্বর দ্বিতীয় উপায়



অবলম্বন করিতে সমর্থ হইবে; সুতরাং, তোমার কার্য-তৎপরতায় অশ্রের উপকার ভিন্ন অপকার সংঘটিত হইল না।

তুমি হয় ত গুরুকার্যাদি স্বরিত সম্পাদনে যত্নশীল; কিন্তু, ক্ষুদ্র বিষয়গুলিতে শৈথিল্য প্রকাশ করা তোমার স্বভাবগত হইয়াছে। তুমি মনে করিবে বিষয়-ব্যবসাদি সম্বন্ধীয় কার্যগুলির প্রতি সম্বন্ধ মনোযোগী হওয়া তোমার নিজ প্রয়োজন; কিন্তু, অল্প সাধারণ কার্যগুলি তোমার তাদৃশ আবশ্যকীয় বলিয়া মনে না হইতে পারে। ইহা তোমার পক্ষে নিতান্ত বিড়ম্বনা। ক্ষুদ্র কার্যের প্রতি তোমার তাচ্ছল্য উপজাত হইলে, তুমি তদ্বারা ঐ কার্য-কল-প্রত্যাশীকে যে কেবল ভগ্ন-মনোরথ বা তাহার অনিষ্ট করিলে তাহা নহে, তদ্বারা নিজেরও অনিষ্ট করিলে, অর্থাৎ ঐরূপ ব্যবহার দ্বারা তুমি নিজে অকর্মণ্য সজ্জাত হইবার পথ উদ্ঘাটিত করিলে। তোমার পক্ষে বাহা ক্ষুদ্র, তাহা অপরের নিকট অতি গুরু বা মহৎ হওয়া বিচিত্র নহে। অতএব, যে কেহ বাক্য বা লিপি দ্বারা তোমার নিকট কোন বিষয়ে প্রার্থী হইলে তুমি তৎপ্রার্থনার প্রতি স্বরিত কর্ণপাত করিবে এবং তাহা গ্রাহ্য বা অগ্রাহ্য করিতে হইলে সম্বন্ধই তাহা করিবে। কেননা একটা বিষয়ে শিথিল স্বভাব হইলে, ক্রমশঃ অশ্রান্ত কার্যে তোমার ঐ প্রকৃতিপ্রাপ্ত হওয়া অবশ্যসম্ভাবী। অতএব বিষয়ক্ষেত্রে প্রতিপত্তি লাভ করিবার অভিলাষী হইলে কোনও বিষয়ে শিথিল-স্বভাব যুক্ত হইবে না। সমস্ত কার্য ঈশ্বরাদিষ্ট কর্তব্য বলিয়া

তোমার জ্ঞান থাকিলে স্বতঃই কার্য্য-তৎপরতা তোমার প্রকৃতির বিষয় হইবে। তদবস্থায় তুমি সকলের আদরের সামগ্রী হইয়া সুখী হইবে।

### ৬১। ক্ষুদ্রদৃষ্টি ।

সাধারণে ইহাতে কেবল নীচতাই দর্শন করে। বস্তুতঃ, যেখানে উচ্চ দৃষ্টির প্রয়োজন, সেখানে দৃষ্টির খর্ব্বতায় নীচতা সন্দেহ নাই। কিন্তু, ক্ষুদ্রদৃষ্টি সর্বদা নীচদৃষ্টি বা হৃদয়ের নীচতা-জ্ঞাপক নহে। তোমার ক্ষুদ্রদৃষ্টি না থাকিলে, তোমার প্রকৃত বিষয়-জ্ঞান কদাচ জন্মিবে না। প্রচলিত কথা বা নিয়ম এই যে, রচনা-কার্য্যে তুমি ক্ষুদ্র ক্ষুদ্র শব্দগুলির প্রতি অবহিত হইলেই, বড় বড় শব্দ-নিচয়ে স্বতঃই সাবধান হইবে। ইহাই রচনার বীজমন্ত্র। এই সূত্রানুসারে চলিলে, তুমি সন্ময়ে রচনায় অবশ্যই পারিপাটা লাভ করিবে। বিষয়ক্ষেত্রে তুমি ক্ষুদ্র কার্য্যগুলিকে একেবারে অবহেলা করিলে, তুমি যে কেবল শিথিল-স্বভাব-যুক্ত হইবে তাহা নহে, তুমি কার্য্য-পটুতাও লাভ করিতে সমর্থ হইবে না। একটা সামান্য ক্ষুদ্র বিষয়াবহেলায় কি না অকল্যাণ সংঘটিত হইতে পারে? কথিত আছে, একদা একটা সামান্য বিষয়ে অমনোবোগিতা-হেতু জনৈক সেনাপতির সমস্ত সেনা বিনষ্ট হইয়াছিল। “একটা কীলকের অভাবে তাঁহার সহকারী সৈনিকের অশ্বক্ষুরের নালা নষ্ট হয়; সেই নাালের অভাবে সৈনিকের অশ্ব নষ্ট হয়; এবং সেই অশ্বের অভাবে সৈনিক পুরুষ

স্বয়ং বিনষ্ট হন ; কারণ, তিনি শত্রু হস্তে পতিত হইয়া হত হইলেন ; তৎপর সেই সৈনিকের প্রাজ্ঞতার অভাবে তদীয় সেনাপতির সমস্ত সেনা বিনষ্ট হইল। সৈনিকের অশ্বনাশে একটা ক্ষুদ্র কৌলক রীতিমত সংবদ্ধ হয় নাই বলিয়াই, ঐ সমস্ত ঘটনা সংঘটিত হইয়াছিল।” অতএব কর্মক্ষেত্রে ক্ষুদ্রদৃষ্টির অতীব প্রয়োজন।

তোমাকে ক্ষুদ্র বিষয়ে দৃষ্টি-বিরহিত দেখিলে, তোমার অধীনস্থ ব্যক্তিগণ ঐ ঐ ক্ষুদ্র বিষয়ে প্রতারণার দ্বারাই সময়ে তোমার সর্বনাশ করিবে। অনেকগুলি ক্ষুদ্রবস্তু-সমষ্টিতে একটা বৃহৎ বস্তু সঞ্চারিত হয়। ক্ষুদ্রকে বৃহদাকারে দেখিলেই তোমার চক্ষু ফুটিবে ; কিন্তু, অকালাবধানে কোন সফল সংঘটিত হইবে না। সময় থাকিতেই সাবধান হওয়া কর্তব্য। অতএব প্রথম হইতেই তোমার ক্ষুদ্র ক্ষুদ্র বিষয়গুলিতে তুমি দৃষ্টি রাখিবে। তাহাতে অপরে তোমার ঐ কার্য নীচ জ্ঞান করে করুক, তাহাতে তোমার যেমন কোন ক্ষতি হইবে না, অপরপক্ষে তাহারাও উহাতে উন্নতমনাঃ বলিয়া পরিচিত হইবে না। পরের দ্রব্য সকলেই অকাতরে অপব্যয় করিতে পারে। তোমার অর্থাপব্যয়ে বা অনিষ্টে প্রহুষ্ঠমনাঃ হইয়া তাদৃশ ব্যক্তিগণ বড়মানুষের প্রকাশ করিলে কি হইল ? যদি তাহা-দিগের নিজ সম্বন্ধেও ক্ষুদ্র বিষয়গুলির প্রতি আপন আপন দৃষ্টি না থাকে, তাহা হইলে তাহাতে তাহাদিগের উচ্চ-মনস্বিতা প্রদর্শিত হইল না, বরং মুঢ়ত্ব অধিক পরিমাণেই প্রকাশিত হইল। কেননা, তাহারা নিজের এবং অপরের অনিষ্টকারী ইহাই তাহাতে প্রমাণিত হইল।

পরের কথা কখনও ভ্রান্ত হইবে না, অথবা অখ্যাতি-ভীতি বা স্মৃত্যতির আশা দ্বারা কখনও পরিচালিত হইবে না। যাহা উচিত এবং সত্য বলিয়া হৃদয়ে ধারণা হইবে, তদনুসরণ করিতে কখনও সঙ্কুচিত হইবে না। ঔচিত্যের অথবা সত্যের ক্ষুদ্রত্ব বা বৃহত্ত্ব নাই। একটা ক্ষুদ্র সত্য তুমি পরিত্যাগ করিলে; তাহাতে নিজ জীবনকে তুমি অসত্য করিলে। ঐ অসত্যতার কালে তোমার মহানিষ্ঠে সংঘটিত হইবে। তখন রক্ষার অল্পপায় দেখিয়া অত্যন্ত আক্ষেপেই জীবন অবসান হইবে।

উচ্চ-দৃষ্টিতে অনেকে নষ্ট হইয়াছে। কোন সম্ভ্রান্ত উচ্চ-পদাধিষ্ঠিত কর্মচারী সর্বদা এমনই উচ্চ-চালে চলিতেন যে, তিনি তাঁহার নিজ কার্যক্ষেত্রের ক্ষুদ্র বিবরণগুলির প্রতি আদৌ দৃষ্টি রাখিতেন না। কালে তাঁহার সন্ধ্যবহারের স্বতঃই অপব্যবহার হইল। প্রবঞ্চকগণ তাঁহার ওদাসীত্ত্ব বুদ্ধিমানা-রূপ প্রবঞ্চনার প্রবৃত্ত হইল। কালক্রমে সেই প্রবঞ্চনা-নিচয় রাজ-কর্ণগোচর হইল। তখন রাজপক্ষ হইতে তাঁহাকে সেই সমস্তের কারণ জিজ্ঞাসা করা হইল। কিন্তু, তাঁহার আর কি উত্তর আছে? প্রবঞ্চকগণ তাঁহার এমনই সর্বনাশ করিয়াছে যে, তাঁহার একটা কথা বলিবারও স্মরণ রাখে নাই। স্মরণ, হতাশ হইয়া তিনি এক প্রকার নিরুত্তর হইলেন; কিন্তু, তাহাতে তিনি ঞ্জায়ের দণ্ড এড়াইতে পারিলেন না। পরিণামে তিনি স্বীয় সম্মানের পদ হইতে চ্যুত হইলেন। প্রকৃত মানীর মর্শ্বপীড়া কোথায় সহ হইয়াছে! সেই মর্শ্ব বেদনায় তাঁহার আত্মা সত্ত্বরই দেহাবচ্ছিন্ন হইল।

উপরে যাহা উল্লিখিত হইল, তৎসমস্তই ক্ষুদ্র-দৃষ্টি-বির-  
হিততার ফল। যদি সেই মানী ব্যক্তি একটু প্রথর-দৃষ্টি  
হইতেন, তাঁহার পরিণাম-হৃদশা ঘটবার সম্ভাবনা ছিল না।  
কিন্তু, তিনি উচ্চ-চালেই নষ্ট হইলেন। অতএব অবথা  
উচ্চ-চালে কখনও আপনার স্বার্থ নাশ করিবে না। অব-  
হিত হইয়া ক্ষুদ্র এবং বৃহৎ বিষয় সমুদয় আপনার দৃষ্টির  
অধীন রাখিবে, তাহাতে প্রথমটীতে হৃষ্টলোক কর্তৃক তোমার  
কুশল ঘোষিত হইলেও তুমি কদাচ আশ্চর্য হারাইবে না।  
এই আশ্চর্য রক্ষা করিতে তুমি সর্বদা সর্বতোভাবে  
যত্নবান হইবে। তাহাতে পরিণামে তোমার বিরোধি-  
গণও তোমার যশঃকীর্তন করিতে বাধ্য হইবে। এই-  
রূপে তুমি আশ্চর্য-সন্তোষ এবং সুখ্যাতি উভয় লাভ  
করিয়া সুখী হইবে।

## ৬২। বিনয় ।

ফলভারাবনত বৃক্ষ যেমন নয়ন-রঞ্জক ও মনোহর, বিনয়াব-  
নত মনুষ্য তেমনি সুদৃশ্য ও চিত্তবিনোদকারী। অপিচ,  
পাদপ শাখা-প্রশাখায় সুশোভিত হইয়া সুন্দররূপে বদ্ধিত  
হইলেও তাহা সময়ে ফল ধারণ না করিলে যেমন নিশ্চয়ই  
অনাদরের বস্ত হইয়া পড়ে, সেইরূপ মনুষ্য বিদ্যা-বুদ্ধি-সম্পন্ন  
হইয়া তাহার হৃদয় বিনয়বৃত্ত না হইলে অবশ্যই সে  
স্বর্ণাম্পদ হয়। বিনয়ী হইলে মস্তক নত করিতে হয়  
বটে; কিন্তু, সেই নমিত-মস্তক পুষ্পগুচ্ছাবনত কমণী

গোলাপশাখা সদৃশ সাদরেই উত্তোলিত হইয়া সাধু ও অসাধু সকলের কর্তৃকই আদৃত হইয়া থাকে।

বিনয়ই স্পর্শমণি। যাহার হৃদয়ে বিনয় আছে, তাহার সমস্ত প্রকৃতি ঐ স্পর্শমণি সংস্পর্শে সুবর্ণাকারে পরিণত হইবে। বিদ্যাহীন ব্যক্তিরও বিনয় থাকিলে, সে আদর প্রাপ্ত হইয়া থাকে। তুমি বিবয়ক্ষেত্রে কোন কর্মে নিযুক্ত আছ; তুমি প্রকৃত বিনয়ী হইলে, তোমার উপরিস্থ বা অধীনস্থ ব্যক্তিগণ সকলেই তোমার প্রতি সম্বদ্ধ থাকিবে। তদবস্থায় তোমার কল্যাণ সকলেরই অভিলাষের সামগ্রী হইবে; এবং সকলের শুভ কামনায় তুমি নিশ্চয়ই ক্রমোন্নতি লাভ করিতে সমর্থ হইবে। কিন্তু, কর্মক্ষেত্রে যে অবিনয়ী বা অহঙ্কারযুক্ত, সে বিদ্বান বা অজ্ঞান্য গুণবিশিষ্ট হইলেও নিশ্চয়ই অপরের বিবদৃষ্টিতে পড়িবে। স্মরণ্য, সে সকলের বিদ্বেষের পাত্র হইয়া অবনতি প্রাপ্ত হইবে; এবং কোনরূপে তাহার উন্নতাবস্থা হইলেও কেহ তাহাতে সুখানুভব করিবে না। সে পরের অশুভ-দৃষ্টিতে পতিত হইয়া আপনার ঐ উন্নতিতেও আশ্বসুখহারা হইবে। আশীর্বাদ বা অভিসম্পাত একেবারে মিথ্যা নহে। মনুষ্য-জীবনে উভয়েরই ফল ফলিয়া থাকে। সকলের আশীর্বাদ প্রাপ্ত হইতে সর্বদাই সচেষ্ট থাকিবে। তাহাতে তোমার মঙ্গল সর্বতোভাবে সাধিত হইবে।

যদি বিনা সম্বলে কেহ সংসার-বিচরণে সমর্থ হয়, সে সৎ বা বিনয়ী ব্যক্তি। কেহ চাকরীর জন্ত প্রার্থী। সেই ব্যক্তি প্রকৃত বিনয়ী হইলে তাহার প্রতি সকলেরই স্নেহ

ও দয়া উপজাত হইবে; এবং এক সময়ে সে অভীক্ষিত বস্তু পাইয়াও সুখী হইবে। মংশ শিকার করিতে হইলে অধোদৃষ্টিরই প্রয়োজন। উর্দ্ধমুখ ব্যক্তি ঐ কার্যে সফলকাম হয় না। সেইরূপ অহঙ্কারোন্নত-ব্যক্তি কদাচ আপন ঈক্ষিত বস্তু লাভ করিতে সমর্থ হয় না। সংসারে উন্নতি লাভ করিবার আশা থাকিলে, তুমি সর্বদা নম্র এবং বিনয়ী হইবে। কিন্তু, তোমার বিনয় যেন বিড়াল-ব্রতিকে বিনয় না হয়। তুমি বিনয়ে আপনাকে সর্বদা অতি ক্ষুদ্র জ্ঞান করিবে। তোমার হৃদয় সতত ভগবচ্চরণাবনত থাকিলে বিড়াল-তপস্বিত্ব বা বক-ধার্মিকত্ব তোমাকে স্পর্শ করিতে পারিবে না। তাহা হইলে তুমি নিত্য ঈশ্বরের প্রসন্নতা এবং মনুষ্যের সন্তোষ লাভ করিয়া সুখী হইবে। জগতের স্নেহ এবং সহানুভূতি লাভ করিতে হইলে, আপনাকে জগৎ-সেবক এবং বিনয়ীরূপে প্রতিষ্ঠিত করিবে।

### ৬৩ । কৃতজ্ঞতা ।

কেহ বলিয়াছেন যে, মনুষ্য হাসিতে পারে, ইহাতেই পশ্বাদি প্রাণীসমূহ হইতে তাহার পার্থক্য। অপিচ, মনুষ্যই কেবল হৃদয়-কৃতজ্ঞতা নিজ মুখে প্রকাশ করিতে সমর্থ, অতএব এই শক্তিতেও অবনিস্ অগ্রাণ জীবাদি হইতে তাহার বিশেষ স্বাতন্ত্রিকতা। বাস্তবিক, কৃতজ্ঞতা-শূন্য মানব, পশু বা জড়-পদার্থ সদৃশ। গো, অশ্ব, কুকুর প্রভৃতি

গৃহপালিত জন্তুগণের মধ্যে প্রভুভক্তি দৃষ্ট হইয়া থাকে, এবং তাহা কখন কৃতজ্ঞতা নামেও অভিহিত হয়। কিন্তু, মনুষ্যের হৃদয়-কৃতজ্ঞতা স্বতন্ত্র। পশ্বাদি ষতদিন বাহ্য কর্তৃক পালিত হয়, ততদিন তাহার প্রতি উহাদিগের অমুরাগ; স্বানী-পরিবর্তনে সেই অমুরাগেরও পরিবর্তন। মনুষ্য সেই রূপ চাইলে, ইতর জীবজন্তু হইতে তাহার বিশেষ প্রভেদ থাকিত না। যে প্রকৃত মনুষ্য, তাহার এক দিনের অমুরাগ চিরদিনের শ্রদ্ধা; কোন দিন কাহারও নিকট একটাও উপকার প্রাপ্ত হইলে, নিত্যকাল তাহার হৃদয় সেই উপকারীর চরণাবনত। ইহাই মনুষ্য-হৃদয়ের কৃতজ্ঞতা। এই হৃদয়-কৃতজ্ঞতা বাহার আছে, সে একটা অমূল্য রত্নের অধিকারী। সে একজন সামান্য ব্যক্তি হইলেও সকলের ম্নেহের পাত্র। তাহার হিতসাধন সর্বদাই অন্যের সন্তোষের কারণ; স্মরণে, সংসারে তাহার মঙ্গলও ধ্রুব। কিন্তু, অকৃতজ্ঞ ব্যক্তি স্বভাবতঃ সকলের অপ্ৰিয়, এবং সে আশ্রয় স্বজনেরও শুভকামনা হইতে বঞ্চিত হয়; স্মরণে, তাহার নিজ মঙ্গলের আশা অতীব অল্প। উপকারীকে স্মরণমাত্রে তৎপ্রতি যে ব্যক্তির হৃদয় ভক্তিরসে আর্দ্র না হয়, সেই ব্যক্তি অবশ্য ঘৃণার্থ।

সাধারণ মনুষ্য-হৃদয় এমনই গঠিত যে, সে নিজ কৃতোপকারের কোনরূপ বিনিময় প্রতীক্ষা না করিয়া থাকিতে পারে না। তাহার নিকট উপকৃতের হৃদয়-কৃতজ্ঞতা অন্যান্য সেই বিনিময়। প্রত্যুতঃ, এ বিনিময়ও অধিক নহে। মনুষ্য তাহা অনায়াসে প্রদান করিতে সমর্থ। ইহাতে অর্থ বা অশ্র



কিছুই ব্যয় নাই। ঋণ-স্বীকারেই ঋণ-পরিশোধ, ইহা অপেক্ষা ঋণ-মুক্তির সহজ উপায় আর কি আছে? এইরূপ ঋণ-স্বীকারে মনুষ্য মনুষ্যের তুষ্টি, এবং ঈশ্বরের অশীর্বাদ যুগপৎ প্রাপ্ত হইয়া থাকে। এইরূপ কৃতজ্ঞতা প্রকাশে যে ব্যক্তি পরাশ্রুত, তাহাকে নিতান্ত নির্বোধ হতভাগ্য বলিতে হইবে। তাদৃশ ব্যক্তি অবশ্য জগতে ঘৃণিত। কিন্তু, কেহ কেহ স্বভাবতঃ অধিক লজ্জাশীল, এবং সেই হেতু তাহাদিগের অন্তরের কৃতজ্ঞতা সময়ে বাক্যে প্রকাশিত হইবার অবকাশ পায় না। লজ্জাশীলা রমণী এবং তাদৃশ প্রকৃতি-বিশিষ্ট পুরুষদিগের ঐ অবস্থা ঘটয়া থাকে। কিন্তু, তজ্জন্ত তাহাদিগের প্রতি কেহ যেন হঠাৎ কঠিনতা প্রকাশ না করেন। তাহাদিগের হৃদয়-কৃতজ্ঞতা তাহাদিগের আশ্রয়েই প্রকাশিত হইবে। তুমি মনুষ্য-প্রকৃতি-তত্ত্বজ্ঞ হইলে, সেই কৃতজ্ঞতা অনায়াসে চিনিয়া লইতে পারিবে। বাক্যাপেক্ষা মৌন-ভাবাপন্ন মুখ-মণ্ডলে যে কৃতজ্ঞতার বিকাশ হয়, তাহা অতীব মনোহর। তৎকালে মনুষ্যাস্ত্রে দেব-ভাবের আবির্ভাবে তৎমধুরত্ব সন্দর্শনে কাহার না হৃদয় পুলকিত হয়? কিন্তু, যেখানে হৃদয়-কৃতজ্ঞতা আশ্রয়ে প্রকাশিত হইবার অবকাশ পায় নাই, সে স্থলে উপকৃত-ব্যক্তি উপযুক্ত অবসরের প্রতীক্ষা করিবেন, এবং তাহা উপস্থিত হইলে প্রাপ্তোপকারের জন্ত কৃতজ্ঞতা বাক্যে স্বীকার করিতে যেন কোন মতে ক্রটি না করেন। অত্যাধি, তিনি কোন বিষয়ে একবার অকৃতজ্ঞরূপে পরিচিত হইলে, তাহা তাঁহার চির-কলঙ্কের কারণ হইবে। অন্যান্য, যাহার নিকট তিনি কৃতজ্ঞতা

প্রকাশ করিতে অপারগ হইলেন, তাঁহার নিকট তাঁহার দ্বিতীয় উপকার প্রাপ্তির আশা আর থাকিবে না ।

কৃতজ্ঞতা-প্রাপ্তি অতীব মনোহর এবং আনন্দের কারণ । কিন্তু, ইহাতে প্রাপকের হৃদয় যেন অহঙ্কারে স্ফীত না হয় । দেবপূজারূপ সাধক উত্তম কুসুমাদি প্রাপ্ত হইলে, তাহা স্বীয় আরাধ্য দেবতাকে নিবেদন করিয়াই কৃতার্থ হন । অল্পের কৃতজ্ঞতা-প্রাপ্তি যদি কাহারও সৌভাগ্য হয়, সেই ব্যক্তি ঈশ্বরেই সেই প্রাপ্ত উপহারটি অর্পণ করিবে । ঐ অবস্থায় কৃতজ্ঞতা-দাতা এবং তৎগ্রহীতা উভয়েই ঈশ্বর-প্রসন্নতা-লাভে সুখী হইবে । এইরূপে কৃতজ্ঞতা-দান এবং কৃতজ্ঞতা-গ্রহণকে আপনার পরমার্থ-লাভের উপায়ীভূত করিয়া সংসারে আপনাকে নিরত ধ্যে করিবে ।

সম্পূর্ণ ।





## শুদ্ধিপত্র ।

পৃষ্ঠ	পংক্তি	অশুদ্ধ	শুদ্ধ
১৬	৫-২১		ধর্মতত্ত্ব পত্রিকা হইতে উদ্ধৃত
১৯	১৫	করিলে	করিলে, যদি
২৪	১৬	মনোপীড়ার	মনঃপীড়ার
৪৩	২৪	পূর্ব পথের	পূর্ব জন্মের
৫৮	১	স্থল	মূল
৬৫	৪	বিপদ আনিতে	বিষাদ আনিতে
৭২	৬	সমুদ্র-বিচ্ছিন্ন	সমুদ্র-বিনিঃসৃত
৭৪	৮	ব্যবস্থানভিজেরই	ব্যবহারানভিজেরই
৮০	১৭	মুহূর্তের	প্রতিমুহূর্তের
৮২	১৫	সম্বন্ধে সংস্পৃষ্ট	সংস্পৃষ্ট
৮৯	৩	সেই	সেইরূপ
৯৪	২	পরিবর্দ্ধন	পরিবর্জন
৯৯	১৩	বৈষয়িক	বৈষয়িক বুদ্ধির
১০০	২০	ব্যবস্থার	ব্যবহার
১০৩	১২	পরিবর্দ্ধন	পরিবর্তন
১০৭	১৮	প্রকৃত	প্রকৃত উদ্বাহ
১২৬	১২	উন্মাদ-আখ্যা	উন্মাদাখ্যা
১২৯	১৮	অসস্তোষেও	সস্তোষেও
১৩০	২২	কীর্ত্তিমান্	কান্তিমান
১৩১	৫	সততাই	সততাতাই

















